

# BALAABA MAANYÌ KU CIKONDO CYÀ NSHÌIKÌDÌLÙ



Mwoyi wenu awu mu dinda emu, nwênù bateeleji. Twakulaayi ne Mukalenge wetu mpindyewu.

<sup>2</sup> Nzambi munene, Mufuki wa maulu ne buloba, Wêwè udi mutulongolwele mu Bunzambi Bwebe cikondo eci mu dinda emu, cya diKukukwila. Nenku swaku ne twêtù, Mukalenge, mu myoyi yetu tudilambule mu kaabujimà ku diswa Dyebe dya Nzambi ne ku mudimu wa Nyuma Mwîmpè munda mwetu, bwa kutwala cyùdi Wêwè ukeba bwa twêtù kumanya aci. Dijinga dyetu ndya kwikala beena Kilisto batambe bwîmpè ne baleeji baa mpala Webe batambe bwîmpè. Swaku Wêwè ùtwènzèlè cyôcì eci mu dinda emu, patudi baKutekemene Wêwè apa, mu Dîna dya Yesu Kilisto. Amen.

<sup>3</sup> Sòmbelaayi panshi. [Muntu mukwabo udi wamba ne: “Tuumushe tulùlù twa disambila anyi?”—Muf.] Eyowa. Tudi ne disanka be dya kwikala cyakabidi mwab’ewu mu dinda emu, mu—mu mudimu wa Mfumu munene. Kadi bidi bitutonda ku mwoyi, twêtù, cyakabidi, bwa mutudi katuyi ne myaba bwa bantu, kadi tudi anu ne. . . Netuteete bwa kwenza mwetu mwónsò mutudi mwa kwenza amu, mushindu mwine udi maalu ewu.

<sup>4</sup> Mpindyewu, bààbùngì badi ne mishwala ne malomba biteeka mwab’ewu bwa kubisambidila. Kadi ndi anu nganji mbiteeka ku luseke; kî mbwena kwamba ne ndi mbenga kubitangila to, kadi ntu mbisambidila paanyima paa. . .ntu munange nangananga. . .ne diloolo edi, nêmbisambidilè mu dinda emu, ne pashiishe diloolo edi kabidi, pàdi, pashiishe nênsambilè ne nêngìndilè Nyuma wa Nzambi bwa dyondopa. Nenku pa dîbà adi ki pândi muswe kusambidila mi—mishwala ne bikwabo.

<sup>5</sup> Nenku bwa malomba a pabwawu, Billy mmuàmpèèshe, dilomba ne dilomba, mumpeeshe mêmè. Mmatwe ku nkama yisatu, nenku mêmè, ncidi mfuma ku dipatuka mu bibambalu pa dîbà adi. Nudi numona, ntu anu ngàngata ôwò awu ne lukasa lwónsò, dyónsò dya kudiwu, dyónsò dîndì mwa kutwa cyanza adi. Nenku nêngàngàtè ne lukasa lwónsò mùndì paanyi mwa kuàngata amu. Ncyakukookesha kuàngata ónsò to. Anu kwela cyanza, bikengela kwangata dimwepele, kwamba ne: “Mukalenge, nediikale *edi*, ne nediikale *edi* anyi?” Anu mushindu awu, bwalu ónsò awu, dyónsò dya kudiwu, adi anu mmajinga, malomba anu etu a menemene aa; cintu

kampanda, kakuyi mpatà to, cìvwà cìkèngelà bwa twètù kuyiikila pamwe bwa bwalu bwaci. Nenku mèmè. . . Amba anu ne, nudi bamanye's, mîngà misangu Nyuma Mwîmpè udi mwa kwamba dilomba kampanda dîndî mubale, diikale dishaala pa mwoyi wanyi; ndi mpingana kabidi ku dyôdi adi, nkebulula mwômò amu too ne pândi ndipeta. Bwa cyanaana, ndi ngàngata paanyi anu mu mpuukapuuka.

<sup>6</sup> Mpindyewu, tudi kabidi tujinga kwamba, mu dinda emu, ne kwela mwoyi aba badi kule mu bikwabo bitupa bya ditunga. Tudi baswe kwela bantu mwoyi mu dinda emu badi biikale ku nshinga ku telefone ewu, mu New York City; mu Beaumont, Texas; mu Prescott, Arizona; mu Tucson, Arizona; mu San Jose, Californie; mu Connecticut; mu Gainesville, Géorgie; ne mu New Albany, Indiana; eku ne eku kwa ditunga. Tudi tunwela mwoyi mu Dîna dya Mukalenge Yesu.

<sup>7</sup> Mu dinda emu, mu Indiana, ndinda dilenga dya dikema. Tuvwa bapete mvula diloolo dya makeelela awu uvwa mutalaje kuulu. Nenku tudi. . . Tabernacle mmûle patapata, ne bantu bônso mbindile, ne myoyi yizuka, bindile dileesona dya kalaasa kaa Dyalumingu. Nenku ndi ne dyeyemena ne mabenesha matambe kubanjika a Nzambi neikale pambidi peenu kuntwaku.

<sup>8</sup> Ne tudi ne ditekemena ne, ne lukasa lwônso, netulongolole mu—mushindu utudi mwa kupeta, mwaba utudi mwa kadikungwijila bônso pamwe, pâmwâpa mu ntenta munene kampanda, mûndî ndyumvwa mulombodiibwe ne ditwishiibwa dyônso bwa kuyiisha pa Mpanza Mwandamuteke ya ndekeelu eyi mu Bible.

<sup>9</sup> Pa nanku mpindyewu, bwa katwikadi twâlwa kwangata mukûngûlù mupitepite bule pa dileesona edi dinene mu dinda emu. . . Ndi mukebe Mukalenge, ndyambidila ne: “Cîndî mufwanyine kwamba ncinyi?” mwikale mumanye ne edi disangisha didi mwa kwikala dyetu dya ndekeelu ditwikalaku ne cya kwenza. Dilwa dya Mukalenge didi pabwîpi menemene!

<sup>10</sup> Ndi mmona ne, paanyima paa dîyi didyanjila kwamba dya mu Californie adi, kukaadi nzubu muntwamu, ne m'yaba, yîtùkina mu buloba lubilu lwa centimètres makumi mwandamutekete ne yisambombo ku dîbâ, mici ya diibaka naayi miikale yaba ne yicibuka. Kadi bôbô kî mbamanye ne cidî cyenzeja byôbi abi ncinyi to. Tukaadi ku ndekeelu. Nzubu ya yiyiila ndola binunu nkama, yîtùkina mu buloba. Ndi mupete mitu ya maalu minene mu cibejibeji, fôtô, yîndî ntekemena ne nêndwe naayi diloolo edi, bu mûndî njinga kwakula pa cintu kampanda cya pa bwine bwalu abu diloolo edi.

<sup>11</sup> Nenku, pashiishe, diloolo edi tudi ne disambidila dya babeedi. Nulwayi mu mapingaja emu, pa dîbâ itaanu, isambombo jaajaaja, anyi dyônso diikalabi adi. Netubange

kumpala kwa dîbà, ngeela meeji, bwa bantu baamonaku mwa kwalukila kumpala kwa dîbà, ne nwamona mwa kupeta twarta twenu twa disambila. Nenu netusambidile babeedi diloolo edi, bu Mukalenge mwa kwanyisha.

<sup>12</sup> Mpindyewu, paanyima paa mêmè mumane kwelangana meeji mu disambila ne: “Ndi ne cya kwenza cinyi?” bu mûndi mumanye ne dîngà dituku nêngûikalè ne cya kulumbulula bwa bîndî ngamba mwab’ewu ebi. . . Nenu mêmè kwangata dipangadika, anyi kudyumvwa mulombodiibwe kudi Nyuma Mwîmpè bwa kwakula mu dinda emu pa ciprofeta, bwa kutumanyishaku mu mushindu kampanda. Nwamonu anyi? Ncintu kampanda citudi. . . Twètù katuyi bamanyisha to, kadi cintu kampanda kwenzekaci anu ku mpuukapuuka, bivwa bikengela twikale bamanye pa bwalu ebu. Nyuma Mwîmpè ngudi mutupe ciine eci, bwa kudimwija bantu pa maalu àlwalwà. Nudi bamanye ne, Bible mmwambe, ne: “Nzambi kaakwenza cintu nansha cimwe to anu Yèyè mwanji kucileeja dyambedi basadidi Bende, baprofeta.” Ne—ne muvwa Yesu mudimwije bantu, pa bivwa mwa kwenzeka; muvwa baprofeta badimwija bantu, pa bivwa mwa kwenzeka. Nenu mbujitu butwomekela mpindyewu, mu dîbà dya butumbi ditudi ne mwoyi edi, bwa kumona ne mmu cikondo kaayi mutudi ne mwoyi, ne ncinyi cîdî munkaci mwa kwenzek- . . . ne cîikalà mwa kwenzeka mu eci cikondo ncinyi. Pa nanku cimwe cya ku byena-bwalu bya pawabi bitukaadi misangu mikwabo babalebale misangu yâbûngî ebi, mbimvwile mu mwoyi bwa—bwa kwakula ne bantu pa bwalu abu mu dinda edi.

<sup>13</sup> Mpindyewu tubuululaayi mu Bibles yetu mu Maataayi mu nshapita wa 24, tubale katupa kaa Dîyî [Mwaneetu Branham udi ûkèkemenâ—Muf.] (Numfwileku luse.) bu mushindu wa—wa kupetaku dyumvwija bwa kubala kwetu ne cyena-bwalu cyetu.

<sup>14</sup> Mpindyewu, nwavulukaayi ne netulongeshe bwalu ebu cyenze bu kalaasa kaa tulonga Bible, biteketebitekete. Angataayi kidiyô yenu ne mabeji. Ndi mufunde Mifundu yâbûngî mwab’ewu, bwa—bwa nwamona mwa kuyifunda. Pashiishe nwalukile kumbelu nuyilonge, bwalu eci ncyenze anu bu mudi cilongelu cya kalaasa kaa Dyalumingu, bwa twètù kwikala bamanye, ne kwikala badimwijiibwe ne badilongolole bwa mêmè atudi ne mwoyi aa.

<sup>15</sup> Mu Mukanda wa Maataayi Munsantu, [Mwaneetu Branham udi ûkèkemenâ—Muf.] (Numfwileku luse.) Mvensa wa 24, anyi, nshapita wa 24, eyowa’s we, tubangila ku mvensa wa 15, ndi njinga kubala katupa kaa Dîyî Dyende.

Nenu *ki bwa cinyi panwamona cinyangu cya dibutuka, cyakambabo kudi Danyeke muprofeta aci, ciimane mu mwaba wa cijila, (ewu udi ubala, ûmwè:)*

*Pa dībà adi aba badi mu Yudaaya banyeemene ku mikuna:*

*Ewu udi pa musonga wa nzubu—musonga wa nzubu katwuluku bwa kwangata cintu kampanda mu nzubu mwende to:*

*Nansha ewu udi mu budimi kaalukidi bwa kwangata bilàmbà byende to.*

*Nenku dyakabi nediikale kudi aba biikalà ne mafu, ne aba biikalà bàamusha mu matuku awu!*

*Kadi nusambile bwa ne dinyeema dyenu kadiikadi mu muvù wa mashika, anyi mu dituku dya nsabatu to:*

*Bwalu dībà adi nekwikale dikenga dikole, dya bwenà didi kadiyiku dyanji kwenzeka kacya dyulu ne buloba byabanga too ne ku ciine cikondo eci, to, anyi kadyadyakwikalaku to.*

*Nenku bu matuku awu kaàyi miipidija to, kakuvwaku kufwanyine kwikala musunya nansha umwe mwa kusungidiibwa to: kadi bwa basungula matuku awu neipidijiibwe.*

*Nenku muntu yèyè nansha nganyi munwàmbile ne: Monaayi, Kilisto nyewu, anyi nyawa, kanùcitàbùùjì to.*

*Bwalu nekujuuke ba-Kilisto baa mashimi, ne baprofeta baa mashimi, ne nebaleeje bimanyinu binene ne maalu a kukema; mu mushindu wa ne, bu ne birwa mwa kwenzeka, nebaseeswishe basungula mene.*

*Monaayi, nyawu ngàdyànjidì kunwambila.*

*Ki bwalu kaayi bôbò banwàmbile ne: Monaayi, yèyè udi mu cipeela, kanuyimu to; monaayi, yèyè udi mu cibambalu cya cisokomenu, kanùcitàbùùjì to.*

*Bwalu anu mudi mukenyi upatukila ku esete, ne upenya too ne ku wesete, ki mwikalà kabidi dilwa dya Mwânà wa muntu.*

*Bwalu mwaba udi mubidi ùsanganyiiibwa, mwaba awu ki wàdisangishilà mikanku . . .*

<sup>16</sup> Mpindyewu, bwa cyena-bwalu, ndi njinga kwangata mvensa wa 24, bwa kusuminyina pa mvensa ewu bwa dileesona dyetu dya kalaasa kaa Dyalumingu mu dinda emu. Nenku teeleejaayi ne ntema pândi mbalulula cyòci eci, cyakabidi.

*Bwalu nekujuuke ba-Kilisto baa mashimi, ne baprofeta baa mashimi, ne nebaleeje bimanyinu binene ne maalu a kukema; mu mushindu wa ne, bu ne birwa mwa kwenzeka, nebaseeswishe basungula mene.*

<sup>17</sup> Mpindyewu bwa cyena-bwalu mu dinda emu, anyi kubala's we, ndi muswe kwangata: Balaaba Maanyi Ku Cikondo Cyà

*Nshìikidìlù.* Ki cyena-bwalu cîndi njinga kwakwilapu, anyi kubala aku: *Balaaba Maanyi Ku Cikondo Cyà Nshìikidìlù.*

<sup>18</sup> Ndi ngitabuuja ne tudi ne mwoyi mu cikondo cya nshìikidilu. Ndi ngeela meeji ne pabwîpi ne muntu wetu yônsò ewu udi. . . Mubadi wa Mifundu, nansha mene—mene mwena kwitabuuja, mmumanye ne tukaadi mpindyewu ku ndekeelu wa maalu malonda a buloba. Kabyakukengela kabidi dibifunda to, bwalu kakwakwikala muntu bwa kubibala to. Nku ndekeelu wa cikondo. Ndîbà kaayi menemene, mêmè ncyèna mumanye to. Nebiikale too ne ku dîbà kaayi diimanyika, nansha Banjelo baa mu Dyulu mene kî mbamanye kasunsa aku anyi dîbà adi to. Kadi twêtù mbatwâmbile kudi Mukalenge Yesu, ne, paabanga kwenzeka maalu atudi tumona mpindyewu aa, twabandulula mitu yetu pa dîbà adi bwalu bupikudi bwetu bukaadi bwenda buseemena. Mpindyewu, cidi “kuseemena” kuumvwija, ncyèna mumanye to. Cidi mwa kuumvwija ne. . .

<sup>19</sup> Muvwa beena maalu a mamanya bambe dituku adi, ku télévîsion, pavwabo baakula bwa mutanta munene wa bule bwa binunu bya kilomeeta mu buloba bwikalà mwa kutùkina mu mâyi. Kumwelabo lukonko elu ne: “Mbufwanyine kutùkina mwaba awu anyi?” Mbwenwa kwamba ne Los Angeles, Côte Ouest. Ne bàâbûngî baa kunudi mbamone muvwabo baye benda bawulondesha ne tulondo twa mpolondo, mudiwu mubànde mukapicile mu. . . mukapandikile mwinshi mwa San Jose, mukosolole mukabwele too ne mu Alaska, mupatuke mukapicile mu bisanga bya Aleutian Islands, mukabwele mu mbû mu ntanta wa kilomeeta mitwe ku nkama yisatu ne makumi abidi, kadi kwalukila cyakabidi e kuya kabwela mu San Diego, kunyungulukila paanyima paa Los Angeles, kadi kubànda kwaka, mpaaya munene.

<sup>20</sup> Ne dikanka dya buloba ditudi tupeta edi m’volcan mukatuute ne ku cyondokondoko cinene eci, bu nanku, munda amu. Ncyèna mwa kuvuluka dînà di—didibo bacînyîke to. Kadi, padi dikanka adi dyenzeka, bidi bifila dikanka dya buloba ditudi tupeta bidimu byônsò ebi pa Côte Ouest edi. Mpindyewu buloba mbwele mitanta mwônsò mu nyungulukilu amu. Nenku beena maalu a mamanya bavwa bamba, umwe. . .

Muntu awu kwambilaye mukwende ne: “Mbufwanyine kudîshika anyi?”

Awu ne: “Kî nne ‘mbufwanyine’ to, kadi nebûdîshikè.”

Yèyè ne: “Kadi kî mmu lwetu lukongo elu to, pàmwâpa.”

Awu ne: “Mu tusunsa tutaanu tudi tulonda etu, anyi mu bidimu bitaanu bidi bilonda ebi. Katwena anu bamanye menemene ne ndîbà kaayi to.”

<sup>21</sup> Lumingu elu, mbantumine mitu ya maalu mu cibejibeji, yamba bwa nzubu minene yidi yiyiila ndola binunu lukama miikale yaba ne yela mitanta, bantu bâmwangala. Nenku

kí mbamanye mwa kuciimanyika to. Kakwena mushindu wa kuciimanyika to. Nwamonu's, Nzambi udi mwa kwenza cyônsò cidìYe muswe kwenza aci, ne kakwena muntu nansha umwe udi mwa kuMwambila mushindu wa kucyenza nansha.

<sup>22</sup> Nudi nwibaka nzubu, nudi mwa kwenza bintu bya maalu a mamanya, kadi Nzambi's ki Mufuki wa maalu a mamanya. NenuMwimanyike munyi? Yèyè's udi mwa kubutula buloba mu dinda emu ku nkùpà piikalaYe muswe. S'nudi anu bamanye ne, Yèyè mmufwanyine kwamba dìyì nkùpà kupatukayi, ne miine ayi mifwanyine kwikala mupimbu wa kilomeeta makumi asambombo ne yinaayi mu katanci kaa tusunsa makumi asatu, nwamonu's, kakwenaku. . . ne kudyayi bantu kumana pa buloba apa. Yèyè udi Nzambi. Ùdi wenza anu mudiYe muswe. Mmudishikamine, mu Yèyè mwine.

<sup>23</sup> Mpindyewu, pa kumona mushiki wônsò wa bileeji ewu, pa bidi bitangila dîbà ditudi ne mwoyi mpindyewu edi, ndi ngeela meei ne mbwalu bwîmpè bwa kwambulula maalu aa ne kuàpátula patooke, bu mudibi ne Bitampi mbimana kukangula, ne kujandula bulelela bwa maalu aa, mudi Nzambi mudileeje wa lulamatu kutudi, ku ngàsà Wende, bwa kutuleeja maalu aa.

<sup>24</sup> Ndi muswe bwa numone mu Maataayi 24 emu, Yesu mmwambe mwaku ewu wa “ba-Kilisto,” b-a-K-i-l-i-s-t-o, “ba-Kilisto.” Kî n’Kilisto to, kadi “ba-Kilisto,” ku búngì, kí nku bumwe to. “Ba-Kilisto.” Pa nanku, mwaku *Kilisto* udi umvwija “Mulaaba maanyi.” Nenuki piikalabi ne cidì “mulaaba maanyi,” kakwakwikala anu umwepele to, kadi balaaba maanyi bààbúngì, “balaaba maanyi.” Nwamonu anyi?

<sup>25</sup> Mu mushindu mukwabo, bu Yèyè mwa kuswa kucisunsula bwa twètù kucyumvwaku bîmpè bipite, Yèyè uvwa mufwanyine kwamba ne: “Mu matuku a ndekeelu nekujuuke balaaba maanyi, baa mashimi.” Mpindyewu, aci cidì cimweka bu cidì kaciyiku mwa kwenzeka to, nwamonu's, myaku ya ne “balaaba maanyi.” Kadi monaayi anu myaku miine yidi yilonda ayi, “ne baprofeta baa mashimi,” b-a-p-r-o-f-e-t-a, ku búngì.

<sup>26</sup> Mpindyewu, *mulaaba maanyi*, ùdi, “muntu mwikale ne mukenji.” Nenuki mushindu umwepele udi mukenji mwa kutwadiibwawu nkudi ewu udi *mulaaba maanyi*, ne mwine awu mmufwanyine kwikala muprofeta, mulaaba maanyi, “nekujuuke balongeshi balaaba maanyi, baa mashimi.” Muprofeta udi uyiisha cidì mukenji wende. Balongeshi balaaba maanyi, kadi bantu balaaba maanyi biikale ne dilongesha dya mashimi. Balaaba maanyi, “ba-Kilisto,” ku búngì; “baprofeta,” ku búngì. Nenuki piikalaku cintu bu ne—ne “Kilisto,” ku bumwe, dîbà adi aba's bivwa bikèngela kwikalabo “balaaba maanyi,” ne ciprofeta cyabo cya bivwabo balongesha ki cidì cifwanyine kwenza dishiilangana, bwalu mbalaaba maanyi, balaaba maanyi.

27 Mpindyewu, ndileesona dya kalaasa kaa Dyalumingu, tudi baswe ku—kuteeta kufikisha cyôci eci ku diteetangana dilelela dya makanda, ku Mifundu, kacyi ku cidi muntu kampanda mukwabo mwambe pa bwalu abu to, kadi anu kubala kwa Mifundu nkaayaaku.

Udi mwa kwamba ne: “Ciine eci cidi mwa kwenzeka bishi’s? Balaaba maanyi biine aba mbafwanyine . . . Bavwa mbanganyi?”

“Ba-Kilisto,” b-a-K-i-l-i-s-t-o. “Ba-Kilisto balaaba maanyi, ne baprofeta baa mashimi.” Balaaba maanyi, kadi baprofeta baa mashimi!

Yesu wakamba, ne: “Mvula utu umacila baakane ne babi.”

28 Mpindyewu, muntu mmufwanyine kungambila ne: “Wêwê udi witabuujja ne dilaabiibwa didi pa bantu abu adi didi dyumvwija ne ndilaabiibwa dya Nyuma Mwîmpè anyi?” Eyowa’s, mukalenge, Nyuma Mwîmpè mushuwashuwale wa Nzambi pambidi paa muntu, kadi pende mwikale wa mashimi.

29 Mpindyewu teejaayi ne ntema nûmwè cyakambaYe. “Ne bôbô nebaleeje bimanyinu ne maalu a kukema, mu mushindu wa bifwanyine kuseeswisha Basungula biine bu ne bivwa mwa kwenzeka.” Nenu bôbô mbalaabiibwe ne Nyuma Mwîmpè mushuwashuwale ewu. Ndi mumanye ne eci cidi cimweka cikutakane cya menemene, kadi netwangate dîbà bwa kucyumvwija ne Dîyî, bwa ne cidi EMU MMUDI MUKALENGE WAMBA wa kakuyi mpatà to, Bulelela.

30 Mpindyewu tubuululaayi mu Bibles yetu, kasunsa kamwe cyanaana, mu Maataayi ku nshapita 5, biikale tubangila ku—ku mvensa wa 45, bwa tumone mpindyewu patudi tubala Mifundu eyi bwa tusunsa tukese etu apa. Nenu pashiishe, paanyima paa twêtù bamane kufika pôpô apa, mona’s, netunupe. . . Pa nanku nwênù, twêtù bapange kubala yônso ayi, nanku wêwê wangate Bible webe; nenu—nenu wêwê udi kabidi mwa kuyibala patwikala bamane kuumuka mwaba ewu ne nwênù baalukile kumbelu, nenu—nenu nubalaayi cidi Bible wamba pa bwalu abu.

31 Mpindyewu bwa kwangata dîbà, bwa kupeta bwalu bwa—bwa cishimikidi, bwalu mêmè ndi ngamba dîyî mwab’ewu diikale dikemesha. Mmunyi mudi Nyuma Mwîmpè mwa kulaaba mulongeshi wa mashimi? Kadi aci’s ncivwa Yesu mwambe ne necyenzeke.

Mpindyewu, Maataayi, nshapita mwi5, mvensa wa 45, tubalaayi mpindyewu. Twangataayi, tubangilaayi ndambu bu—bu badi bapingana paanyima paa yêyè awu, ku 44.

*Kadi Mêmè ndi nzwambila ne: Nunange beena lukuna beenu, nubeneshe aba badi banwela milawu, nwenzele badi banukina bîmpè, nusambidile aba badi banupectula, ne badi banukengesha;*

*Bwa numone mwa kwikala bânà baa Taatù wenu udi mu dyulu: bwalu yéyè utu ubàndisha dîbà dyende pa babi ne . . . bîmpè, ne utu utuma mvula pa baakane ne . . . babi. (Mvula utu ulokela babi mu mushindu umweumwe ne bîmpè.)*

<sup>32</sup> Mpindyewu bwa kutwangaja cyôci eci, ne ciprofeta cikwabo cidi citangila bwalu ebu, swayi tubuulule mu Ebelu ku nshapita mwi6, bwa mvensa udi ulondangana ne cyôci eci, mudi Pôlò uvulwija cintu cimwecimwe cidi Yesu mwambe eci. Pôlò, yéyè ngudi wakula mpindyewu ewu. Panucidi nwenda nucikeba apu. . . Nenku nwênù badi batelejila ku bisanji abu, seemejaayi Bibles yenu pamwe neenu ne dibeji dya mukanda, nukebe cyôci eci mpindyewu. Ebelu, nshapita mwi6, Pôlò mwikale ufundila beena Ebelu, ubaleeja mindidimbi ne bifwanyikijilu, ubuumusha ku cyena Yuda ubabweja mu bwena Kilsto, ubaleeja mushindu uvwa bintu byônsò bya kale biikale mindidimbi ya bintu bicivwa bilwa. Pôlò ngudi wakula ewu mpindyewu, Ebelu 6.

*Ki bwa cinyi biikale tushiya maalu a ku cibangidilu a dilongesha dya Kilsto (K-i-l-i-s-t-o, ku bumwe), tutungunukaayi too ne ku bupwangane; katuyi tuteeka kabidi bishimikidi bya kanyinganyinga . . . midimu mifwe, ne diitabuujia kudi Nzambi.*

*Bya . . . dilongesha dya mabatiiza, ne dya kutentekelangana kwa byanza, ne dya dibika dya bafwe, ne dya cilumbulwidi cya cyendeleele.*

*Nenku cyôci eci netûcyênzè, Nzambi mwa kwanyisha.*

*Bwalu kabyena mwa kwenzeka to bwa aba bàkaarwà bamana kukenkeshila musangu kampanda, ne bàkaadì balabule ku dipà dya ku dyulu, ne bavwijùbwe baabanyanganyi baa Nyuma Mwîmpè,*

<sup>33</sup> Ndi muswe kukokaku ntema yenu kakese. Nudi bamone anyi? Cidi “dipà,” kacyi “mapà, baabanyanganyi baa mapà a ku dyulu” to; kadi, “dipà dya ku dyulu,” ku bumwe; “Kilsto,” ku bumwe; “dipà,” ku bumwe.

*. . . dipà dya ku dyulu, ne . . . bavwijùbwe baabanyanganyi baa Nyuma Mwîmpè,*

*Ne bàkaadì balabule ku dî- . . . dîyì dya Nzambi, . . . (balabule ku cinyi?) . . . ku dîyì dya Nzambi, ne bukole bwa cikondo cicilwalwà,*

*Bôbò badishinde, bwa kudipingajabo cyakabidi bôbò biine ku kanyinganyinga, bu mudibi ne badi bapoopela cyakabidi bwabo bôbò biine Mwânà ya Nzambi pa nkuruse, biikale bamuzanjika ku bundu bwa patooke.*

*Bwalu, (teelejaayi) buloba . . . bûdi bûcnwa mvula udi ulwapu misangu yabûngi, bwa kutolweshwa bisekiseki*



*bidi ne dikwacisha bwa aba badibo babwakajila, budi bupeta mabenesh a kudi Nzambi:*

*Kadi ebu budi butolweshà mèbà. . . mingonga budi b Bengiibwe, ne budi pabwipi ne kwediibwa mulawu; ndekeelu wabu nkwohiibwa.*

<sup>34</sup> Mpindyewu fwanyikijaayaaku cyakabidi cyôci aci ne Maataayi 5.24. Monaayi, Yesu wakamba ne mvula ne muunya bidi bilwa pa buloba, ne Nzambi udi ubituma bwa kulngolola byakudya ne bintu bwa bantu baa pa buloba. Nenku mvula udi utumiibwa mbwa byakudya, bisekiseki. Kadi lupela, bisoosa bibi, bu mudibi paabi mu budimi amu, bidi bipeta cintu cimwecimwe aci. Mvula umweumwe udi ukolesha blé awu nyêye mvula umweumwe awu udi ukolesha bisoosa bibi.

<sup>35</sup> Mushindu mwine wûngâakapetâ dileesona pa cyôci aci musangu kampanda's we, pângâakapetanganâ ne beena Mpenta musangu wanyi wa kumpala! Nenku civwa ndileesona dinene bwanyi mêmè. Mêmè kumona bantu babidi, umwe. . . Kacya kumpala ncivwaku mwanji kuumvwa dyakula dya mu myakulu to. Umwe uvwa wakula mu myakulu, mukwabo uyandamuna, anyi bikudimuka. Nenku bavwa mwa kwamba bulelela, bamba ne: "Kudi bantu bàâbûngi munda emu badi ne cya kunyingalala diloolo edi. Kudi bakaji ne balume, bônso." Ne bantu bavwa bajuuka baya ku cyoshelu.

Mêmè kudyambidila ne: "Bya butumbi be!"

<sup>36</sup> Nenku pashiishe ne kaadipâ kakese kaa Nyuma Mwîmpè, mêmè kuyiikilangana ne bantu abu, anu, nudi bamanye's, mu dijingulula, kaamushindu kakese cyanaana kaa dijandula naaku's. Nenku umwe wa kudibo uvwa mwena Kilisto mushuwashuwale, mwikale musadidi mulelela wa Kilisto, kadi mukwabo awu uvwa mwena lubombo. Nenku umwe wa kudibo, wa bwena uvwa mwena lubombo awu, ùvwa musômbe ne mukaji wa nsuki mifiike, mwikale wenda masandi ne mukaji wa nsuki mitookoloke mulelel nende ne bânâ. Ee, aci ncivwa mu cikeena-kumona anu mwaba awu mene; kaciyi cya divila to. Ki mêmè kwakula nende pa bwalu abu. Yêye kuntangila kadi kuumuka e kunyungulukilaye kumfundu kwa nzubu.

<sup>37</sup> Mpindyewu mêmè kupeta cibwejàkâji, cya bushuwa eci. Paanyi ndyambidila ne mvwa mulwe munkaci mwa banjelo, kadi mêmè kubanga kudikonka ní ncivwa mulwe munkaci mwa badémons. Bwalu ebu buvwa mwa kwenzeka munyi? Ncivwaku mwa kubyumvwa to. Nenku munda mwa bidimu mêmè kwanji kuumusha mukolo wanyi mu bwalu abu, too ne dituku kampanda divwa. . .

George Smith, nsongaalume udi useesela mwanaanyi wa bakaji awu, tuvwa baye makeelela awu, lwà ku mwaba udi cyamu cya kale cya bukula kûntù nya kasambila aku.

<sup>38</sup> Ki paanyima paa mêmè mumane kwikalamu matuku ndambu, Nyuma Mwimpè kumvulwija Mufundu ewu: “Bwalu mvula utu uloka pa buloba misangu yâbûngì bwa kubwakaja ne bisekiseki, kadi mêmè ne mingonga biikàle ne mwoyi ku mvula umwèumwè awu, ne ndekeelu wabi nkwoshiibwa.” Biikale ne mwoyi ku mushimi mufidi wa mwoyi umweumwe wa Nzambi awu. Ki mêmè kushiisha kuumvwa ne: “Ku,” Yesu wakamba ne: “Ku mamuma abo nkudibo babamanyina.”

<sup>39</sup> Mpindyewu, ki bwa cinyi, mvula udi umata pa bukwamici bwa mu bufuki pa buloba ebu, ncimfwanyi cya mvula wa mu Nyuma udi ufila Mwoyi wa Cyendeleele, mwikale ulokela pa Ekeleeziya, bwalu tutu tumubiikila ne mvula wa mbedi ne mvula mushiishe. Nenku mmvula, mwikale upongoloka upatuka mu Nyuma wa Nzambi, ulokela pa Ekeleeziya Wende.

<sup>40</sup> Monaayi, ncintu cya cikemesha bikole mwaba ewu. Nwamonu anyi? Pààkayà mamiinu awu mu buloba, mushindu wakafikawu mwine amu nansha mwikale wa bishi, avwa mmêmè anu kwine kwônsò aku. Kadi mwaba awu blé wâkaya mu buloba awu, ne bisekiseki, bivwa mbisekiseki anu kwine kwônsò aku. Nenku cisekiseki cyônsò ciikàle civulangana, civulangana kabidi, civwa cileeja ne civwaku ku cibangidilu cya ku muji.

<sup>41</sup> “Nenku bôbò nebaseeswishe Basungula bu ne bivwa mwa kwenzeka,” bwalu badi bapeta mvula umwèumwè awu, dibenisha dimwedimwe adi, baleeja bimanyinu bimwebimwe abi, maalu a kukema anweamwe awu. Nwamonu anyi? “Nebaseswishe, anyi nebiikale ne cya kuseeswisha Basungula bu ne bivwa mwa kwenzeka.” Mpindyewu, dyêbà kadyena mwa kubenga kwikala dyêbà to, nansha blé pende kêna mwa kubenga kwikala blé to; ncivwa Mufuki wa cyônsò cya kudibi mulongolole ku cibangidilu. Ki Basungula mbôbò abu. Mvula umwèumwè awu!

<sup>42</sup> Dîbà didi dijuuka mu dinda ditangalaja nsèsà yadi pa buloba bujima, mudidi dyenze pa buloba ebu ne mu dituku ditudi ne mwoyi edi emu. Ne dîbà, dîbà dimwedimwe didi dijuuka ku Esete adi ndyôdi dîbà dimwedimwe didi dikabwela ku Wesete. Ne dîbà diine adi ndidi ditumiibwe bwa kubobesha lutete pa buloba, budi mibidi yetu miikale myenza naabu.

<sup>43</sup> Twètù aba tudi ne mwoyi ku bintu bifwe. Awu ki mushindu umwepele wûdi mwa kwikala ne mwoyi. Ne piikalabi bikengela bwa cintu kampana kufwaci dituku dyônsò edi bwa wèwè kwikala ne mwoyi, cya mu mubidi, nenku kî ncyà bushuwa ne piikalà wèbè— bikengela bwa mubidi wèbè wikale ne mwoyi ku bintu bifwe, bwa mwoyi wa mubidi, bwa mwoyi wa mu mubidi, pa nanku bidi bikengela bwa Cintu kampana kufwaci, mu nyuma, bwa kusungila mwoyi webe wa nyuma. Ne Nzambi, wakalwa cintu cya bälenga ne byanza, mubidi, ne wakafwa bwa twètù kwikala ne mwoyi. Kakwena ekeleeziya nansha

umwe, cintu nansha cimwe pa buloba cidi mwa kukusungila to pa kuumusha Nzambi. Ki cintu cimwepele cidibo ne mwoyi ku cyôci.

44 Mpindyewu londololaayi Mifundu. Yesu udi Dîyi. “Ku cibangidilu kwakadi Dîyi. Ne Dîyi dyakavwijiibwa mubidi ne dyâkasomba munkaci mwetu. Ku cibangidilu kwakadi Dîyi, ne Dîyi dyakadi ne Nzambi. Ne Dîyi dyakavwijiibwa mubidi, ne Yêyê wâkiikala ne mwoyi awu, wâkasomba munkaci mwetu.” “Ne muntu kaakwikala ne mwoyi anu ku dyâmpà nkaayaadi to,” bwa mubidi, “kadi ku Dîyi dyôsò didi dipâtukâ mukana mwa Nzambi.” Nenku, nudi numona, tudi ne mwoyi ku Dîyi, mbwena kwamba ne Nzambi.

45 Mpindyewu dîbà didi difila bwenzeji bwadi ne dibobesha lutete. Mpindyewu, kadyena mwa kulubobesha anu dyakamwe to. Padilu lwenda luya apu, lutangile ku diboba, ludi lwenda lutungunuka anu ne kuboba too ne padilu lukafika ku mwepu mu kaabujima.

46 Ki mudibi nanku, leelu ewu, ne Ekeleeziya. Wâkabanga mu bwânâ bwende, mwamwa mu cikondo cya mîdimà, muvwaye mwinshi mwa buloba. Wâkolù mpindyewu too ne ku diboba. Nenku tudi mwa kucimona, ne bupwangane bwôsò, mushindu udi Nzambi misangu yôsò ku bufuki . . .

47 Kwêna mwa kutompakaja bufuki to. Ki lutatu lùdiku leelu ewu ndwôlù alu. Tudi twela ma-bômbès muulu, ne mwamwa mu mbû, tubitaayisha ne babitudisha ne ma-bômbès a mushinda. Nudi anu munkaci mwa kutamba kutaayisha buloba abu misangu yôsò, nuâmacishilamù. Nudi nuupula mici; bipeepele bikole nebînwâmbùlè. Nwenza nkila pa musulu; s’newûlè upaasalale.

48 Bikengela nupete njila wa Nzambi wa dyenza maalu bwa nushaadilemu. Twêtù tudi bavwije bantu balwe mangumba mu maekeleeziya ne malongolodi; tangilaayaaku numone citudi bapete! Shaalaayi mu njila udi Nzambi mulongolole bwa cyôci aci.

49 Kadi, nudi numona’s: “Yêyê udi utuma mvula,” twalukilaayi ku cyena-bwalu cyetu, “pa baakane ne babi.” Yesu udi unwambila mwab’ewu mpindyewu, mu Maataayi 24 emu ne, neciikale cimanyinu ku cikondo cya nshiikidilu.

50 Mpindyewu, piikalabi ne cimanyinu eci cidi ne cya kumanyika anu ku cikondo cya nshiikidilu, nanku’s nebikengele bwa kwikalaci paanyima paa dikàngula dya Bitampi abi. Nwamonu anyi? Ncimanyinu cya nshiikidilu. Neciikale, pènzekâ maaluu aa, neciikale ku cikondo cya nshiikidilu. Ne neciikale cimanyinu, mpindyewu, bwa Basungula kabiikadi mu cibwejàkàji mu maaluu aa to. Nudi numona bwalu abu anyi? Nenku, bikengela cibuludiibwe, cileejiibwe patooke.

Monaayi, blé ne bisoosa bibi byônsò bibidi bidi ne mwoyi ku Dilaabiibwa dimwedimwe dya ku Dyulu adi. Bubidi bwabi bidi bisankila ku Dyôdi adi.

<sup>51</sup> Ndi mvuluka bwalu ebu, mwikale ngaalukila ku cileejilu eci cya dituku adi ku Green's Mill. Mêmè—mêmè kumona cikeena-kumona aci cipatuka. Nenku kuvwa buloba bunene, ne bavwa babusekunune bwônsò. Nenku kwakanji kupatuka Mumyaminyi, dyambedi. Ndi muswe kulama aci kumpala kwenu. Tangilaayi numone cidi cipatuka dyambedi, pashiishe cidì cìcilondà. Nenku anu mwàkapàtùkà Muntu udi muvwale bilàmbà bitooke ewu wenda unyunguluka buloba, wenda ukuna mamiinu amu, pashiishe paanyima Pende Yèyè paakalwa muntu, muvwale bilàmbà bifiike, ne mmwenekelu wa maalu a mwinshimwinshi menemene, wenda ùlamba paanyima Pende, wenda umyamina bisoosa bibi. Nenku pààkenzekà eci, dîbà adi mêmè kumona bikunyiibwa byônsò bibidi abi bitoloka. Nenku pààbangibi kutoloka, cimwe civwa blé ne cikwabo civwa bisoosa bibi.

<sup>52</sup> Ki kulwaku mushipu, pa dîbà adi, kumwenekabi bu ne, byônsò bibidi abi bivwa ne mitu miinyika byela mbila bilomba mvula. Pa dîbà adi kulwaku divuba dinene kuulu kwa buloba, ne mvula kulokaye. Ki blé kubandulukaye e kwamba ne: "Mukalenge atumbe! Mukalenge atumbe!" Ne bisoosa bibi paabi kutuutabi mikobolo ne: "Mukalenge atumbe! Mukalenge atumbe!" Bipeta anu byôbì bimwebimwe abi. Byônsò bibidi biikàle bipùnga ne lufu, byônsò bibidi biikàle bifwa. Ne dîbà adi blé ùbànda kadi kupeta nyoota. Nenku bu muvwabi ne mmu budimi bumwebumwe abu, lupangu lumwelumwe alu, mwaba umweumwe awu, mwinshi mwa kabeji kamwekamwe aku, kutolokaku blé ne kutolokaku lupela ku cintu cimwecimwe aci. Monaayi, màyi a dilaabiibwa dimwedimwe adi àdì àtòlweshà blé awu, ngadi atolweshà bisoosa bibi.

<sup>53</sup> Nyuma Mwîmpè umwèumwè udi ulaaba Ekeleeziya awu, udi ubapa dijingà dya kusungila misuuka awu, udi ubapa bukole bwa kwenza bishima awu, Yèyè awu udi upona pa babi mushindu umweumwe ne pa baakane. Nyuma umwèumwè awu! Mpindyewu, kwèna mwa kucyenza mushindu mukwabo kadi kuumvwa Maataayi 24.24 to. Mmwambe ne: "Nekujuuke ba-Kilisto baa mashimi," baa mashimi, balaaba maanyi. Balaaba ne Cintu cimwecimwe cilelela aci, kadi biikàle baprofeta baa mashimi baa Cyôci aci, balongeshi baa mashimi baa Cyôci aci.

<sup>54</sup> Ncinyi cidi cifwanyine kufikisha muntu ku dijinga kwikala mulongeshi wa mashimi wa cintu cidi ciikàle Bulelela? Mpindyewu netupweke tukafike ku cimanyinu cya nyama wa lwonji mu tusunsa tukese emu, nenku nenumone ne ndingumba. Nwamonu anyi? Balongeshi baa mashimi, mulaaba maanyi wa mashimi. Ba-Kilisto balaaba maanyi, kadi balongeshi baa mashimi. Ki mushindu umwepele unudi mwa kucimona.

<sup>55</sup> Byenze anu mudi mwab'ewu kukaadi cikondo kampanda, ntu muteele bwalu ebu. Ndi mufwanyine kubuteela bwalu tudi baswikakane ku nshinga mu ditunga dijima. Dituku dikwabo mvwa nyiikilangana ne mulunda wanyi kampanda, mwaba udi ebi bifika mu dinda emu, mu Arizona. Nenku yéyè uvwa ne ferme wa—wa mici ya madimà. Nenku uvwa ne mucu muntwamu mwikale mucu wa bimuma bya oranges ukwama bimuma bya mbòmà, ne madimà a mpusu, ne tundeleenyi, ne oranges ya mitwile mbidi. Kadi ngápù mwoyi búngì bwine bwa bimuma bishiileshiihangane bivwa ku mucu umwepele awu. Ki mêmè kukonka mu—mu—muntu awu, mêmè ne: “Mbyenzeke bishi nunku ewu? Mmuci wa mushindu kaayi mwine wawa?”

Yéyè ne: “Muci, wôwò mwine, mmuci wa oranges.”

Mêmè ne: “Mmunyi mudiwu mukwame bimuma bya mbòmà? Bwa cinyi mmukwame madimà a mpusu?”

Yéyè ne: “Mbisomeka mwômò amu.”

<sup>56</sup> Mêmè ne: “Ngũmvù. Ee, mpindyewu,” mêmè ne, “mpindyewu, cidimu cyavwa piikàla mucu awu mwa kukwama bimuma bikwabo,” bwalu byònsò nebibobe cikondo cimwe, mêmè ne, “pa díbà adi's newukwame anu bimuma bya oranges anu pa byòbì's. Piikalaci ne mmuci wa oranges ya myúfu, s'newukwame bimuma bya oranges ya myúfu, kî mmwômò anyi, mukalenge?”

Yéyè ne: “To, mukalenge. Ditamba dyònsò dídì disomeka nedikwame bilondeshile mushindu wadi.”

Mêmè ne: “Udi uswa kwamba ne ditamba dya didimà dya mpusu adi nedikwame madimà a mpusu ku mucu wa oranges awu anyi?”

Yéyè ne: “Eyowa's, mukalenge.”

“Dya mbòmà paadi nedikwame bimuma bya mbòmà anu ku mucu wa oranges awu anyi?”

Yéyè ne: “Eyowa's, mukalenge. Aci's nngiikadilu wa ditamba dídì diikàle disomeka mwômò adi.”

Mêmè ne: “Butumbi kudi Nzambi's we!”

Yéyè ne: “Udi muswe kwamba cinyi?”

Mêmè ne: “Lukonko lukwabo lumwepele. Mpindyewu, mucu wa oranges awu wadyakukwamaku kabidi bimuma bya oranges anyi?”

<sup>57</sup> Yéyè kwamba ne: “Paapatulawu ditamba dikwabo.” Paapatulawu ditamba dikwabo, pa kuumusha didi disomeka mwômò adi to. Kadi, ònsò mmadimà, kadi adi ne mwoyi ku mwoyi wa didimà udi ufumina mu mucu wa madimà awu.

<sup>58</sup> Mêmè ne: “Kadi's ki bwalu abu! Dya ba-Méthodistes nedipatule ba-Méthodistes, musangu wònsò. Dya ba-Baptistes nedipatule ba-Baptistes, musangu wònsò. Dya Katolike

nedipatule beena Katolike, musangu wònsò. Kadi Ekeleeziya wa Nzambi udi ne mwoyi neapatule Kilisto byumukile anu ku muji, Dîyì musangu wònsò, bu yêyè anu mwa kupatula dikwabo ditamba Dyende yêyè mwine.”

<sup>59</sup> Mpindyewu, udi mwa kucisomeka muntwamu, udi umona’s. Dyònsò dya mbòmà, dya madimà a mpusu, dya oranges ya mbidi mitwile, dya tundeleenyi, nansha bimuma bya madimà kaayi, cyònsò cya kudibi cidi mwa kwikala ne mwoyi mu mucu awu; kadi ciikàle cifila bujaadiki bwa mashimi bwa mucu awu, ciikàle ne mwoyi ku mucu awu. Nudi numona bwalu abu anyi? Bidi ne mwoyi ne bitancila pa mwoyi mulelela udi munda mwa mucu awu.

<sup>60</sup> Mpindyewu, ki Maataayi 24.24 nyêyè awu, biikàle ne mwoyi ku Mwoyi umweumwe awu, kadi kabavwa baa cya bushuwa to, anu kwine kwònsò aku. Badi bafila bujaadiki bwa mashimi bwa Muci awu! Mmuci wa oranges, kadi mmuci wa didimà. Kadi bôbò badi bamba ne: “Ekeleeziya ewu, dingumba edi didi difila bujaadiki bwa Kilisto.” Cibì biikale ne dibatiiza dya mashimi, bujaadiki bwa mashimi bwa Dîyì, bateeta bwa kwamba ne bukole bwa Nzambi buvwa anu bwa bayiidi nkaayaabo anyi?

<sup>61</sup> Yesu, Yêyè mwine, wakamba ne: “Ndaayi pa buloba bujima nukayiishe Evanjeeliyo kudi ditamba dyònsò diikalàku. . . mucu wònsò wikalàku mwa kukwama, ditamba dyònsò dyatoloka ku mucu adi. Kadi bimanyinu ebi nebifile matamba malelela.” Too ne penyi? Dìbà dyònsò diikalaci Muci adi, dìbà dyònsò dyapatulaWu matamba adi, too ne ku nshiikidilu wa buloba. “Mu Dìnà Dyanyi nebiipate badémmons; nebaakule myakulu mipyamipya; nebakwate nyoka ne byanza; nebanwe bintu bidi bishipangana; nebatentekele babeedi byanza ne babeedi nebasangale.” Nudi numona dìbà ditudi ne mwoyi anyi? Nudi numona cyàkambà Yesu anyi?

Vulukaayi ne, eci civwa nku cikondo cya nshiikidilu, kì nkale mu cikondo cya Wesley kale wawa to. Mpindyewu, ku cikondo cya nshiikidilu, nkuvwa cyôci eci ne cya kwenzekela.

<sup>62</sup> Mpindyewu tangilaayi Mifundu; Yôyì yifile bujaadiki. Yesu wakamba ne: “Kenketaayi Mifundu, bwalu mu Yôyì mmunudi nwela meeji, anyi nwitabuujja ne, nudi ne Mwoyi wa Cyendelele, kadi Yôyì’s ki Yidi yimfidila Mêmè bujaadiki.” Mu ngaakwilu mukwabo, mucu ewu mudidinge anu mupatule ditamba. . . “Mêmè ndi mucu wa Mvinyo, Muci; nwênù nudi matamba. Ewu udi ungiitabuujja Mêmè, byenzedi bìndì Mêmè ngenza yêyè neàbyènzè pende,” Yone Munsantu 14.12.

Mpindyewu: “Ewu udi ushaala munda Mwanyi, ewu udi. . . uvwa mu muji Wanyi ku cibangidilu awu.”

<sup>63</sup> Ki bwa cinyi Yesu uvwa byònsò bibidi Muji ne Mutoloku wa Davidi. Yêyè uvwa kumpala kwa Davidi, mu Davidi, ne paanyima paa Davidi, byònsò bibidi Muji ne Mutoloku wa

Davidi; Mutooto wa mu Dinda, Rose wa Shalona, Mbata wa mu Cibanda, Alpha ne Omega; Taatù, Mwànà, ne Nyuma Mwimpè. “Munda Mwende mmudi musòmbèle kaabujima kaa Bunzambi mu ciikadilu cya mubidi.” Byònsò bibidi Muji ne Mutoloku bya Davidi!

<sup>64</sup> “Ewu udi mwikale Mwoyi musungula, Mwoyi mudyanjila kulongolola, mwikale munda Mwanyì,” ne Yèyè udi Dîyi, “kacya ku cibangidilu; paapatukaye, neakwame mamuma Aanyi.” Yone Munsantu 14.12.

Kadi bakwabo nebiikale ne mwoyi ku cintu cyôci cimwecimwe aci, badibiikila ne mbeena Kilisto ne beena kwitabuuja. “Kî ng’ewu yònsò udi wamba ne: ‘Mukalenge, Mukalenge,’ wâbwela nansha.”

Mpindyewu, eci cidi ne cya kwenzekela ne kumweneshiibwa mu matuku a ndekeelu, “pîikalà maalú masokoka a Nzambi ne cya kujika,” bu mutwikala mwa kukufika paanyima ndambu.

<sup>65</sup> Mici eyi, mvinyo mulelela ne mvinyo wa mashimi! Nukaadi bangumvwe nyiisha pa cyôci aci kukaadi, kukaadi bidimu, mudiyi mikolele kaaba kamwe. Mémè kuyitwala mu bantu-nkàâyà ne kuleeja cyôci aci, kwangacila ku Kaayina ne Abele, mici yibidi ya mvinyo yàkatuutakeenà ku cyoshelu kampana ayi; bònsò babidi batendeleedi, bònsò babidi balaaba maanyi, bònsò babidi bajinga mwoyi, ne biikale bakuukwila Nzambi umwe. Kadi umwe wakabengiibwa ne mukwabo wakaanyishiibwa.

<sup>66</sup> Ne mushindu umwepele uvwa ewu wàkaanyishiibwa awu mwa kwikalaku mwenze cintu kampana cishiilangane ne cya mwanaabo, cyakamubuuludiibwa. Bwalu Bible mmwambe ne: “Ku diitabuuja. . .” Ebelu, nshapita wa 11: “Ku diitabuuja Abele wakalambula Nzambi mulambu mutambe wa Kaayina bwimpè, ki Nzambi kufila bujaadiki ne yèyè uvwa mwakane.”

Yesu, wakamba ne, ndibuulula dya nyuma dya ne Yèyè uvwa Nganyi! “Bantu badi bamba ne Ndi nganyi Mémè Mwànà wa muntu?”

Yèyè ne, Peetelo kwamba ne: “Udi Kilisto, Mwànà wa Nzambi udi ne mwoyi.”

<sup>67</sup> “Udi mubeneshiibwe, Simona—Simona, mwànà wa Yona; kî mmubidi ne mashi bidiku bikubuulwile eci to. Taatù Wanyi udi mu Dyulu ngudi mucibuulule. Pa lubwebwe elu ki pângiibakilà Ekeleeziya Wanyi,” (cinyi?) dibuulula dilelela dya Dîyi. Ki mucu wa Mvinyo mulelela cyakabidi ngwôwù awu. “Abele, ku diitabuuja!”

Wèwè wambi ne: “Kacivwa dibuulula to.”

<sup>68</sup> Diitabuuja ncinyi? Diitabuuja ncintu cikubuulwila; kaciyi cyanji kwikalaku to, kadi wèwè mwikale witabuuja ne

neciikaleku. Diitabuuja ndibuulula dya diswa dya Nzambi. Pa nanku, ku dibuulula!

<sup>69</sup> Ne ekeleeziya leelu ewu kayena nansha yitabuuja dibuulula dya nyuma to. Yidi yôyi yitabuuja dilongesha dya mêyi madiswikila dya kudi ndongolwelu kampanda. “Ku dibuulula Abele wakalambula Nzambi mulambu mutambe wa Kaayina bwîmpè, ki Nzambi kufila bujaadiki ne yêyè uvwa mwakane.” Amen. Ndi ntekemena ne nudi numona aci. Nudi numona mwaba utudi ne mwoyi anyi? Nudi numona dîbà anyi?

Abidi adi panshi aa mvwa nyiikilangana ne—ne muntu mujaalame mukwabo, mwena Kilisto mumanyi wa dibàla ne mujaalame. Yêyè ne: “Mukalenge Branham, twêtù tudi tubenga mabuulula ônsò.”

Mêmè ne: “Nanku’s bikengela nubenge Yesu Kilisto, bwalu Yêyè udi dibuuludiibwa dya Nzambi, Nzambi mubuuludiibwe mu mubidi wa buntu.” Paudi kuyi ucimona to, udi mujimine.

<sup>70</sup> Yesu wakamba ne: “Nwênù kanuyi nwitabuuja ne Mêmè ki Yêyè awu to, nenufwe mu mpekaatu wenu.” Yêyè udi dibuuludiibwa dya Nzambi, Nyuma wa Nzambi mubuulula mu mmwenekelu wa buntu. Pawikala kuyi mwa kwitabuuja aci to, udi mujimine. Panwikala nuMuteeka bu mupersona mwisâtù, mupersona mwibîdî, anyi nî mmupersona kaayi yônsò ku luseke lwa Nzambi, s’nudi bajimine. “Nwênù kanuyi nwitabuuja ne Mêmè ki Yêyè awu to, nenufwe mu mpekaatu yenu.” Dibuuulula!

<sup>71</sup> Kabyena bikemesha to muvwabo kabayi mwa kuMumona. “Muntu nansha umwe kêna mwa kulwa Kûndî to padi Taatù Wanyi kayi mumukoke. Ne bônso badi Taatù muMpe,” mu miji’s, “nebalwe Kûndî.” Nwamonu anyi? Nwacyûmvù anyi? Kaa, mushindu mwine uvwabi bikengela twêtù kuMunanga’s we, kuMukuukwila, kuMutumbisha; pa kumona mamuma a Nyuma mu matuku a ndekeelu, ne Muci-Mukaji-musela munkaci mwa kuboba mu katongobela kaa cikondo!

<sup>72</sup> Muci wa mvinyo mulelela ne mucu wa mvinyo wa mashimi, yônsò yibidi yivwa ne dilaabiibwa dimwedimwe adi. Mâyî mmamacile pa yônsò yibidi. Kabyena bikemesha to mwakatudimwijaYe ne: “Mbifwanyine kuseeswisha Basungula mene bu ne bivwa mwa kwenzeka.”

Monaayi, badi ne mmwenekelu wa mwomumwe. Mbalaabiibwe ne dilaabiibwa dya mwomumwe. Kadi monaayi: “Ku mamuma abo . . .” Udi ucimanya munyi?

<sup>73</sup> Udi umanya munyi ne cyacya kî ng’orange? Bwalu ncikwame cimuma cya mbòmà. Ditamba adi didi anu dîmpè, didi ne mwoyi mu mucu awu, kadi didi dikwama cimuma cya mbòmà. Kî ndifwanangane ne dya kumpala adi to.

<sup>74</sup> Nenku pîikalà ekeleeziya kampanda wamba ne badi “biitabuuja Yesu Kilisto umwèumwè awu makeelela, leelu,



too ne kashidi,” kadi bavila Bukole Bwende, bavila byenzedi Byende, bavila Dîyi Dyende; byôbi ne—byôbi ne. . . Ekeleeziya udi witabuuja Yesu Kilisto, neénzè byenzedi bya Yesu Kilisto, neikale ne Mwoyi wa Yesu Kilisto. Kadi byôbi kabiyi nanku to, nansha byôbi ne Mwoyi udi upongolokela mu yêyè awu bishi; yêyè kayi mudyanjila kulongolola, kacya anu ku miji, neikale ukwama bimuma bya mbòmà musangu wônsò, anyi cintu kampanda cya cishiilangane. Kadi cyôci Mwoyi wa mudyanjila kulongolola, mu miji, neakwame Yesu Kilisto umwèumwè awu makeelela, leelu, too ne kashidi, piikalaci n’Dîyi didi dyenda dibàndila mu Muji. Bwalu, Yêyè m’Muji awu, cibangidilu cya bikondo.

<sup>75</sup> Monaayi, kadi cidibo bapatula ki cidi cikwambila ne dishiilangana ndyôdi edi. “Ku mamuma abo,” mwakamba Yesu, “ki kunwabamanyina.” “Muntu katu upoola tumuma twa mvinyo ku mungonga to,” nansha byôbi ne mungonga udi mu mucu wa tumuma twa mvinyo menemene. Mbifwanyine anu kwenzeka, kadi cimuma ki cyàmbà bwalu.

<sup>76</sup> Mamuma ncinyi? Dîyi, mamuma bwa muv-. . . mamuma bwa muvù. Ki cyôci aci, dilongesha dyabo. Dilongesha dya cinyi? Dilongesha dya muvù, dibà ditudi. Ndilongesha dya bantu, dilongesha dya cyena mangumba, kadi, anyi n’Dîyi dya Nzambi bwa muvù awu?

<sup>77</sup> Mpindyewu, dibà diyaaya lubilu be, cyanààna tuvwa bafwanyine kushaalapu mukùngùlù muleemule. Kadi ndi mutwishiibwe ne nwênù badi apa aba, ne ndi mutwishiibwe ne nwênù badi eku ne eku kwa ditunga abu, nudi mwa kumona cîndi nteeta kunwambila aci, bwalu katwena ne dibà dipitepite bûngi dya kushaalapu to.

<sup>78</sup> Kadi nudi mwa kumona ne Dilaabiibwa didi diya pa babi, balongeshi baa mashimi, ne didi dibafikisha ku dyanza anu menemene cidi Nzambi mubàmbile ne kabenji aci; kadi bôbò nebàcyènzè anu kucyenza, nansha bishi. Bwa cinyi? Kabeena paabo ne cidibo mwa kwenza to balume neebe. Mmunyi mudi mungonga mwa kwikala cîngà cintu cidi kaciyi mungonga? Nansha bamyaminepu mvula mulenga bûngi bishi, ùdi yêyè ne cya kwikala anu mungonga. Ki bwa cinyi Yesu wakamba ne: “Nebitambe kufwanangana mu mushindu wa bifwanyine kuseeswisha ne Basungula mene,” badi mu miji, “bu ne bivwa mwa kwenzeka,” kadi kabyena mwa kwenzekaku to. Blé kèna ne cikwabo cidiye mwa kwenza to anu kukwama blé; ki cyônsò cidiye yêyè mwa kukwama.

<sup>79</sup> Monaayi. Nwavulukaayi ne, Nzambi kî mmwenji wa bulongolodi nansha. Dyabulu ki mwenji wa bulongolodi. Ntu mujaadikejaadike cyôci aci ku Dîyi, ntwà kumpala ntwà paanyima, ciine aci misangu ne misangu; kabyakukengela bwa mbwelemu mu dinda emu to. Tudi bamanye ne Nzambi kacya

katuku mwanji kusangisha bantu mushindu awu kubavwija bulongolodi, kwenza bulongolodi kampanda to. Nkama ya bidimu paanyima paa lufu lwa muyiidi wa ndekeelu, kumpala kwa kabayiku banji kupeta bulongolodi bwa kumpala abu. Bitu bijaadikiibwe misangu yònsò anu ne ndilekela dya kashiba e kwela cyâlà. Piikalabi kabiyi nanku, mbwa cinyi katwena badisangishe mu dinanga leelu ewu, ba-Méthodistes, ba-Baptistes, ba-Presbytériens, beena Katolike ne bakwabo bònsò? Bwa cinyi byenzi bya Nzambi kabiyi bitushindikija kabidi, ekeleeziya ne ekeleeziya pa cintu cimwecimwe aci, Dìyì? Bintu bidì bitàpululà bantu abi, bwànà bwetu. . . Tukaadi kule ne Nzambi kutamba mutuvwa kacya kwònsò eku, maekeleeziya's, ki àndi ngamba aa.

<sup>80</sup> Mpindyewu, batu batwàmbile ne: “Maalu ónsò a kale awu akenzeka bu bileejilu, bu dilongesha kutudi, ditandisha, mibelu.” Bidi ne, maalu ónsò a kale àkenzekà mu Dipungila Dikulukulu awu avwa mmindidimbi, bwa kumona ne ncinyi civwa mwa kwikala mu Dipungila Dipyadipya, mu dituku dyetu twètù.

<sup>81</sup> Byenze anu bu ne kutu mwanji kumonaku cyanza cyebe to, kadi ubanduluka umona mundidimbi ku cimanu, mudi cyanza cyanyi cifwanyine kwikala padibo batwepu bukênkè apu. piikalaci ne minu yitaanu mu mundidimbi emu, (ùdì mwikale ciibùlòjì ewu), nenku useemeja byanza byebe, (biikale ne ki cintu mene), uciseemeja ku—ku ciibùlòjì aku, bikengela cifike ku diikala ne minu yitaanu.

<sup>82</sup> Bu mudi Bible utwambila, ne: “Dipungila Dikulukulu diikàle mundidimbi, cifwanyikijilu cya bintu bipyabipya, anyi cya bintu bicivwa bilwa; kabiyi bintu byena diinà to, kadi biikale mundidimbi, cifwanyikijilu cya bintu bicilwalwà.”

<sup>83</sup> Twànji twalukilaayibi cyanyima bwa kumona cintu eci ní cikaadiku cyenzeke mu cikondo cikwabo kampanda. Nudi baswe anyi? [Disangisha didi dyamba ne: “Amen.”—Muf.] Pa nanku netumanye, bwa kujaadika cyôcì eci, tutwa kumpala tutwa paanyima, ku Dìyì; kabiyi ku mmwenenu wa muntu kampanda, ku dilongesha kampanda dikwatakaja to.

<sup>84</sup> Nansha yèyè awu mwikale nganyi; muntu kampanda mukwabo ní nganyi ní nganyi, mèmè mwine ewu anyi kampanda mukwabo: “Yèyè kayi wakula bilondeshile mikenji ne baprofeta to, kakwena Bukênkè munda mwende to.” Nudi numona anyi? Aci ncidi Bible mwambe. “Dìyì dya muntu yònsò diikalè mashimi, kadi Dyanyi diikale dilelela,” katuyi tutangila ne nganyi mwine awu to.

Mpindyewu twalukilaayaaku cyanyima bwa kujandula ne cyôcì eci cikaadiku cyenzeke anyi, bwa kutuleeja cileejilu.

<sup>85</sup> Tudi mwa kwalukilaayi mpindyewu mu Mukanda wa Ekesoode, bwa kwakula bwa muntu dyende Mòsà, uvwa mwikale

muprofeta mulaaba maanyi mutuma kudi Nzambi, mwikale ne Diyì dya Nzambi ne diswa dya Nzambi bwa lukongo lwende. Bu mutubi ne Diyì dya Nzambi ditu misangu yònsò dyenda diya anu mu ntungunukilu, Yèyè mmwambe ne: “Kavwa wenza cintu nansha cimwe pavwaYe kayi wanji kuCibuulwila dyambedi baprofeta Bende to.” Pa dîbà adi ki pavwaYe ucyenza. Uh-huh.

Mpindyewu, Yèyè kèna mwa kushima nansha. Kèna mwa kushima kadi kwikala Nzambi to. To, mukalenge. Bikengela Yèyè ashaale ne lulamatu. Munda Mwende kamutu dishima nansha dya kânà to. Udi . . .

<sup>86</sup> Kabidi Yèyè kèna mwa kuCishintululaku to. Yèyè muCishintulule, dîbà adi Kèna Nzambi to; m’Mwenze cilema. Bikengela kwikalaYe kayi ne mikalu to. Ne wa kayi mikalu kèna mwa kwenza cilema to. Nwamonu anyi? Nenu cyònsò cidi Nzambi wamba, ncyà bushuwa Cyendelele. Nwamonu anyi? Ne Yèyè ngudi mulaye cyôci aci. Pa nanku, tangilaayi, kakwena mwaba nansha umwe mu Bible udici kaciyi cilonda ntungunukilu ciya buludi too ne ku cyôci aci to.

<sup>87</sup> Mpindyewu, Nzambi ukaavwa mulaye Abraham ne dimiinu dyende nediikale dyenyi mu—mu ditunga dyenyi munda mwa bidimu nkama yinaayi, pashiishe Yèyè nealwe kudipatula ne cyanza cinene cya bukole ne ngulu, kuleeja bimanyinu Byende ne maalu a kukema munkaci mwa bantu bavwabo mwa kwikala basòmbe naabo abu. Cikondo cya mulayi e kuseemenaci. Bantu bakaavwa bamane kucipwa mwoyi. Bavwa ne Bafaalesa ne Basadoka, ne bakwabo, mangumba’s. Kadi, dyakamwe, Nzambi kulwa paa nkaayende mwikale muditole, pambelu, kule ne yònsò wa kudibo.

<sup>88</sup> Nzambi kacypu, nansha mu dituku kaayi anyi mu cikondo kaayi, katu mwanji kubiikilaku muprofeta umupatwila mu dingumba to. To, mukalenge. Wa nanku’s mmukonyangale mu mushindu wa ne, kî mmufwanyine kucyenza to; mmufwanyine kwikala mwenzejiibwe bwa kushaala ne dingumba adi.

<sup>89</sup> Mòsà, muntu mutuma kudi Nzambi, mwikale ne Diyì dya Nzambi, ne mu njila wende bwa kuya kabweja Izaleela mu buloba bulaya, mwikale kalamandindi ne mukenji wa Nzambi, kutuutakeenaye ne muprofeta mukwabo, mulaaba maanyi mukwabo mwikale ne dilaabiibwa dilelela dya Nyuma Mwîmpè umweumwe uvwa pambidi paa Mòsà awu. Ncyà bushuwa. Yèyè awu’s uvwa muprofeta. Nyuma Mwîmpè uvwa pambidi paa mulumyana awu. Dînà dyende uvwa m’Baalama. Twètù bònsò tudi bamumanye bîmpè. Ee, bintu biine, bimwebimwe abi, bintu—bintu byakambà muntu awu abi, bicidi anu munkaci mwa kwenzeka, bya kukaadi bidimu bitwe ku binunu bibidi ne nkama mwandamukulu. “Udi mwenze bu kabalu kaa lusengu lumwe, Wèwè Izaleela. Ewu yònsò wâkubènesha awu neabeneshiibwe. Ewu yònsò wâkwela mulawu awu neediibwè mulawu. Dyebe

dikanda, ne bwebe bukole, mushindu mwine udi yebe ntenta myakane's we, Wèwè Yakobo!" Nudi numona's, kavwa pende ne cikwabo cya dyenza to. Pende's uvwa mulwe kuntwaku mupangadike mu mwoyi wende bwa kwelaye cisamba aci milawu.

<sup>90</sup> Kaa, nwênù balongeshi baa mashimi bàdì munkaci mwa kuteeleja mikaba ya mèyì eyi bidimu byònsò ebi, ne numona Nzambi ushindika anu menemene cyakambaYe, peenu basòmbè mu bìrò byenu bamanye ne m'Bulelela; kadi anu bwa mashiilangana a cyena mangumba anudi naawu awu, nudi nubyela mpatà kadi kwambila bantu beenu abu ne kabyena nanku. Dyakabi dyenu! Dìbà dyenu dikaadi pawìpi menemene.

<sup>91</sup> Baalama, mulaaba ne Nyuma umwèumwè uvwa pambidi paa Mòsà awu. Dishiilangana divwa pa cinyi? Dilongesha dya Mòsà divwa dipwangane. Bible udi wamba mwab'ewu mu Peetelo Mwibìdì ne, civwa "ndilongesha dya Baalama" divwa Izaleela mwakidile, divwa Nzambi kayiku mufwe luse to. Mpekaatu uvwa kayi mwa kufwidiibwa luse! Nansha umwe wa kudibo kaakasungidiibwaku to, nansha mwakapatukabo biikale mwinshi mwa mabenesha a Nzambi, ne bamone cyanza cya Nzambi cikwata mudimu kudi muprofeta wa bukole ewu, ne bacimone cishindikiibwe anu menemene kudi Nzambi. Nenku, bwalu, muprofeta mukwabo wakabwela ne dilongesha kampana, dibengangane, mwikale welangana mpatà mikole ne Mòsà, ne mwikale uteeta bwa kujaadikila bantu ne Mòsà uvwa mu ntupakanyi. Nenku Daatana, Koola, ne bààbùngì baa kudibo, kutwabo ku cyende kadi kulongesha bânà baa Izaleela bwa kwendabo masandi, bwa kulondabo bulongolodi bwende, ne: "Tudi bònsò bamwe."

"Nansha twètù biikale ba-Méthodistes, ba-Baptistes, ba-Presbytériens, anyi beena Mpenta, ne bakwabo, tudi bònsò bamwe."

<sup>92</sup> Katwena bamwe nansha! Nudi cisamba citapuluke, cya cijila bwa Mukalenge, cilambula ku Dìyì ne Nyuma wa Nzambi, bwa kukwama mamuma a mulayi Wende wa dituku edi. Nenku kanwena baa ku bòbò nansha! Ndi mumanye ne aci ncikole cipange ne mwa kukola, kadi m'Bulelela anu bwetu bwa bushuwa ebu. Balambula ku mudimu mu matuku a ndekeelu aa! "Patukaayi munkaci mwende."

<sup>93</sup> Mpindyewu, "dilongesha dya Baalama," kî nciprofeta cya Baalama to. Aci civwa cìmpè. Aci civwa n'Nzambi. Mbanganyi badi biitabuuja nanku? [Disangisha didi dyamba ne: "Amen."—Muf.] Ciprofeta cya Baalama civwa cilelela menemene, bwalu kavwa mwa kwamba cìngà cintu to. Dilaabiibwa dya Nzambi kadivwa mwa kwamba cìngà cintu to, kabidi Nzambi kucishindika pa kujaadika ne civwa Bulelela. Kadi civwa "ndilongesha dya Baalama."

Mpindyewu fwanyikijaayaaku aci ne Maataayi 24.24. Balaaba maanyi, kadi dilongesha dyabo diikàle dya mashimi. Bintu bya busatu, ne bintu byònsò bya mushindu awu abi; bya mashimi, bifwilakanyi ne Kilisto!

<sup>94</sup> Ndi ntekemena ne ncyêna nnutapa ku mwoyi to. Nenku kanukangiku aci to, kanukangiku ma-telephone awu to. Ne kanujuukuku nwapatuka to. Sòmbaayi anu bapuwe, nenku tumonaayibi ní Nyuma Mwimpè kaakutubuulwilaci, ne kutujaadikilaci. Wêwè udi wamba ne: “Kadi aci...” Cyònsò ciwikala witabuuja aci, sòmba wêwè anu mupuwe uteeleje. Ne lomba Nzambi akangule mwoyi webe, pa dîbà adi neujandule ne udi lupela, anyi mungonga, anyi mwaba kana wònsò wûdi mwimanyine awu. Nwamonu anyi?

<sup>95</sup> Mpindyewu, nansha Yudaasa mwine, “mudyanjila kulongolwela dipiila muvwaye amu,” s’wàkasòmba mwaba awu kumpala kwa Yesu. Ki Yesu kumwambila ne: “Ngwêwè. Cyònsò ciwikala mwa kwenza, ne cyònsò cidi cikengela bwa wêwè kwenza aci, nda ùkacyènzè lukasa.” Yêyè mumanye civwaye wenza, kadi, bwa binjanja makumi asatu bya mfranga abi, ne bwa dimanyika, kupaanaye Mukalenge Yesu Kilisto. Umwe wa ku bayiidi Bende, mulami wa cibucilu cya ekeleeziya, Yesu umubiikila bu “mulunda” Wende. Nwamonu anyi? Bible mmwambe ne: “Wakalediibwa mwânà wa kabutu,” anu mwakalediibwa pende Yesu mwikale Mwânà wa Nzambi amu. “Kuseeswisha Basungula mene bu ne bivwa mwa kwenzeka.”

<sup>96</sup> Monaayi ne ntema patudi tutungunuka ne kulonga apa. Netwangate cileejilu cikwabo, mu Mukandà wa Bakalenge. Kuvwa mu—muprofeta, dyende uvwa Miika. Ûvwa mwânà wa Imla, kadi ùvwa muprofeta. Ki civwaye.

<sup>97</sup> Kadi nyawu kuvwa mukwabo muprofeta, mfumu wa bulongolodi kampanda bwa baprofeta, balaaba maanyi. Bible mmwambe ne bavwa “baprofeta,” anu mushindu umweumwe udiYe mwambe ne Baalama uvwa muprofeta awu, balaaba maanyi.

Nenku kuvwa umwe wabo dyende dînà uvwa Miika, uvwa mulaaba maanyi kudi Nzambi ne mutuma kudi Nzambi, mwikale ne Dîyi dya Nzambi.

<sup>98</sup> Kuvwa mukwabo, Zedekiya, uvwa udyambidila ne uvwa mutuma kudi Nzambi. Ûvwa mulaaba maanyi kudi Nzambi, kadi dilongesha dyende diikàle dibengangane ne Dîyi dya Nzambi. “Nekujuuke, ba-Kilisto baa mashimi, nebaleeje bimanyinu binene, bafwanyine kuseeswisha Basungula mene bu ne bivwa mwa kwenzeka.”

<sup>99</sup> Monaayi, bònsò babidi, bònsò babidi balaaba maanyi. Mpindyewu, mmunyi mùdì mufwanyine kwamba uvwa mu bulelela, ne uvwa mu mashimi? Tangilaayi civwa Dîyi dilaye Aakaba. Muprofeta ukààvwa mumudyanjidile awu, uvwa

ng’Eliya, umwe wa ku baprofeta baa batambe bunene baa cikondo ciine aci, uvwa muprofeta mushindika. Muprofeta mushindika awu wakamba, ne: “Bwalu Aakaba mmwenze bubi ebu, mbwa yivwa ne cya kulaka mashi ende; bwa dishebeya dya Naabota. Kabidi ne mbwa yivwa ne cya kudya Izabela, ne . . . mubidi wende uvwa mwa kwikala bufukà mu madimi.” Mpindyewu, mmunyi mùdì mwa kubenesha cidì Nzambi mwele mulawu? Anyi mmunyi mùdì mwa kwela mulawu, mwakamba Baalama, cidì Nzambi mubeneshè? Nwamonu anyi?

<sup>100</sup> Kadi baprofeta aba bavwa ne meeji matooke. Kakuvwa mpatà bwa ne bavwa bantu bimpè to, bantu baa kuneemekiibwa. Bwalu, bwa kwikala muprofeta mu Izaleela, udi ne cya kwikala wa kuneemekiibwa, anyi mene bwa kwikala mwena Izaleela. Uvwa washiibwa mabwe, byôbì kabiya nanku to. Bavwa bantu baa kuneemekiibwa. Bavwa bantu baa meeji matwe. Bavwa bantu balonge tulaasa. Bavwa bantu basobola kudi Aakaba, baa mu ditunga amu. (Wamonu aci anyi, Mwaneetu wa bakaji Wright?) Bantu basobola baa mu ditunga, bakumbane menemene bwa bump- . . .

Ki mpindyewu, paakamona Miika cikeena-kumona cyende aci, ùvwa mumanye mu mwoyi wende ne Dìyì dikaavwa dyambe cinyi, kadi ùvwa ukeba kumanya civwa Nyuma uvwa munda mwende mufwanyine kwamba.

<sup>101</sup> Ki bôbò kumwambila, bamba ne: “Wámbe peebe anu cintu cimwecimwe cidì baprofeta bakwabo aba bamba aci. Nenku pawàcyàmbà, mona’s, newikale, netukubweje mu bwobumwe, cyakabidi, kakuyi mpatà to. Wamonu anyi? Netukuvwije umwe wetu. Netukwaluje mu dingumba dyetu. Wêwè nyawu utu. . . Tudi bamanye ne udi muprofeta, kadi wêwè misangu yebe yônsò nyawu utu anu wamba mêyi a milawu. Utu wêwè misangu yônsò anu wela Aakaba milawu. Mpindyewu, Zedekiya, muntu udi kumutu awu, paapà, anyi. . .” cyônsò civwaye aci. “Mpindyewu yêyê nyawu wâbêneshi Aakaba, wamba ne: ‘Nda ùkacyênzè.’ Mpindyewu amba peebe cintu cimwecimwe aci, Imla. Mona’s, wêwè’s nyawu udi anu mupele. Nyawu kuyiku nansha ne disangisha, dya bushuwa edi, nansha dikese. Kadi balumyana aba badi naabo mìlìyô. Ditunga dijima nditwe ku cyabo bôbò. Mpindyewu amba peebe cintu cimwecimwe cidibo bôbò bamba aci, umone ciwenza, neudye—neudye mabanji a ditunga edi.” Yêyè’s mmupangè wa dymbila bya nanku mwaba awu!

Ambaayibi tũng bu ne bavwa bambe ne: “Udiku mwa kwangula cilema nansha cimwe mu Zedekiya anyi, Miika?”

“To.”

“Kacya ukaadiku mumukwate mu mpekaatu anyi?”

“Kacya.”

“Kacya ukaadiku mumvweku ne mmucipangane anyi?”

“Kacya.”

“Kacya ukaadiku mumujikidile mukwacike maala?”

“Kacya.”

“Udiku mwa kwela tulaasa tudiye mulonge mpatà?”

“Bwǎlà.”

“Udiku wela meeji ne dipolome dyende dya bu docteur adi ndya mashimi?”

“Bwǎlà.”

“Udi witabuuja ne Ph.D. wende—wende ngwa cya bushuwa anyi?”

“Bushuwa’s. Wa kudi nsangilu wa Tubadi twa beena Yuda awu’s; ndi ngeela meeji ne nnsangilumwî-. . . , ndi ngeela meeji mmwîmpè.”

“Ee, kadi mùdì kuyi udisangaku nende mbwa cinyi?”

“Bwalu yêyè ùdi pambelu pàà Dîyì!”

<sup>102</sup> Ee, netwënzè diteetangana dya makanda pa bwalu abu, dîbà adi, bu mùkaavwà Eliya muprofeta mwenze kumpala amu. Ne pawikala mwânà wa Nzambi, neushaale ne muprofeta wa mu Bible ewu. N’Dîyì. Monaayi dîbà, muvù.

Ee, kadi bu Zedekiya mwambe ne: “Kaa, ndi mumanye ne muprofeta mmwambe aci, kadi cidì mbwa lukongo lùcilwalwà. Aci mbwà ntanta mule be ne patùdì apa?”

Yêyè kwamba ne: “Indila too ne pângààpetà cikeena-kumona cya kudi Nzambi, kadi nshiiše kukwambila.”

Yêyè ne: “Pashiishe wǎmbè cintu cimwecimwe acyen?”

Yêyè ne: “Nêngǎmbè anu cidì Nzambi wamba; cikwabo cintu to, cintu cya kusakidila to. Neyêna mwa kuKusakidila kantu, anyi kuKuumushila Dîyì nansha dimwe to.”

Ki bufuku abu, mu disambila, Mukalenge kulwa kudiye mu cikeena-kumona. Dya upatuka paakacyabu mu dinda, ki yêyè kwamba. . .

Ki baprofeta babidi mbôbò abu!

<sup>103</sup> Muntu mutambe bunene mu ditunga, ne mu busalaayi ne ku dimona dya beena ditunga, ùvwa n’Zedekiya. Yêyè ki uvwa muprofeta wa kumutu, muteeka kudi mfumu. Yêyè ki uvwa mfumu wa baprofeta bakwabo bônso abu, muteeka kudi bulongolodi. Ùvwa muvwijiibwe, kudi bulongolodi bwende abu, mfumwabo bônso; pǎmwǎpa mwikale ne dimanya dya bikaavwaye mubalebale kutamba bônso, mutambe kulonga, mutambe kwikala wa usungudiibwa bwa mudimu awu. Kabidi ùvwa mulaaba maanyi kudi Nyuma Mwîmpè, bwalu’s nyawu bamubiikila ne “muprofeta.” Cya bushuwa, kayi anu muprofeta wetu wa patupu ewu to, ùvwa muprofeta wa beena Ebelu. Mpindyewu mutangilaayi numone.

104 Zedekiya wakamba ne: “Mukalenge mmungambile ne: ‘Ungenzele Mêmè nsengu ya cyamu cifiike yibidi eyi,’ cimfwanyi.” Muprofeta utu pa ciibidilu ufila bimfwanyi. “Yêyè ngudi mwambe ne: ‘Enza nsengu ya cyamu cifiike eyi.’ Nyuma Mwîmpè ngudi mungambile ne: ‘Angata yôyi eyi,’ Dilaabiibwa didi dimbeneshe mêmè.” Kanwikadi nwêla meeji ne ncyá mulambu to, kadi mbwa kukafika ku kaacintu kampanda. “Nyuma Mwîmpè utu wakula mu myakulu mu mêmè awu, Yêyè mwine udi munshindike awu, Yêyè ngudi mwambe ne: ‘Angata nsengu eyi, nenku, ku yôyi eyi, ambila mfumu ne neasake Suuliya too ne pambelu paa ditunga. Ne Mêmè nêmmwalùjilè buloba budi bwikale bukenji bwa Izaleela abu, ekeleeziya.”

105 Mwaneetu, aci’s ncikumbanangane anu menemene ne maalu mudiwu, anu muvwa Baalama kaaba aka amu. Baalama uvwa ne ngaakwilu ukumbanangane ne maalu mudiwu anu muvwa Môsà amu. Môsà . . . Nomba mujaalame wa Nzambi utu mmwandamutekete. Ki Baalama kwambaye ne: “Ngiibàkilè byoshelu mwandamutekete; milambu mwandamutekete mikezuke, ngombe, ne bimpanga mwandamutekete bya mikooko.” Aci cidi cyamba bwa dilwa dya Mwânà wa Nzambi. Bilondeshile maalu mudiwu, yêyè uvwa mu bulelela anu bu yônsò wa kudibo.

106 Nenku ki Zedekiya nyêyè ewu, mujaalame anu bilondeshile maalu mudiwu: “Bwalu buloba ebu mbwetu twêtù. Mona’s, beena Suuliya ne beena Peleshete baba biikale buuja mafu, a baabo bânà balela ne bikwabo, mwena lukuna wetu, ne byakudya bidi beetu bânà kabayi naabi abi to! Bya bwalu, Nzambi’s ngwâkatùpèèsha buloba ebu!”

107 Mwaneetu, aci’s ncishimbi-dîyì. Ngeela meeji ne ùvwa mufwanyine kucyamba wela mbila mikole kumpala kwa Izaleela, ne bôbò bavwa bafwanyine kwela mbila ne mwabo mwônsò. Mpindyewu, nkaadi ngaakula bwa leelu ewu mpindyewu. Ndi mutekemene ne nudi nundonda. Mbila mikole yônsò ayi, mikobolo yônsò ayi!

108 Nudi bavuluke Davidi mu dyalumingu dishaale anyi? Nwamonu anyi? Nwênù badi pambelu pààpa mu myaba yidi bisanji bifika, anyi mu bitupa bya malaba mudi telefone ewu ufikila; nwênù bavwa kanuyi bapete Diyiisha dya dyalumingu dishaale, ikalaayi batwishiiibwe bwa kudipeta. *Kuteeta Kukwàcila Nzambi Mudimu Kuyi Mutèèkùbwe Bwà KuWènza*, nansha wêwè mwikale ne meeji matooke a bishi, mwîmpè bishi, kakuyi mpatà to kaciyena anu ciitabuujiibwe kudi Nzambi to. Nwamonu anyi?

Mpindyewu, ki Zedekiya nyêyè ewu, udyelela meeji ne yêyè udi mu bulelela.



Miika kwambaye ne: “Ngānji nkonke Nzambi.” Ki kulwaye paakacyabu mu dinda ne EMU MMUDI MUKALENGE WAMBA. Ûvwa mukenkete cikeena-kumona cyende ku Dîyi.

Mpindyewu bu ne wakambila Zedekiya ne: “Udiku mumanye cyākambà muprofeta wa Bible mwaba ewu ne necyenzekele mulumyana ewu anyi?”

<sup>109</sup> “Kadi kî mmpindyewu to, bwalu muntu ewu mmuntu wa kuneemekibwa. Yêyè udi uteeta.” Kanupangi kuumvwa eci to. “Ûdi uteeta kwalujila ekeleeziya bintu bidi bya ekeleeziya. Ûdi uteeta kumwalujila cintu cyende,” kabiyi bintu bya mu Nyuma to; bu byôbi nanku, nunku mmunyungishe ditunga dijima adi bu mwakenza Eliya. Kadi, ùteeta kubapa bintu bya mubidi ne: “Tudi ne bintu byetu. Tudi bulongolodi bunene. Twêtù tudi beenamu. Twêtù bônso, nwênù bônso aba, nwênù beana Mishònyì aba, bivwa bikengela nwênù kudisanga kutudi eku.” Uh-huh.

<sup>110</sup> Netufike ku cyôci aci mu katanci emu. “Bônso mbânà beetu baa balume ne baa bakaji, twamb’eku twamb’eku.” Kî mmwômò to! Kacitu cyanji kwenzeka ne kacyadyakwenzekaku to, bwa Ekeleeziya mulelela ne mushuwashuwale wa Nzambi. Kacyenaku mwa kwenzeka to!

<sup>111</sup> Monaayi, yêyè kumona cikeena-kumona. Ki kwambaye ne: “Nzambi mmwakule naanyi.” Mpindyewu, tangilaayi, muntu ewu uvwa ne meeji matooke. Kwambaye ne: “Yêyè ngudi mwambe ne: ‘Enza nsengu eyi, ne nda kwaka kumpala kwa mfumu kadi uye lubilu mutangile ku wesete,’” anyi kwônso kuvwa buloba abu mwa kusanganyiibwa bilondeshile mwaba uvwabo biimanyine awu. “‘Uye lubilu, nenku neciikale EMU MMUDI MUKALENGE WAMBA, ne yêyè neapete bucimunyi ne nealukile, bucimunyi bwa ekeleeziya.’ Neùbîpâtèmu!” Aci’s cidi anu bu mu cyôci, kî mmwômò anyi? Bwalu buvwa cinyi?

Ki Miika udi upweka ewu. Yêyè ne: “Mpindyewu filaaku cyebe ciprofeta.”

“Bànda ndaaku! Kadi ndi mumone Izaleela bu mikooko, mitangalake, kayiyi ne mulami to.” Yoyöyò! Bikudimuke anu menemene.

<sup>112</sup> Mpindyewu, nwênù’s ki disangisha. Mpindyewu udi mu bulelela ki wepi? Bônso babidi, baprofeta. Mushindu umwepele unudi mwa kumanya dishiilangana munkaci mwabo, ngwa ne, kucikenketa ku Dîyi.

Yêyè ne: “Mmunyi mùdì upeta ciine eci?”

Yêyè ne: “Mvwa mumone Nzambi musòmbe pa Nkwasa wa butumbi.” Yêyè ne: “Mêmè kumona nsangilu yônso muMunyungulukile.”

<sup>113</sup> Mpindyewu nwavulukaayi ne, Zedekiya uvwa ufuma ku dyamba ne, ùvwa pende mumone Nzambi, ne Nyuma

umwèumwè awu. “Mémè ndi mumone Nzambi. Mmungambile bwa mémè kwenza nsengu eyi ya—ya cyamu cifiike. Bwa kupatuka kuya kuntwaku ne kusaka bisamba bya bende abi kubipatula muneemu, bwalu buloba ebu mbwetu twètù. Bakwabo abu kabeena ne bukenji bwa kubwelamu to.” Bavwa mwa kwenza nanku bu ne bavwa bashaale mu bulongame ne Nzambi. Nunku mbabupete, kadi bakaavwa baye kule ne Nzambi.

<sup>114</sup> Mushindu awu ki udi bulongolodi, ekeleeziya. Ûdi ne bukenji pa bintu ebi, kadi mbununyengebi ku diibila, bwalu nukaadi baye kule ne Dìyì dya Nzambi ne Nyuma wa Nzambi, dilaabiibwa, bwa kushindika Dìyì dya muvù. Kanupangi kuumvwa Mukenji ewu to.

<sup>115</sup> Monaayi cyàkenzekà mpindyewu. Yèyè ne: “Ndi mumone Nzambi,” m’Miika awu, “musòmbè pa Nkwasa wa butumbi mu Dyulu. Nsangilu Wende uvwa mudisange muMunyungulukile. Yèyè ne: ‘Nganyi utudiku mwa kutuma kupwekaye bwa kuya kaseeswisha Aakaba, bwa kufikisha méyì a Eliya ku dikumbana, muprofeta Wanyi uvwa mushindikiibwe awu. Mémè nguvwa mwambe ne nealwe. Ne Eliya mwine nguvwa ne Dìyì Dyanyi. Nenku mauulu ne buloba nebijimine, kadi Dìyì Dyanyi kadyakupangilaku to. Nansha bôbô bashaale baa cyena leelu bishi, anyi nansha balwe bîmpè baa bishi, anyi nansha balonge tulaasa twa bishi, anyi nansha biikàle banene baa bishi, Méyì Aanyi kaadyakupangilakù to.’

<sup>116</sup> “Ki nyuma wa mashimi kubànda upatukila mu iferno, kutwaye binù panshi, kwamba ne: ‘Bu Wèwè mwa kungaanyishila mémè, ndi mwa kubapeesha dyanyi dilaabiibwa, kubafikisha ku dyenza cimanyinu ne bwalu bwa kukema bya mushindu wònsò naka, cidi ne bwalu mbaseemeje anu kule ne Dìyì. Yèyè kaakumanyaku nansha ne Aci n’Dìyì Dyebe to. NeaDilengulule, bwa dimanyika.’” Mwaneetu, bikondo kî mbishintulukeku to. Mwaneetu Neville, aci’s ncyà bushuwa. Nwavulukaayi ne, aci ncyà bushuwa. “Mémè nêmmwikilè pambidi, bwa kumufikisha ku dyenza bintu bimwebimwe bidi bakwabo benza abi. Nêmmufikishè ku dyamba ciprofeta, ne ku dyamba mashimi.” Mmunyi muvwabi mwa kwikala mashimi? Bwalu bivwa bibengangana ne Dìyì.

<sup>117</sup> Angataayi anu dimwe dya ku mabatiiza a mashimi aa, *bikampanda* ne *bikansanga* ne *bikankenga* bya mashimi ebi, nansha biikàle bimweka bilelela bishi, nansha bôbô bateeta kutentula bishi, mmashimi piikalabi bibengangana ne Dìyì dya Nzambi dya dîbà edi. Aci’s mmwômò mmenemene’s.

Wèwè udi wamba ne: “Ee, dyetu twètù, ee, twètù tuvwa benze *cikampanda*, ne tutu twenza *cikansanga*, ne ekeleeziya wetu utu mushindu *kampanda* ne mushindu *kansanga*.”

118 Nansha ciikàle cinyi. Piikalaci cibengangana ne Dìyi difunda dya dîbà edi, mmashimi. Abu kí mbutangile Nzambi to, nansha ciikàle cya meeji matooke a bishi, anyi búngì bwa tulaasa tulonga, anyi cya meeji matwe, anyi cimweka cilelela bishi, nansha cimweka cya lungenyi bishi, piikalaci cibengangana ne Dìyi dya dîbà edi. Netubwelemu mu ndondo kakese paanyima paa ndambu wa tusunsa, bu dîbà mwa kutupaku mushindu. Katuyi bapete mushindu to, netücyängätülùlè diloolo edi.

119 Monaayi, yêyè uvwa muntu wa meeji matooke, mwîmpè, kakuyi mpatà to. Ki yêyè kwamba . . . Pa dîbà adi, mu ngaakwilu mukwabo, Miika kumwambilaye, kayi mumwambile anu pa bütôkà cimônàmèsù nunku to, kadi mu ngaakwilu mukwabo ne: “Wêwè udi mulaabiibwe ne nyuma wa mashimi.” Aci kí ncifwanyine kwikala cintu cya kwambila mwepiskopo anyi? Kadi yêyè’s wakacyenza.

120 Ki mwepiskopo ewu kuseemena e kwamba ne: “Wêwè kwadyakupetaku kabidi bwobumwe to,” kadi kumunangulaye dipi mwîsù. Kwambaye ne: “Wêwè’s udi mumanye ne mêmè ewu ndi muntu mushindika. Ekeleeziya wanyi ngudi mumvwije mfumu wende, wa cintu eci. Disungula dya ciibûngì cya cisamba cya Nzambi ndidi dimvwije cyôcì eci. Bulongolodi bwanyi mbudi bumvwije cyôcì eci. Ne Nzambi ngudi mutupe buloba ebu, ne meeji Ende ngaa ne bwikalè bwetu twêtù. Ne mêmè ngudi ne EMU MMUDI MUKALENGE WAMBA.” Kumunangulaye dipi, kwamba ne: “Nyuma wa Nzambi mmuyiile njila kaayi padiYe muumuke kûndi?”

121 Miika kwamba ne: “Wêwè’s neujandule, dimwe dya ku abidi adi panshi aa,” piikalà Californie ukaadi mwinshi mwa mbû mwamwa, ne bintu byônsò ebi. Nwamonu anyi? “Neumone njila udiYe muyiile, pawikala ukaadi musòmbe mu nzubu ya munda mwa buloko.”

122 Mpindyewu, Aakaba, ciwamba ncinyi? “Mêmè ndi ngiitabuuja muprofeta wanyi,” mwakambaye. Amba tûng bu yêyè mukenketeku Dìyi? Nwamonu’s, kavwa muswe kudimona mwediibwe mulawu to. Nteelejaayi! Kavwa muswe kudimona mwediibwe mulawu to. Muntu nansha umwe katu muswe aci to.

123 Nenku bwanyi bulongolod-. . .mwaneetu wa mu belongolodi, s’ki lutatu lûdi naalu alu. Utu muswe kwela meeji ne udi mu lulelela, peebe, s’udi anu mumanye munda mwa mwoyi webe awu ne, paudi ubatiiza mu dîna dya “Taatu, Mwânà, Nyuma Mwîmpè” apu, udi ushima. S’udi anu mumanye ne paudi u-. . .wamba bintu byûdi wenza abi, ne wangata bileeji bya mbangilu abi apu, ne bintu byônsò bya mushindu awu abi, s’udi mupiile. Mmunyi mudi cileeji cya mbangilu mwa kwikala dyakula dya mu myakulu, kadi kwamba bintu bibengangana ne mulayi wa Nzambi mu dîbà edi? Bidi mwa kwenzeka munyi? Cyûdi kuyi muswe’s mmulawu, kí mmwômò

anyi? Kadi's nyewu bifundiibwe *Emu*, ne nebiikale nanku. Aci's ncimanyinu cya nyama wa lwonji, cifwanangane menemene mu mushindu wa cifwanyine kuseeswisha ne Basungula bu ne bivwa mwa kwenzeka.

<sup>124</sup> Cimanyinu cyônsò, bwalu bwa kukema bwônsò, muntu mulaaba maanyi yônsò, ciprofeta cyônsò, bintu bya mishindu yônsò biikàle byenzeka; bimanyinu bya mishindu yônsò, maalu a kukema a mishindu yônsò, nenwâmbè ne dishiilangana didi penyi? Tangilaayi Dîyi bwa dîbà ditùdi edi. Ki mushindu ngwôwù awu unudi nwangata . . .

Tangilaayi Môsà, muvwaye mwa kwikala mwambile Baalama. Tangilaayi Miika mwab'ewu, mmunyi mutudi bamanye ne yêyè nguvwa mu bulelela? Dîyi, kumpala kwende, dikaavwa dyambe cyôci aci mu ciprofeta bwa Aakaba.

<sup>125</sup> Nenu Dîyi, kumpala kwetu, ndyambe ciprofeta bwa malongolodi aa bwa dituku edi, ne mulawu ewu wikala mwa kuàkwàta. Ne bintu bivwà mwa kwenzekela kudi Ekeleeziya Wende mulaaba maanyi wa cya bushuwa, neikale ne Dîyi, Mukaji-musela-Dîyi. S'ki twètù aba. S'ki cyôci eci, leelu ewu, anu muvwaci musangu awu menemene.

<sup>126</sup> Bible mmwambe ne: "Bwalu bwônsò bujaadikiibwe mukana mwa bantemu babidi anyi basatu." Ngākùlù bwa Baalama, ngākùlù bwa Baalama ne bwa Môsà. Ne ngākùlù mpindyewu bwa Miika ne Zedekiya. Mpindyewu nêmfilè mukwabo umwepele. Bàà bwalu, badiku nkama, kadi mukwabo umwepele, bwa kukumbaja bantemu basatu. Ndi naabo mulongolongo bafunda mwaba ewu; kadi bwa kulaminyina dîbà's.

<sup>127</sup> Yelemya uvwa mushindikiibwe, mwipata, kadi muprofeta mushindika wa Nzambi. Baakakina muntu awu. Baakamwasa bimuma bibish-. . . bimuma bibole, ne bikwabo byônsò. Ki kubeelaye mulawu. Nenu bintu byakenzaye, mwakalaalaye kabavu pambelu pààpa aka kaseke ne aka kaseke, ne bikwabo, ne kufilaye bimanyinu bya ne Izaleela uvwa mupiile.

<sup>128</sup> Muprofeta yônsò, muprofeta mulelela ukààdikù mujuuke pa buloba ewu, ùvwa anu wela malongolodi a cyena mangumba a ekeleeziya awu mulawu. Mmunyi mudibi bifwanyine kushintuluka, kudi Nzambi utu kayi ushintuluka?

<sup>129</sup> Nyuma Mwîmpè ki udi Muprofeta wa dîbà edi; Yêyè ngudi ushindika Dîyi Dyende, uDijaadika. Nyuma Mwîmpè ki uvwa Muprofeta wa dîbà dya Môsà. Nyuma Mwîmpè ki uvwa Muprofeta wa dîbà dya Miika. Nyuma Mwîmpè, mwine wâkafùnda Dîyi awu, ki udi ulwa ne ushindika Dîyi.

Mpindyewu cyâkenzekà ncinyi mu cikondo cya Miika? Aakaba wakashipiibwa, ne mbwa yakalaka mashi ende, bilondeshile Dîyi dya Nzambi.

130 Nwênù balongeshi baa mashimi bônso, mmudi Nzambi wamba, dîngà dituku nwadyakupoola binudi nukuna abi, nwênù balombodi bafobo baa bampofu aba! Ncyêna mufiike munda to. Cîndi ndi nnwambila anu Bulelela. Nunku ncivwa mwa kwikala mwambe cyôci eci bu ne mwaba ewu, mu cibambalu cyacya, bu Nyuma Mwîmpè kayi mwambe ne: “Cyâmbè mu mushindu awu” to. Kacya nkaadiku munwâmbile bwalu kampanda bwa mashimi budi Nzambi kayi mujaadike ne mbulelela anyi? Tabulukaayi, nwênù bâna beetu, kumpala kwa dîbâ kwikaladi dikaadi dimane kupita!

131 Kadi anyishaayi ngâmbè bwalu ebu. Mmunyi mudi dyêbâ mwa kutabuluka ne kwikala mungonga, piikalabi ne dikaavwa dimana kulongolola ku cyôci? Mmunyi mudi Basungula mwa kupanga kucimona? Bwalu, nwênù nudi mbâdi basungula bwa kucimona. “Bônso badi Taatù muMpè nebalwe,” mwakamba Yesu, “kadi nansha umwe wabo kakulwa to piikalâ Taatù kayi mumuMpè kumpala kwa difuka dya dyulu ne buloba, pâakafundiibwâ mênâ abo mu Mukanda wa Mwoyi wa Mwânâ wa mukooko,” kî mmu mukanda wa ekeleeziya to, kadi mu Mukanda, Mukanda wa Mwoyi wa Mwânâ wa mukooko.

Monaayi, Yelemiya kujuukaye e kwimana, mushindika kumpala kwa bantu, kadi bôbô baakamukina.

132 Pa nanku ki kuya kenzabo cikokedi, yêyè ngwâkenza, kuciteekaye pa nshingu wende, ne kuyaye kumpala kwa bantu abu. Bôbô kwamba ne: “Kaa, twêtù's tudi cisamba cinènè cya Nzambi. Mona's, tudi Izaleela. Tudi ne meeji matooke a dikema ku nsunângongâ wetu! Tutu tuyamu dyalumingu dyônsò, twêtù, tulambula milambu, tufutamu kabidi mfranga yetu. Mmunyi mudi Nebukandeneesa mwa kushaala mulame bintu bya cijila bya Nzambi?” Huh! Mpekaatu yenu's nyivwa micyênzè.

133 Nzambi wakamba ne: “Nwênù balame mêyi Aanyi, Neyakucyenza to. Kadi nwênù kanuyi baâlamè to, necinuvwile.” Ncyâ bushuwa menemene. Bicidi anu mushindu wumwewumwe awu. Lamaayi mêyi Ende, Dîyi Dyende dya dîbâ ditùdi, cyakalayaYe.

134 Mpindyewu monaayaaku. Mpindyewu, Yelemiya, ku diswa dya Nzambi, muprofeta mushindika, nansha muvwabo bamukine amu. . . Yônsò wa kudibo wakakinyiibwa mu matuku ende. Baakenza bintu bya dikema bibengangane ne dingumba dya dituku adi, muntu yônsò umukina, nansha bamfumu ne bikwabo byônsò. Ki yêyè kuteeka ci—cikokedi pa nshingu wende, kwamba ne: “EMU MMUDI MUKALENGÈ WAMBA. Nebiikalè mwômò amu bidimu makumi mwandamutekete,” bwalu yêyè uvwa ne dyumvwa kampanda dya difumina ku Dîyi dya Nzambi. “Bidimu makumi mwandamutekete!”

135 Pashiishe Hananiya, Hananiya, ngeela meeji ne nutu nudishindumuna ne H-a-n-a-n-i-y-a. Hananiya, muprofeta

kampanda munkaci mwa cisamba amu, kuseemenaye, kwangataye cikokedi civwa pa nshingu wa Yelemiya aci, e kucicibulaye. Ki kwambaye, bwa kudivwijaye muntu wa mushinga munene munkaci mwa cisamba, nwamonu's, pende mwikale wamba maalu mabengangane ne Dìyì dya Nzambi. Ki kwambaye ne: "Mu bidimu bibidi nebaalukile. EMU MMUDI MUKALENGE WAMBA."

Baprofeta balaaba maanyi babidi. Dishiihangana munkaci mwabo divwa bishi? Umwe uvwa wakula wamba Dìyì, kadi mukwabo yêyè to. Yelemiya kwambaye ne: "Amen."

<sup>136</sup> Kumpala kwa bakulu bônso ne disangisha, Izaleela mujima, nwamonu's, kujingaye bwa kuleeja ne ùvwa pende mwa kwikala munene anu muvwa Yelemiya amu. "S'udi anu mumanye ne kî mbakunange wêwè to, nansha nanku. Pa nanku, ndi paanyi muprofeta. Mémè ndi muprofeta kukutamba ne wêwè, bwalu wêwè udi wamba ciprofeta cya mashimi. Udi wêwè ungambila ne cisamba cya Nzambi neciikale ku bukookeshi bwa cintu *kampanda* bu nanku?"

<sup>137</sup> Ki cidibo bamba leelu ewu, kadi nenwikaleku anu mushindu umweumwe awu, nwênù ekeleeziya. Nudi bacipiibwe ne mulawu. Nwênù maekeleeziya ônsò, mangumba ônsò àdi makwate ku cilele cyabo cya bantu pamutu paa Dìyì dya Nzambi awu, nudi beediibwe mulawu kudi Nzambi.

<sup>138</sup> Mpindyewu monaayi, ki yêyè ulwàlwa ewu. kùdiHananiya udi udyapula cikokedi civwa pa nshingu wende aci, cimfwanyi cya Nzambi, kucicibula, kwamba ne: "EMU MMUDI MUKALENGE WAMBA. Mu bidimu bibidi bôbò nebaalukile." Anu bwa kudileeja cyanaana ne: "Mémè's ki *Kampanda*." Anu bwalu yêyè nguvwa pa mwaba awu, ùvwa muprofeta wa mu bulongolodi.

Yelemiya uvwa muntu wa mu cipeela uvwa musòmbèle paa nkaayende. Ùvwa wamba biprofeta anu bibi bwa bwalu bwabo dîbà dyònsò, bwalu bavwa babi.

<sup>139</sup> Kadi ewu muntu yêyè uvwa ubambila ne: "Kaa, nudi anu bîmpè bu munudi anu beenamu. Bu munudi anu Izaleela, ki cyònsò cidi ne mushinga. Nudi numona's, nwênù, twètù... Nzambi kaakwenzaku aci to. Ndi mumanye ne kudi kaacintu kakese kadi kenzeke muneemu emu, kadi kanwikadi ne myoyi yilubakana to, kanwikadi ne bwôwà nansha."

<sup>140</sup> Kaa, mwaneetu, bôbò abu's bacidi ne mwoyi leelu ewu. "Kanupampakanyi to, maalu ônsò adi enda bîmpè. Tudi ne bukontonyi pa kantu ne kantu. Twètù's ki Ekeleeziya mwine." Kanwikadiku nwela awu meeji to. Eyowa.

<sup>141</sup> Ki yêyè ne: "Maalu ônsò adi enda bîmpè. Nebaalukile mu bidimu bibidi. Aku's nkaacintu kakese kadi kenzeke. Kî ncintu cya pawaci to. Abi's tutu naabi. Nebukandeneesa ngudi mulwe

muneemu emu cyanaana, kadi Nzambi wetu twêtù neatangile bwalu bwôsò abu.”

<sup>142</sup> Kadi Dîyi divwa dyambe ne nebiikale kuntwaku bidimu makumi mwandamutekete; too ne pavwa lukongo alu ne cya kujimina, ne lukwabo lukongo. Bidimu makumi anaayi ndukongo lujima. “Eci nnkongo mitwe ku yibidi mijima yinwikala kuntwaku.” Ne Yelemiya wakamba aci bilondeshile Dîyi dya Nzambi.

Hananiya yêyè kucibula aci! Yelemiya kwambaye ne: “Mbîmpè. Amen. Kadi, Hananiya, tuvuluke bwalu ebu ne, bubidi bwetu tudi bônso baprofeta. Tudi bambi.”

<sup>143</sup> Ne mêmè ndi nkwambila bwalu ebu, wêwè mwaneetu. Tuvuluke ne kukaadiku baprofeta kumpala kwetu, ne bôbò abu baakamba biprofeta bya bilwisha makalenge, ne baakamba biprofeta bya bilwisha bintu kampanda. Kadi, wavuluka ne, pavwa muprofeta wamba bwalu kampanda, ùvwa ne cya kwamba ciprofeta aci bilondeshile Dîyi. Bu mudi Miika, ne Môsà, ne bakwabo bônso baa kudibo abu. Bîdi ne cya kwikala bilondeshile Dîyi. Kabiyi nanku to, dîbà adi vuluka cyàkenzekà.

<sup>144</sup> Pa dîbà adi, Hananiya, cilunji cyende cya muntu mwakane aci kadi kujuukaci. “Mêmè ndi Hananiya” (kakuyi mpatà to), “muprofeta wa Mukalenge, ndi ngamba ne: ‘Bidimu bibidi.’” Mu ngaakwilu mukwabo ne: “Mêmè ncyêna ncyuka cidî Dîyi dyamba to.” Dilaabiibwa dyende: “Ndi ngamba ne: ‘Bidimu bibidi, nebaalukile.’”

<sup>145</sup> Yelemiya kupatukaye mwaba awu e kumushiyaye, kupatukaye, kwamba ne: “Mukalenge, mêmè ncyêna ncyuka cidîye yêyè mwambe aci to, ncidi anu ngiitabuuja ne ndi mumanye ne Dîyi adi didi dyamba nanku. Mêmè nênshaalè ne lulamatu Kûdi. Ncyakuseeswishiibwa kudiye nansha.”

<sup>146</sup> Nzambi kwamba ne: “Nda kambila Hananiya awu ne: ‘Mêmè nêncyênzè cya cyamu cifiike, cikokedi cyàlondà.’” Anu bwalu wàkenza nanku, wàkuumushiibwa pa buloba, Hananiya mwine awu, cidimu cyôci cimwecimwe aci.

Ki bileejilu byetu mbyôbi abi, baprofeta bônso babidi abu. Bikwabo byàbûngî menemene mbifwanyine kwambiibwa ne kwakudiibwa pa dîbà edi.

<sup>147</sup> Kadi tangilaayaaku. Yesu wakamba, ne, mu cikondo cya nshikidilu eci, cyakabidi, nyuma yibidi ayi neyiikale mifwanangane menemene cyakabidi. Ncyà bushuwa anyi? [Disangisha didi dyamba ne: “Amen.”—Muf.] Mpindyewu monaayi. Necitambe kufwanangana kupita muvwa cyôci aci. Eci ncikondo cya nshikidilu. Kaa, bânà wetu! Nzambi atufweku luse’s we! Mu mushindu wa ne: “Ncifwanyine mene kwikala cilelela menemene mu mushindu wa cifwanyine kuseeswisha Basungula mene bu ne bivwa mwa kwenzeka.” Mpindyewu mmunyi munuyaaya...tuvwà babisungûlûje bishi

mu matuku awu? Nenùbìsungùlùjè bishi leelu ewu? Mushindu umweumwe awu, kushaala ne Dìyì: “Yesu Kilisto umwèumwè awu makeelela, leelu, too ne kashidi.”

<sup>148</sup> Mpindyewu nwatabaleelaayi Mukenji wônso ewu. Ne panwikala nuteeleja mukaba wa mēyì, pàmwāpa nansha dituku dikwabo pàngìikalà nkaadi mumane kuya piikalà Mukalenge mujikije naanyi panu pa buloba, nenupinganyine ku bwalu ebu. Ikalaayi nuteeleja dīyì dyanyi mēmè, cìndi mēmè munkaci mwa kunwambila eci. Yēyè mungangate kumpala kwa Dilwa Dyende, ikalaayi anu bavuluke ne, ndi mwakule neenu mu Dîna dya Mukalenge, ku Dìyì dya Mukalenge. Eyowa.

<sup>149</sup> Monaayi: “Nebitambe kufwanangana mu mushindu wa bifwanyine kuseeswisha Basungula bu ne bivwa mwa kwenzeka,” nebēnzè bimanyinu bimwebimwe abi, bishima bimwebimwe abi, ku Nyuma umwèumwè awu. Ncya bushuwa anyi? [Disangisha didi dyamba ne: “Amen.”—Muf.] Anu menemene muvwa baprofeta batudi tufuma ku dyamba aba, baprofeta. Mpindyewu, baakafunda kabidi . . .

Tubeululaayi mu cyôcì aci, bwa ebu bwalu, panwikala baswe, mu Timote Mwibîdì 3. Katulekedi eci to. Ne mēmè ncyèna muswe ku- . . .

<sup>150</sup> Ndi ntpa dīsù ku ntanku udi kuulu kwaka wawa, ne—ne ndi nswa kushiya bintu byàbûngì pa bwalu ebu, kadi ncyèna ngeela meeji ne bivwa bikengela twētù kwenza nanku mpindyewu to. Nwamonu anyi? Monaayi. Anu . . . Piikalabi ne ndi mwimane mwab’ewu, nkopakana mushindu ewu, nwamonu’s, kadi ndi ne disanka. Ne ndi mumanye ne eci ncilelela. Timote Mwibîdì 3.8.

<sup>151</sup> Pôlò, muntu wákamba ne: “Piikala Mwanjelo ufumina mu Dyulu kadi unwambila dīyì dikwabo dishiilangane ne dîndì mēmè mwambe, ediibwe mulawu,” mpindyewu, Mwanjelo mutuuluke panshi. Awu n’Tesalonika Mwibîdì . . . Kaa, mfwayi luse.

<sup>152</sup> Tangilaayi mu Timote Mwibîdì 3.8. Tangilaayi numone Pôlò mudiye wakula mpindyewu. Tubangilaayi lwà ku . . . Tubangilaayi ku mvensa wa kumpala, kadi tuteelejaayi mpindyewu ne ntema yônsò. Wèwè udi ne Bible webe awu, bala pamwe naanyi. Wèwè udi kuyi ne Bible webe awu, teejejaaku ne ntema. Ntanyi . . .

*Umanyè kabidi eci ne, mu matuku a ndekeelu . . .*

Elaayi kashoonyi mwaba awu, “matuku a ndekeelu.” Ki mwalwabi mwa kwenzekela.

*. . . bikondo bya njiwu nebilwe. (S’ki mutùdi emu.)*

*Bwalu bantu nebiikale badinangi, beena lukuka lwa bintu, baditambishi, badibandishi, bapendi baa Nzambi, kabayi batumikila baledi baabo, kabayi ne kusakidila, kabayi baa cijila,*



153 Tangilaayi musumbà wa batudi naabo leelu ewu aba, babole. Nansha mene bantu badi pambelu mu müsèsù emu aba, bansongaalume, bakoka nsuki yabo bayipwekeshila mumpala, ne cisuba byenze bu muntu mukaji. Dikudimika dya maalu's! Beena Sodoma!

154 Nuvwaku babale cidimu eci, cikandakanda cya ngondo ewu cya *Reader's Digest* anyi? Mbambe ne: "Beena Amerike baa bidimu," mündi ngeela meeji ne mmuvwabi's, "pankaci paa bidimu makumi abidi ne makumi abidi ne bitaanu, bakaadi mu ngiikadilu wa bantu bashindame." Kwabo's nkumane kujika! Bakaadi babole! Maalu a mamanya ngadi amba nanku awu, ne muntu mulume ukaadi mu bidimu bya muntu mushindame, ne muntu mukaji, pacidibo mu bidimu makumi abidi ne bya mu njila. Mubidi wabo ukaadi mubole ne mudifile ku bukooya.

Kaa, Amerike, mmisangu bûngì kaayi yikaadi Nzambi muswe kukukungwija, kadi mpindyewu dibà dyebe dyamanyi kufika! Wêwè ki udi uleeja baa pa buloba dikàsà mu bukooya.

*...bapendi baa Nzambi, kabayi batumikila baledi  
baabo, kabayi ne kusakidila, kabayi baa cijila,*

*Kabayi ne dinanga ditu naadi bantu edi, . . .*

Kabayiku nansha ne dinangangana dyetu dya bushuwa dya muntu ne mukwende edi to, dya mulume bwa mukaji, dya mukaji bwa mulume. "Kabayiku nansha ne dinanga ditu naadi bantu edi to." Bukooya, bwa masandi!

*...bashiipi baa bipungidi, basongwedyanganyi,  
kabayi ne kudikanda, beena lwonji, ne badyombodi  
baa aba baa maalu mimpè,*

155 Mu ngaakwilu mukwabo, bamba ne: "Nwênù musumbà wa bansantu babunguluki baa mu malaba." Muntu mukwabo uvwa webeja dituku adi bwa kulwa mu ekeleeziya emu. Kumwambilabo ne: "Kuyi kuntwaku to. Cyônso cidiku cidi anu mitooyi ne bintu bya lukutukutu kacya byamonangana."

Nwamonu's, "badyombodi baa bantu abu."

*Batungidyanganyi, beena mutu mukole, beena  
dyambu, banangi baa bisankasanka kupita kwikala  
banangi baa Nzambi;*

Wêwè udi wamba ne: "Mwaneetu Branham, abu's mba-communistes." Mvensa udi ulonda awu udi wamba cinyi?

*Biikale ne cimwenekelu cya difwana dya Nzambi, kadi  
(cinyi?) biikale bavila bukole bwadi: (Dîyî, Yesu Kilisto  
umwèumwè awu makeelela, leelu, too ne kashidi,  
mumweneshiibwe, mulayi bwa dituku edi) . . .*

Anu bu Hananiya menemene, anu bu Zedekiya menemene, anu bu Baalama menemene, anu nanku, baprofeta bakwabo baa mashimi abu.

*Biikale ne cimwenekelu cya difwana dya Nzambi,*  
(balaaba maanyi . . . Nwamonu anyi?)

*Biikale ne cimwenekelu,* (bambi balaaba maanyi,  
bateeka mu mudimu . . .)

*Biikale ne cimwenekelu cya difwana dya Nzambi, kadi*  
*biikale bavila* (ne Yèyè udi umwèumwè awu makeelela,  
leelu, ne . . . Bavila Dìyì Dyende!)

<sup>156</sup> Baakavila Yesu bishi mu dituku adi? Wâkavilàbo nganyi paakavilabo Yesu apu? Dìyì's. Bavwa batendeleedi. Bavwa balongeshangana byumukila mu Bible wabo, kadi bavila Dìyì dya dituku adi.

<sup>157</sup> Mbanganyi biine abu leelu ewu? Cintu cimwecimwe aci, balaaba maanyi, bayiisha Evanjeeliyo wa mpenta, kadi bavila mulayi wa Dìyì wa dituku edi munkaci mwa kushindikiibwa: "Yesu Kilisto umwèumwè awu makeelela, leelu, too ne kashidi." Nudi nucimona anyi? [Disangisha didi dyamba ne: "Amen."—Muf.]

*Bwalu bôbò aba ki mushindu wa badi bàdifindà*  
*mu nzubu, ne balombola . . . bakaji bakutakane badi*  
*bambule majitu a mpekaatu, balalula kudi dyalakana*  
*dya mishindu mishiileshiiilangane,*

<sup>158</sup> "Ma-fêtes etu a ditela dya bilambà ne *bikampanda ne bikansanga* byetu." Muntu kampanda ulwa mwikale uteeta bwa kuumvwija Dìyì bibi, kadi wamba nenku ewu: "Bidi anu bikumbane, mwaneetu wa bakaji, bwa wèwè kwikala ne nsuki mîpì. Kwikadi ucyùka cidindingidingi aci to. Wamonu anyi? Anyi, piikalabi ne udi—udi uvwala *cikampanda*; kî n'*cikansanga* to, 'cidi cipatuka mu mwoyi wa muntu ki cidi cimukooyisha.'" Nwamonu anyi? Kadi udiku ufika ku dyumvwa ne udi mulaabiibwe ne nyuma mubi, wa dyalakana, wa bukooya anyi? Nansha byôbì ne, udi mufwanyine kwikala wimba mu korale, ne nsuki mîpì, kadi udi ne nyuma mubi. Aci cidi cibengangana ne Dìyì. Mmwômò. Ki cidi Bible mwambe. Kadi wèwè udi wamba ne: "Ee, mêmè ntu mvwala tuputulu. Kacyena cimpiisha nansha."

"Ewu yônsò, muntu mukaji yèyè muvwale cilambà cidi cikumbanyine muntu mulume, ncinyangu kumpala kwa Nzambi." Nzambi udi kayi ushintuluka ngudi mwambe nanku.

<sup>159</sup> Kaa, bintu byàbúngì be, mmunyi mutudi bafwanyineku kubyàkula? Dìbà dyetu ndifwanyine kuya. Kadi nwènù's nudi ne dimanya dikumbane bwa kumanya cidi cîmpè ne cidi cibi. Kadi mmunyi mûndì mwa kubafikisha ku dicimanya? Ndi mwa kubafikishaku munyi? Wèwè udi wamba ne: "Ee, cyûdi welela mbila ncinyi?" Mêmè ndi ntemu udi ukupiisha wèwè. Dîngà dituku, mu Dituku dya Cilumbulwidi, s'neupange ditumba dya kubwela.

160 Mmunyi muvwa Miika mwa kwimanyika ciine aci? Mmunyi muvwa Mòsà, wela mbila, uteeta bwa kuciimanyika? Ne Yoshuwa ne bakwabo abu biikale banyeemakana munkaci mwa cisamba? Ki Lewi kupatula mwele wende wa mvita mu cimanga, kadi kubashipaye, nansha nanku? Baakatungunuka anu bu ne kakuvwa bwalu to.

161 Mbidyanjila kwamba ne nebàcyènzè. Ne bôbò nebàcyènzè, bwalu cidi EMU MMUDI MUKALENGE WAMBA ne nebàcyènzè. Nudi nwela meeji ne dipeeshiibwa dyabo dya myânzù adi dyàdyàkubàkòsololakù, bwa dingumba dyabo kwalukiladi ku Dîyi anyi? Cidi EMU MMUDI MUKALENGE WAMBA, bôbò kabaakucyenzaku to! Nebàkabwele mu mufwilakanyi ne Kilisto anyi? Menemene. Cidi EMU MMUDI MUKALENGE WAMBA, nebakabwelemu! “Kadi udi ucymba mbwa cinyi?” Bikengela ngiikale ntemu, ne nwênù peenu, beena kwitabuuja bônso. Tangilaayi.

*..bakaji bakutakane badi bambule majitu a...  
dyalakana dya mishindu mishiileshiilangane,*

“Ee, bakwabo bakaji’s batu babyenza.” Baprofeta baa mashimi! Mpindyewu teejejaayi. Baprofeta baa mashimi, ki bândi ngamba aba. Mpindyewu nebénzè cinyi mu matuku a ndekeelu?

*..balombola bakaji bakutakane...balalula kudi  
dyalakana dya mishindu mishiileshiilangane,*

“Ee, mêmè’s ndi mumanye ne bakaji bakwabo bônso...” Mbîmpè, tungunuka wèwè uye anu kumpala.

162 Cîndi mufwanyine kwamba ncinyi kumpala kwa bwalu bunene ebu bwikalà mwa kwenzeka mu Californie emu? “Nwênù bantu baa mu Los Angeles emu, cidimu cyônso cîndi mpingana kudi bakaji bàdi ne nsuki mibebula ne balume bàdi bàdivwijà bilùmaabikàjì búngì bupite bwa kumpala, bayiishi batàmbe búngì biikàle babwela mu bulongolodi. Kanwena ne paa kubingila to! Bu ne byenzedi bya bukole bidi byenjiibwe mwenu amu ebi bivwa byenjiibwe mu Sodoma ne mu Gomola, nunku bôbò abu mbashaaleku too ne leelu. Kaa, Kaapenuma, wèwè udi udibiikila mu dîna dya banjelo awu, Los Angeles!” Nudi numona cidi munkaci mwa kwenzeka anyi? Yèyè neaye anu buludi too ne mwinshi mwa mbù. Dìbà kaayi? Ncyèna mumanye ne ndìbà kaayi dyayaye to, kadi ùyaayamù. Nwênù bansonga, mêmè nciyi mucimone mu dituku dyanyi to, nwênù nwatangilaayi. Kwende nkumane kujika!

*Biikale anu bayiilayiila...kabayiku bakumbane  
mwa kufika ku dimanya dya bulelela to.*

Mpindyewu citupa cidi cipanda mwoyi ncyôci eci, cidi cipanda mwoyi ncyôci eci. Teejejaayaaku eci nunku.

*Mpindyewu anu muvwa Yane ne Yambele bakandameene Mòsà amu, ki mudi bóbò aba paabo bakandameena bulelela: bantu baa meeji manyanguke, booneke pa bidi bitangila diitabuuja dyakapabo bansantu musangu umwe, mu bushuwa bwa bwalu.*

“Pa bidi bitangila Diitabuuja.” “Ne yêyè neakudimune Diitabuuja dya baataatù, anyi dya bânà, kuditangija kudi baataatù.”

<sup>163</sup> “Boonèke pa bidi bitangila Diitabuuja.” He! Nudi bamanye cidi *boonèke* umvwija anyi? Wêwè ne Bible wa Scofield, kùdi dileeta dya *h* mwaba awu. Anu lwà kuulu aku, mbambe ne, “dipambuka.” Dipambuka, ki cidici.

<sup>164</sup> Mpindyewu, indilaayi kakese. Ndi muswe kukeba cintu kampanda mwab’ewu. Ngeela meeji ne mvwa mucifunde mu mushindu mwimpè. Ncyèna mutwishibwe to, kadi ndi muswe kucyamba, kadi kwanji kucikeba kumpala kwa mèmè—mèmè kucyamba. Mpindyewu, kasunsa kamwe cyanaana. [Katupa kaa mukaba wa mèyi munda mutupu—Muf.] “Boonèke pa bidi bitangila Bulelela, pa bidi bitangila Diitabuuja.” “Diitabuuja,” kudi Diitabuuja anu dimwepele. Ncyà bushuwa. “Pa bidi bitangila Diitabuuja, boonèke!”

Mpindyewu ndi muswe kubala Luuka 18. Indilaayi kakese. Kanwena . . . Nudi mwa kucifunda; kabyena anu bikengela bwa nwènù kubala to.

*Nenku wakabeelela lusumwinu pa bwalu ebu, bwa ne bivwa bikengela bantu kwikalabò misangu yònsò anu basambila, ne kabayi. . . bacyoka nansha.*

*Wamba—wamba ne: Mu cimenga kampanda muvwa nzuji, urwa kayi uciina Nzambi to, ne kayi utwa bantu mushinga to.*

*Kadi kuvwa mukaji mukamba kampanda mu cimenga cimwecimwe aci; ki kulwaye kudiye, wamba ne: Nsombweleku kudi mulwishi wanyi.*

*Kadi yêyè kaakaswa—kadi yêyè kaakaswa to bwa cikondo kampanda; kadi pashiishe kudyambidilaye mundamunda ne: Nansha mûndi nciyi nciina Nzambi, anyi nciyi ntwa bantu mushinga to,*

*Kadi bu mudi mukaji mukamba ewu untacisha, ndi muswe kumusombwela, bwa . . . kalu kunsuuya to.*

*Ki Mukalenge kwambaye ne: Teelejaayi nûmvwè cidi nzuji mubi ewu wamba aci.*

*Nenku Nzambi kaakusombwela bende . . . basungula, badi beela mbila kudiye muunya ne bufuku kudiye, nansha mudiye utwala musangu mule bwabo bóbò anyi?*

*Ndi nnwambila ne yéyè neabasombwele ne lukasa lwônsò. Kadi paalwa Mwânà wa muntu, neasangane diitabuujja pa buloba anyi?*

165 Mpindyewu lukonko ndwôlù alu. Mwaba wûmwà nkeba kufika ngwôwò ewu, mu Bwakabuulwibwa 10. (Netùkùfikè mu ndambu wa tusunsa, ku mvensa mukwabo mu Mufundu awu.) Mmwambe ne: “Mu matuku a Mukenji wa mwanjelo wa mwandamutekete, bwalu busokoka bwa Nzambi budi *ne cya* kujika.” Lukonko ndwelu, ludi ne, wêwè mulonde mu njila awu mu dîbà edi, nebukike anyi? “Nênsanganè Diitabuujja anyi?” Maalaki 4 neùlè pa dîbà edi: “Kwalujulula Diitabuujja dya bânà, kudyalu ku Diitabuujja dya baataatù, ku muji, Dîyi” anyi? Nwamalu anyi?

166 “Booneke, Yane ne Yambele, mwakakandamanabo amu.” Mpindyewu, kabidi, teejeaayi, Timote Mwibidì 3.8. “Bu muvwa Yan- . . . bakàndàmèène Mòsà, mu matuku a ndekeelu kabidi bantu booneke aba nebalwe,” mpindyewu monaayi mwaba udiCi cyamba apa ne, “biikàle ne cimwenekelu cya difwana dya Nzambi,” balaaba maanyi. Mpindyewu twânjàayi anu . . . Nwalukile paanyima nenku—nenku nucibale panwafika kumbelu, bwa mpete mushindu wa kujikija eci, mu dinda emu, ní ndi mwa kupeta mushindu. “Booneke pa bidi bitangila . . .” Kabayi booneke mu—mu nsòmbelu to; mbantu bîmpè, balonge tulaasa bapiluluke.

167 Mpindyewu monaayi, paakapweka Mòsà mu Ejipitu, ne mukenji wa EMU MMUDI MUKALENGE WAMBA, ne paakashindikiibwaye; kubiikilaye Izaleela, uvwa cisamba awu, kayi ekeleeziya to. Izaleela uvwa cisamba; kacya kabavwaku ekeleeziya to. Bwalu, mwaku *ekeleeziya* udi umwija ne “bàdi babiikidiibwe pambelu.” Bavwa cisamba cya Nzambi. Pashiishe paakalwabo balaaba maanyi mu Dîyi, ne babiikidiibwe pambelu, baakalwa ekeleeziya wa Nzambi. Ki pashiishe kutwabo cimpingà, bwalu kabaakiitabuujja Dîyi dya Nzambi to, kadi baakateleja muprofeta wa mashimi. Ndi ne ditekemena ne aci cidì cibwela’s.

168 Izaleela, mwikale cisamba cya Nzambi, wakatapuka mwinshi mwa cyanza cya Nzambi, mulaaba maanyi a Dîyi . . . ne Bukole bwa Nzambi, kumonabo bimanyinu ne maalu a kukema a Nzambi. Kadi pashiishe pavwa Nzambi wenda uya naabo kumpala, ki muprofeta wa mashimi kubwelaye, mulaaba maanyi, ne kulongeshaye cintu cibengangane ne Dîyi dya Nzambi dya ku cibangidilu dikaavwabo bumvwe; ki yònsò wa kudibo kubutukaye mu cipeela, pa kuumusha bantu basatu. Mpindyewu kwataayi aci.

169 “Bu mwakadibi mu matuku a Noa, mwàkasùngidiibwà misuuka mwandamukulu ku mâyi, ki mwikalabi kabidi ku dilwa dya Mwânà wa muntu.” “Bu mwakadibi mu matuku a Lota,

mwàkapàtukà bantu basatu mu Sodoma, ki mwikalabi kabidi mu cikondo cyabuuludiibwa Mwànà wa muntu.” Ndi nteela anu Mifundu cyanaana, Dìyì dya Mukalenge, bu mudibi ne: “Dyulu ne buloba nebijimine . . .” Neciikale banyààbanyà!

<sup>170</sup> Monaayi mwab’ewu. Mòsà udi upweka uya kudi Aalona. Bivwa bikengela Mòsà ikale Nzambi. Nzambi nguvwa mumwambile bwa ikale Nzambi, ne: “Ikala wêwè Nzambi, ne Aalona mwaneenu ikale muprofeta webe. Teeka mêyì mukana mwende pawikala wêwè kuyi mwa kwakula bîmpè.” Yèyè ne: “Kadi wâkenza muntu kamama nganyi? Wâkenza bwa muntu kwikalaye wakula nganyi?” Mukalenge ngwâkenza.

<sup>171</sup> Ki kupwekaye kuntwaku. Wakenza cinyi? Wakenza cishima cilelela ne cijaalame civwa Nzambi mumwambile bwa kwenza. Nzambi wakamwambila ne: “Nda wêlè dikombo dyebe panshi.” Kudyambulaye, ne dikaavwa nyoka. Kumwambulaye, ne cyakandamuka cyakabidi dikombo. Yèyè ne: “Uye kenza aci kumpala kwa Pâlò, wâmbè ne: ‘EMU MMUDI MUKALENGE WAMBA.’”

<sup>172</sup> Kadi Pâlò mmwenze anu umona aci, twêtù tudi twamba ne: “Mona’s, dìyelè dikese dya beena majimbu edi.” Yèyè ne: “Apa kamwena bwa nsongo to. Eci’s ndubuku anyi cintu kampana, udi mumanye’s. Tudi ne bantu mu bulongolodi bwetu badi mwa kwenza cintu cimwecimwe aci. ‘Lwâ mwab’ewu, Mwepiskopo *Kampanda*. Ne, wêwè, patukilabi kuneeku tŭng.’ Tudi naabo bàdi mwa kwenza cintu cimwecimwe aci.” Ûvwa n’Sataana wakwila kudi Pâlò.

Ûvwa n’Nzambi wakwila kudi Mòsà.

<sup>173</sup> Kadi tangilaayi mulumyana udi upatuka ewu. Yane ne Yambele kupatukabo pwàà kumpala kwa Mòsà, ne kumpala kwa bantu bônso bitwilangane, ne kwenzabo cishima ne cishima cyònsò civwa Mòsà mwa kwenza aci. “Nebaseswishe Basungula mene bu ne bivwa mwa kwenzeka.” Ncya bushuwa anyi? Baakenza cintu cimwecimwe cyàkenzà Mòsà aci. Nuumvu anyi? Mpindyewu nuvuluke ne, ng’EMU MMUDI MUFUNDU WAMBA, ne nebyenzeke cyakabidi mu matuku a ndekeelu.

Dishiilangana pankaci paa Mòsà ne Yambele divwa cinyi?

Mòsà wakamba ne: “Mashi alwe mu mâyì.”

Ki baprofeta baa mashimi aba ne: “Cya bushuwa, tudi peetu twela mashi mu mâyì, twêtù.” Ne byakenzeka.

Ki Mòsà kwambaye ne: “Nkùpà yilwe.” Ûvwa uyangata penyi? Buludi kudi Nzambi. Nwamonu anyi?

Kadi wâkenza cinyi? Wâkamba ne: “Ee, bushuwa, tudi peetu mwa kupatula nkùpà, twêtù aba.” Ki kucyenzabo. Cishima cyònsò civwa Mòsà mwa kwenza aci, bavwa paabo mwa kucyenza, bôbò abu!

174 Vulukaayi, kanucipu mwoyi, netukakufike, paanyima paa katanci. Badi mwa kwenza cyonsò cidi bakwabo baa kudibo mwa kwenza aci, kadi kabeena mwa kushaala ne Dîyi to. Kabeena mwa kushaala ne Dîyi to.

175 Mpindyewu monaayi, bôbò baakacyenza. Kadi Môsà, muprofeta mulelela mutuma kudi Nzambi, mutuma kudi Nzambi ne mudimu wa dyanza, kaakakokanganaku naabo to, wamba ne: “Mona, kanwena mwa kwenza aci to! Kanwena mwa kucyenza to!” Kubalekelaye anu cyanaana, kubalekelaye bätungunuka. Bôbò mbaprofeta baa mu malongolodi, kadi tungunukaayi’s.

176 Môsà wakatungunuka kuyaye anu kumpala, uteeleja Nzambi. Cyonsò civwa Nzambi wamba ne: “Mpindyewu enza *cikampanda*,” Môsà uvwa uya kacyenza. Uvwa wenza cintu cipyacipya. Pavwabo bôbò bacyenza, yonsò wa kudibo uvwa ne disaluka anyi cintu kampanda, ki bôbò bälwalwà aba. Bavwa paabo benza, bôbò, anu menemene muvwa Môsà mwenze amu.

177 Mpindyewu monaayaayaaku. Balumyana biine aba baakamweneka . . . Kaa, nwênù bakwetu, eci kacinupiciku to! Bashimakajanganyi aba, batentudi aba, bôbò baakamweneka paanyima paa mulelela awu mumane kumweneka yèyè dyambedi. Nwamonu anyi? Bôbò badi balwa bwa kutentula. Nwamonu’s, bikengela bàcyenzè. Dyabulu kêna mwa kufuka cintu to; utu anu munyangakaji wa cya ku muji.

Nenku mpekaatu ncinyi? Mbwakane bunyangakaja. Masandi ncinyi? Cyenzedi cilulame cinyangakaja. Mashimi ncinyi? Bulelela buumvwija bibi. Dinyangakaja!

178 Tangilaayi Hananiya, dinyangakaja dya Dîyi dya ku muji. Tangilaayi Baalama, dinyangakaja dya Dîyi dya ku muji. Tangilaayi Zedekiya, dinyangakaja dya Dîyi dya ku muji.

Ne Bible mmwambe ne balumyana aba nebamweneke, paanyima paa dinyangakaja . . . anyi bwa kunyangakaja Dîyi dya ku muji dishindika ne dijaadika ne m’Bulelela.

179 “Kwata mudimu wa mutangadiki,” mu ditumba dyadya kuntu kwaka, “fila cijaadiki mu kaabujima cya mudimu webe wa bwambi. Bwalu cikondo necilwe ciikalabo kabayi batwala Dilongesha dishindame to, kadi bilondeshile nkuka yabo bôbò biine nebadyungwijiilè balongeshi, biikàle ne maci asansakana; pashiishe nebatungunuke ne kwenza cyonsò cidibo baswe kwenza aci, ne: ‘Mbîmpè, tudi ne bimanyinu bimwebimwe abi ne maalù a kukema.’ Nenku nebèlè nyima ku Bulelela, ne nebadibwinke mu myanu, mèyi maswika.”

180 Kaa, dimanyisha dya Nyuma Mwîmpè, kaneemu kàdì kätutà ku musuuka wa muntu padiye wimana bwa kwelangana meeji mushindu udibi bilelela ne bitooke kumpala kwetu mene! Umbulaayi nujuule dibwe dya mu ditumba adi pambelu apa nubale dibeji didi ditèekamù adi, kukaadi bidimu makumi asatu

ne bisatu. Numone cyakambaYe kuntu kwaka mu—mu mùsèèsù wa Seventh Street, mu dinda dyàkatèèkiibwà dibwe diine dya mu ditumba edi adi. Mpindyewu citangilaayi. Tangilaayi kwinshi ku musulu eku, pààkapwekà Mwanjelo wa Mukalenge mu mmwenekelu wa Dikunji dya Kapyà, ekeleeziya nkama, anyi bantu baa mu maekeleeziya, biimane ku mwelelu wa musulu aku; cyakambaYe aci, tangilaayibi nî ncyûle. Monaayi bidi byenzeke.

<sup>181</sup> Mbikole bya menemene. Ndi mumanye ne bidi bimweka ne mbikole, bânà beetu, pambelu pààpa. Kadi bidi. . . Bible utu mwambe, Yesu ngudi mwambe Yèyè mwine ne: “Mbifwanyine kuseeswisha ne Basungula mene bu ne bivwa mwa kwenzeka.” Kakwena mushindu wa kucicinguluka nansha. Kabakwikalaku ne mushindu wa kuCimona to. Bu ne bivwa mwa kwenzeka, ne Basungula mene bavwa mwa kuseeswishiibwa ku cyôci aci.

<sup>182</sup> Monaayi, balumyana aba baakamweneka paanyima paa mulaaba maanyi mulelela mumane kutumiibwa; ku muprofeta Wende mulelela, Môsà. Nenku pavwa Môsà mwa kwenza cintu kana cyônsò, bôbò bavwa mwa kucitentula.

<sup>183</sup> Mpindyewu, mwaneetu wa balume, mwaneetu wa bakaji, mêmè. . . Ewu ng'ekeleeziya wanyi mêmè mwine. Ndi ne bukenji bwa kuyiisha bîndi muswe, padibi ne mbya mu Dîyî dya Nzambi. Kadi ncyêna nnupiisha nwênù aba to, kadi tukenketaayi cyôci aci bwa cikondo ne dîbà ditudi ne mwoyi mpindyewu.

<sup>184</sup> Myoyi kudi Mwaneetu Ruddell, kudi Junior Jackson, ne kudi badi pambelu apa, ekeleeziya myânà yetu. Nkaavwa mubapwe mwoyi, kukaadi katanci. Ngeela meeji ne badi paabo ku nshinga mu dinda edi, bôbò, bwalu kamwena—kamwena myaba mu ekeleeziya to.

<sup>185</sup> Anji elanganaayi anu meeji ku bwalu abu mpindyewu, bwa katanci kakese cyanaana. Baakenza bishima bimwebimwe byâkenzà Môsà abi. Môsà wakapatula nkùpà; baakatentula cyôci aci kadi kupatulabo nkùpà. Nwamonu anyi?

Nzambi wakamba ne: “Dituku dinwacidya, dituku adi ki dinwafwa.”

<sup>186</sup> Sataana ulwa pende mwaba awu kwamba ne: “Bulelela, kanwakufwa to. Nenwikale anu ne lungenyi lutambidile. Nenupete bulongolodi butambe bwîmpè, butambe bwîmpè. . .” Nudi bamanye's. “Nudi bamanye's, byônsò nebiikale bitambe bwîmpè bwenu nwênù, nenupete Bukênkè bupite apu.” Nwamonu's, anu dinyangakaja cyanaana. Bivwa bikengela. . .

<sup>187</sup> Nenku vulukaayi, EMU MMUDI MUKALENGE WAMBA, bilondeshile Timote Mwibîdi 3.18, ne: “Mu matuku a ndekeelu, Yane ewu ne Yambele nebiikale pa buloba.” Mpindyewu, ndi muswe bwa nwênù kumona ne kudi babidi abu, nwamonu's, batentudi.



188 Mpindyewu netwalukile ku Sodoma, paapita katanci, basatu abu, tupete Banjelo basatu baakapweka abu, bwa kumona ditentula, ne bikwabo, nwamonu's, bwa kumona ne udi wa bushuwa ngwèpì ne udi wa mashimi ngwèpì. Nwamonu anyi? Nwamonu anyi?

189 Monaayi, bakenza bishima bimwebimwe abi. Kadi, monaayi, bôbò baakatentula paanyima paa Dîyì dya cya bushuwa adi dimane kwikala dilaaba maanyi, kudi mulelela awu uvwa Nzambi mutume; baakalonda, biibidi.

190 Ndi ndikonka ní tudi bafwanyineku kwelangana meeji bwa katanci. Kukwata kwa bantu ku cyanza, anu abidi adi panshi aa's, kukaadi bidimu bitwe ku makumi abidi, ne cimanyinu cimweneka. Balumyana wa yaaya, s'kukaavwa bimanyinu bipite bûngi ne bintu mu myaba yônsò, ne bantu bônsò. . . Ewu mwikale naaci mu cyanza cya dyabalume; ewu mwikale naaci mu cyanza cya dyabakaji; mukwabo yêyê umvwa mpuuya waci. Nwamonu's, mishindu yônsò ya. . . Kadi ndi ndikonka. . . Nzambi kaakungaanyishila bwa kunwambila pa dîbà edi ne ncinyi civwa menemene bulelela to, kadi dîngà dituku nenujandule. Civwa anu bwa kumwenesha dikutakana dyabo. Kacivwa cya bushuwa to, anu kwine kwônsò aku. Nènnwâmbilè, dîngà dituku, bu Mukalenge mwa kwanyisha.

191 Monaayi, baakenza bishima byôbì bimwebimwe abi, kadi kabavwa. . . Monaayi, kabaakabyenza to anu pakaavwa Dîyì dya ku muji adi dimane kupatuka, dyambedi. Mushindu awu ki wakenza Sataana mu budimi bwa Edena. Mushindu awu ki utuye mwenzenze dîbà dyônsò. Wâkamba ciprofeta wa kumpala nganyi? Môsà. Wâkamata mu cyalu wa kumpala nganyi, m'Môsà anyi m'Baalama? M'Môsà. Wâkamata mu cyalu wa kumpala nganyi, n'Yelemiya anyi ng'Hananiya? Nudi numona cîndì muswe kwamba anyi?

192 Monaayi, bôbò baakatentula. Batentudi baa mu musunya, ne meeji matooke, beela meeji ne bavwa "benzela Nzambi mudimu," bu mwakenza Davidi, lumingu lushaale, kadi ditentula dya mu musunya. Ndi ngindila anu kakese. Ndi muswe bwa nwênù kwelangana meeji pankaci paa myaba eyi. Mêmè nciyi mucyâmbè to, n'ya bushuwa ne Nyuma Mwimpè neacisokolole, nangananga kudi Basungula. Nwamonu anyi?

193 Dingumba dya Pâlò didi dyamba ne: "Tudi ne bantu badi mwa kwenza cintu cimwecimwe aci," ne bàakacyènza. Nudi numona anyi? Pâlò wakenza nunku bwa cinyi? Nzambi wakacyanyishila bwa cinyi? Bwa cinyi Nzambi uvwa mwa kutuma muprofeta mulelela, mulaaba maanyi bwa kupwekaye kuntwaku bwa kwenza cimanyinu kumpala kwa Pâlò, kadi pasiishe kulekela ditentula dya cyena mangumba dilwa bwa kutentula cyôcì aci kumpala kwa bantu? Bwa cinyi buvwaYe mwa kulekela mutentudi ujuuka bwa kucyenza, ne

kwenza cintu cimwecimwe aci anu menemene muvwa Nyuma mushuwashuwale wa Nzambi mwenze? Nwamonu's, Mufundu udi ne cya kuula.

<sup>194</sup> Monaayi, Yèyè wakenza bwalu ebu bwa kumonaYe mwa kupapisha mwoyi wa Pâlò ne wa beena Ejipitu, bwa bôbò kujaadikilangana ne Mòsà kavwa anu yèyè nkaayende uvwa ne Dìyì to. Bavwa mwa kwenza byònsò anu mushindu umweumwe uvwa Mòsà mwa kwenza awu.

<sup>195</sup> Kadi mbwa cinyi budi Nzambi mulekele cintu eci cyenzeka mu matuku a ndekeelu? Pa nanku, cintu cimwecimwe anu muvwa nyuma wa mashimi mwambile Zedekiya ne: “Mmunyi mutwafikisha Aakaba bwa kuyaye kuntu kwaka, bwa kufikisha maalu aa ku dyanzeke?” Mmunyi mwafikishaYe bantu aba, badi beeyemene ekeleeziya yabo aba, ku dipatuka kaaba aka bwa kulekela cintu eci kwenzekaci, cyakadyanjilaYe kwamba aci? Bôbò, mu Cikondo eci cya Ekeleeziya wa Laodikiya: “Bwalu udi wamba ne udi ‘mubanji, ne kwèna dijinga ne cintu. Ndi musòmbe bu mukalenge-mukaji.’ Kuyi ne cintu nansha cimwe! Kwèna mumanye ne udi mwena dikenga, mukengeledi wa luse, mpofo anyi? Kadi ndi nkubela bwa ulwe kusumba kùndi Mémè,” mwakambaYe, “maanyi ne ngòlò.” Yèyè wakacyenza bwa cinyi?

<sup>196</sup> Bwa cinyi mMulekele ditentula edi dijuuka mu matuku a ndekeelu aa, padi bintu ebi munkaci mwa kwenzeka ku Dìyì dya Nzambi dilelela; kadi kulekela batentudi bajuuka ne benza cintu cimwecimwe aci, kadi kuvila Dìyì dilelela dya Nzambi? Yèyè wakacyenza bwa Mòsà. Kadi Pâlò wakacyenza mwikale ulwisha Mòsà; ne bôbò abu, Yane ne Yambele, baakacyenza biikale balwisha Mòsà. Ne Bible mmwambe ne necyenzeke cyakabidi mu matuku a ndekeelu. S’ki twètù aba. Mpindyewu, piikalabi ne aci kí m’Mufundu mûle to, cidi penyi?

<sup>197</sup> Mòsà wakakokanganaku naabo wamba ne: “Mona! Mona! Kanwena mwa kwenza aci to. Mémè ki èhelè udi muteekiibwe bwa kwenza aci. Mona! Imanyikaayi aci, mpindyewu mene?” Yèyè wakabalekela anu bàtùngunuka.

<sup>198</sup> Balekelaayi batungunuke. Nwavulukaaayi ne, Bible mmwambe ne: “Anu mwakamweneshiibwa dikutakana dyabo amu, ki mwamweneshiibwa kabidi dya bôbò aba mu dituku dya ndekeelu,” piikalà Mukaji-musela mwambwibwe mubwele mu dyulu. Monaayi.

Mòsà, Dìyì dilelela dimweneshiibwe, kaakambaku cintu nansha cimwe to, wakabilekela anu byenzeka. Kadi Yèyè wakenza aci bwa kumonaYe mwa kupapisha mwoyi wa Pâlò, bwa kuseeswisha Pâlò.

<sup>199</sup> Wàkenza ciine cintu cimwecimwe aci bwa kumonaYe mwa kuseeswisha Aakaba. Kadi kalumyana kamwepele kavwa kiimane paa nkaayaaku kwaka aku, ka-Miika aku, kabambila ne: “EMU MMUDI MUKALENGE WAMBA.” Mukwabo nyewu

mwimane, mulaaba maanyi: “EMU MMUDI MUKALENGE WAMBA.” Bamba maalú abengangana, ewu ne ewu.

<sup>200</sup> Tudi biimane leelu wa Ndaaya ewu ne EMU MMUDI MUKALENGE WAMBA, ne dibatiiza dya mu màyi mu matuku a ndekeelu didi ne cya kwikala mu Dîná dya Yesu Kilisto. Kadi mukwabo muntu pende wimana mwikale wenza bishima, kadi, Trinitaire.

<sup>201</sup> Ndeejaaayi mwaku *busatu* mu Bible. Ndeejaaayi mwaba udiku Nzambi yisatu. Ndeejaaayi mwaba udiku bintu bya mushindu awu. Kacyena mu Dîyi dya Nzambi to. Kakutu cintu bu ne muntu kampanda ukaadiku mubatiijiibwe mu dîná dya “Taatu, Mwâna, Nyuma Mwîmpè,” bàsòka myânzu ayi to. Bintu byònsò ebi ne: “Kaa, s’bidi anu bîmpè, nwênù bàná beetu baa bakaji. Bidi anu bîmpè, ikalaayi anu ne mile. . . ne nsuki yenu mîpi ayi. Bidi anu bîmpè, kabyena binukengela kwenza *cikampanda*, *cikansanga*, anyi *cikankenga* to. Kaa, abi’s ndukutukutu’s, muntu wa meeji a cyena kale.”

<sup>202</sup> Kadi Bible’s ngudi mwambe! Ne Yêyè ngwâkalaya ne: “Mu matuku a ndekeelu, Yêyè neatume Nyuma wa Eliya, ne neabiikile bantu, bàná baa Nzambi, ubaaluja ku Diitabuujja dya ku muji anu muvwabi ku cibangidilu, cya Dîyi.” Dîyi adi dyakashindikiiibwa, Mwâna wa muntu mu matuku a ndekeelu, umwèumwè awu anu muvwabi ku Sodoma; makeelela, leelu, too ne kashidi. Yêyè ngwâkalaya bwa kucyenza. Mmulayi wa Nzambi. Cidi EMU MMUDI MUKALENGE WAMBA.

Monaayi, baakenza cintu cimwecimwe aci, anu mwakenza Mòsà amu, too ne mwakatondabi Nzambi.

<sup>203</sup> Mpindyewu nwavulukaaayi ne, cidi ng’EMU MMUDI MUKALENGE WAMBA, necyenzeke mu dituku edi. Mpindyewu, kenketaayi pa buloba bujima; angataayi kasumbu kònsò, angataayi cyòtà cyònsò, angataayi muntu yònsò, angataayi ekeleeziya yònsò! Ndi nnwomekela bujitu abu, mu Dîná dya Kilisto, bwa kwenza cyòci eci, nwênù bayiishi. Ndi nnwomekela bujitu bwa kubala bibejibeji anyi kwikala kutangila mwaba wònsò unudi baswe kuya awu, bwa kumona bwalu ebu ní kabwena pa buloba mpindyewu mene. Nwamonu anyi?

<sup>204</sup> Dìbà adi, Maataayi 24.24 ngwa cya bushuwa menemene. “Balaaba maanyi baa mashimi, nebajuuke mu matuku a ndekeelu, ne nebiikale bapofeta baa mashimi, ne nebaseeswishe bààbùngì.” Citangilaayi mu bifwanyikijilu mpindyewu, padici cilwa mpindyewu apa, nwamonu’s: “Nebaseeswishe bààbùngì.” “Bapofeta,” ku bùngì; “ba-Kilisto,” balaaba maanyi, ku bùngì; bààbùngì bashiileshiilangane, ba-Méthodistes, nudi bamanye’s, ne ba-Baptistes, ne beena Mpenta, ne bakwabo. Nwamonu anyi?

Kadi kudi Nyuma umwepel mulelelae Kilisto, ki Dîyi divwijiibwe mubidi bu mwakalayaYe bwa kucyenza.

Mpindyewu netutungunuke tuye kule ndambu, ku mikwabo Mifundu.

Mu mushindu wa ne, byakatonda Nzambi, ki kujikabi. Dikutakana dyabo dyakamweneshiibwa.

<sup>205</sup> Monaayi. Nwavulukaayi ne, cizubu ncifwanangane anu menemene ne lutete lwa blé. Nwamonu anyi? Mpindyewu, kuvwa mufwanyine kwamba, mwamwa mu cikondo cya Luther ne, “cicolakola civwa blé” to, nansha mudici ne Mwoyi munda mwaci amu. Cicolakola cidi anu bîmpè, Mwoyi mu cicolakola uvwa anu bîmpè, kadi, vulukaayi ne, Mwoyi wakatungunuka anu ne lwendu; wakatungunuka kuumuka ku Elisha uya ku Eliya. Mwoyi mmutungunuke anu ne lwendu. Kadi, vulukaayi ne, cidi mu citupa cikwabo cya lwendu. Kacyena mwa kushaadila mu aci citupa to. Katwena mwa kudya cintu cibole cya cikondo cikwabo kampanda to. Katwena mwa kudya cintu cibole cya beena Mpenta, cya ba-Méthodistes, anyi cya ba-Baptistes to. Nwamonu’s, cikaadi cilwe cintu cibole. Twètù tudi ne Cyakudya cibishi, Dîyi dya dîbà edi, ne bikwabo.

<sup>206</sup> Vulukaayi ne, cizubu ncifwanangane anu menemene ne lutete lwa blé. Kwèna mwa. . . Kacivwa cifwanangane naalu mu kabiji kaa mutoloku to, kacivwa cifwanangane naalu mu mwepu to, kadi ncyá bushuwa ne civwa cifwanangane naalu mu cizubu. Kacivwa cifwanangane naalu mu. . . Yesu Kilisto umwèumwè awu makelela, mu Luther to; kacivwa cifwanangane naalu mu Wesley to; kadi ncyá bushuwa ne ncifwanangane naalu mu Mpenta, cifwanyine “kuseeswisha ne Basungula mene bu ne bivwa mwa kwenzeka.” Nwamonu anyi? Ki bikondo byenu mbyôbi abi.

<sup>207</sup> Kadi nwavulukaayi ne, ekeleeziya wa cyena Mpenta awu, mu matuku a ndekeelu, ki uvwa Laodikiya; ne Kilisto uvwa mwediibwe pambelu, Mùsà, Blé, Yèyè mwine. PaakateetaYe. . . Vulukaayi ne, paakateetaYe kuDimwenesha mu ekeleeziya, Wakeediibwe pambelu. Cicivwa anu ekeleeziya, muvwaye udyamba’s; mulaaba maanyi.

<sup>208</sup> Kadi ki Dîyi ndyôdi *edi*, Kilisto Yèyè mwine, ki Dîyî dilaaba diikalà mwa kulwa bwa cikwabo citupà cya Mubidi Wende, Mukaji-musela. Balaaba maanyi, ne mâyi amweamwe awwa manyamina pa blé awu, bu mutwâmbi, adi amyaminyiibwa kabidi pa lupela, balaaba maanyi. Anu Basungula, anyi badi badyanjila kulongolola, ki baakumbana mwa kusunguluja dishiilangana pankaci pààbì. Mpindyewu, Efeso 5.1 udi unwambila nanku, ne mushindu uvwabi.

<sup>209</sup> Mbalaaba maanyi. Bantu bônso badi bamba ne: “Butumbi kudi Nzambi! Tudi ne budishikaminyi mwab’ewu. Aleluuyah! Tudi. . . Kaa, aleluuyah! Tudi twakula mu myakulu, ne tutupika. Tudi ne budishikaminyi bwa bakaji; nwènù ki badi bateeta kubateeka mwinshi mwa bintu bya mishindu yônso ebi abu.”

Nwamonu anyi? Ndaayi anu kumpala. Kakwena cinudi mwa kwenza nansha cimwe to. Nwamba ne: “Ee, tudi twakula mu myakulu. Tudi twela mbila. Tudi tuja maja mu Nyuma. Tudi tuyiisha Dîyi.” Kakuyi mpatà to. Kakwena cya dyamba pa bwalu abu to. Ki mudi bantu aba kabidi mu Bible emu.

Yesu wakamba ne: “Ncifwanyine kuseeswisha Basungula mene bu ne bivwa mwa kwenzeka, Basungula mene.”

<sup>210</sup> Mpindyewu monaayi, cizubu . . . Kubangila anu ku Lutete lwa ku cibangidilu, Lutete lwàkayà mu buloba alu, Lwôlò kaluvwaku bulongolodi to. Luvwa Lutete lumwepele, mu Lwôlò. Kadi dîbà dyâpâtukuci, kacivwa Lutete nansha; cikaavwa bulongolodi, nwamonu’s, mabeji, blé.

Pashiishe Lwôlò kubwela mu citupa cikwabo, cìvwà ciikàle mwepu. Kadi kacivwa anu bu ku cibangidilu to. Cìvwa bulongolodi.

<sup>211</sup> Kubwelalu mu cizubu, mabeji àbûngi, Mpenta, lwenze bu lwangate mbungakeenu mpindyewu. Lutangilaayi numone. Ludi lwenda lwangata mbungakeenu dîbà dyônsò, biswa kwenza menemene anu bu cintu cimwecimwe aci, cifwanangane menemene anu ne Lutete lwa blé paudi umona kaacibombi kakese aku.

<sup>212</sup> Kadi ndekeelu wa byônsò Lwôlò kumweneshiibwa, kakuyi bulongolodi to. Kakuciyi kabidi byambudi to. Bulongolodi budi anu cyambudi cyanaana. Kakuciyi kabidi byambudi to; cikolakola cidi ne cya kufwa, cizubu cidi ne cya kufwa, bikwabo byônsò bidi ne cya kufwa, kadi blé udi yêyè utungunuka ne kwikala ne mwoyi. Ki mubidi wa dibiika dya ku lufu ngwôwù awu, upweka buludi kadi kulwa kubambula. “Aba bàdi baa ndekeelu nebiikale baa kumpala, ne aba bàdi baa kumpala nebiikale baa ndekeelu.” Nwamonu’s, ubambula mu dibiika dya ku lufu. Nudi nulonda bwalu ebu anyi? [Disangisha didi dyamba ne: “Amen.”—Muf.] Eyo. Monaayi, lutete ludi . . .

<sup>213</sup> Cizubu ncifwanangane anu menemene ne lutete. Nenku muntu utu ukuna blé mu ferme, anyi cikwabo cintu, mmufwanyine kutangila kadi kwamba ne: “Nzambi atumbe, nkaadi ne blé wa dipoola,” pende kayi ne blé nansha wa kânà to. Hmm? Ncifwanangane menemene anu ne blé, kadi ncizubu.

<sup>214</sup> Mpindyewu, balunda baanyi, alukilaayiku naanyi cyanyima. Ditabuluja dya kumpala dyâkenzekela penyi, paanyima paa (lufu) matuku avwabi bikengela bwa lutete lwa blé kumatalu mu buloba, Mubidi, Mukaji-musela wa Kilisto awu? Kilisto wakalongolola Mukaji-musela Wende, mmwômò anyi, Ekeleeziya Wende awu? Kacyakacya Yêyè kaakaMuvwijaku bulongolodi to; Yêyè wakateeka anu bapostolo, baprofeta, ne bakwabo, mu Ekeleeziya, bwa kuMulama mukezuke. Kadi ku Nicée, Loomo, paanyima paa bidimu nkama yisatu ne bisambombo, bôbô e kumulungololabo ne kumuvwijabo

bulongolodi. Mmwômò anyi? Ki kufwaye. Cintu cyônsò civwa kaciyi ciitabangana ne ekeleeziya awu civwa cishipiibwa. Nenku kushaalye kayi unyunga to, munda mwa nkama ya bidimu, mu buloba.

<sup>215</sup> Kadi, paanyima paa cikondo, ki kujuukaye mu Luther. Tuntonga tukese twa kumpala twa blé kupatukatu. Kiiibîdi, kôkò ki kupatulaku ntonga kuumukila apu. Kutungunukatu, kupeta Zwingli ne bakwabo, ne makwabo malongolodi ne bikwabo. Pashiishe, paanyima paa cikondo, ba-Anglicans kupatukabo.

<sup>216</sup> Nenku pashiishe ncinyi cyàkenzekà? Ki Wesley ulwâlwa ewu ne ditabuluja dipyadiya, mwepu, udi umweka mutambe kufwanangana ne Blé. Pashiishe ncinyi cyàkenzekelà aci? Aci kudyenza bulongolodi, ne cyakuuma ne cyakafwa.

<sup>217</sup> Mwoyi wakabwela buludi mu cizubu, ki cizubu kupatukaci ciikàle cyamba kufwanangana menemene anu ne Blé. Kadi, ndekeelu wa byônsò, dikutakana dyaci dyalu kumweneshiibwa mu bidimu mwandamukulu anyi dikumi bishaale ebi, nangananga mu bidimu bisatu bishaale ebi. Mpindyewu cidi cyenza cinyi? Cidikoka cyumuka ku Blé.

<sup>218</sup> Mpindyewu bwa cinyi kî nkubangeku bulongolodi mu bidimu makumi abidi ebi bya ditabuluja edi; s'mbaprofeta balaaba maanyi, balongeshi balaaba maanyi, ne bikwabo, kadi mbwa cinyi kabuyiku? Kakwena cintu nansha cimwe paudi upita Lutete to. Nwamonu's, Lwôlù alu ndwalukile, kakuyi bulongolodi to. Kaa, ekelekele, muntu mpofo's mmufwanyine kumona aci. Kalwena mwa kudyenza bulongolodi to; Ludi lubengangana naabu ne mwalu mwônsò. Ndutete lwa Blé, Lwôlù lwine. Mwânà wa muntu neamweneshiibwe. Lutete lwa Blé nelwalukile cyakabidi ku Lwôlù lwine, Mwânà wa muntu mu matuku a ndekeelu.

<sup>219</sup> "Nenku nekulwe matentula a mashimi a Cyôci aci, mu matuku a ndekeelu, ikalà mafwanyine kuseeswisha Basungula bu ne bivwa mwa kwenzeka." Tangilaayi bizubu byabo bya cyena bulongolodi mukaadibi bidikoka byumuka mpindyewu.

<sup>220</sup> Cidi anu cishiya Blé bwa amanyike, kudi Basungula, badi biikale citupa Cyende. Monaayi mudi eci citwadiibwe mwômò emu bilenga bya dikema mpindyewu. Anu. . . Monaayi, balaaba maanyi nebakumbane kucyenza; Basungula, balelela, badyanjila kulongolola, Efeso 5.1, to, 1.5, nebiikale bateekiibwe, basungudiibwe. Anu bôbò nkaayabo ki biikalaci kaciyi mwa kuseeswisha.

<sup>221</sup> Monaayi, baprofeta balaaba maanyi abu nebiikale baa mashimi, kadi munkaci amu nemwikale balaaba maanyi balelela. Mmunyi munwabasunguluja? Ku Dîyi. Bu mutudi naabi mu mindidimbi emu. Nudi numona bwalu abu anyi? Ambaayi ne: "Amen." [Disangisha didi dyamba ne: "Amen."—Muf.] Nwamonu anyi?

<sup>222</sup> Monaayi, balaaba maanyi, anu Dîyi ki dyabatapulula, kî mbimanyinu to. Kaa, to. Nebênzè bimanyinu bimwebimwe abi, kadi Dîyi ki dyakabatapulula. Cya bushuwa's. Bônso baakafila biprofeta. Bônso baakenza *bikampanda*, *bikansanga*, ne *bikankenga*, bushuwa, anu mushindu wumwewumwe awu. Yesu wakamba ne nebênzè cintu cimwecimwe aci. Kadi Dîyi ki dyakabatapulula, numonaayi, kî mbimanyinu to.

<sup>223</sup> Nukaavwa bamone anyi? Yesu ngudi mwambe mwaba ewu, mu Maataayi 24. Yêyè kaakamba ne: "Nekujuuke ba-Yesu baa mashimi mu matuku a ndekeelu" to. Kaa, to, kî mbafwanyineku kushaala bapuwe bwa cyôci aci nansha. To. Upeta mwena Mpenta mwikale mwena Mpenta wetu mulelela ewu, udyamba, yêyè mwine, mudiye "Yesu"? Nwamonu anyi? Upeta Méthodiste wa mashimi, anyi Baptiste, anyi kampanda wa mushindu awu, anyi bumwe bwa ku malongolodi awu, bamba ne: "Twêtù tudi Yesu"? Bôbò's mbamanye mwa kucyepuka. Kabaakwenza aci to. Kadi Bible mmwambe ne nebiikale "ba-Kilisto baa mashimi," kabayi ba-Yesu to, kadi, "ba-Kilisto baa mashimi." Kî mbafwanyine kujingulula, bamba ne: "Ndi Yesu" to. Kaa, to.

<sup>224</sup> Kadi "mba-Kilisto baa mashimi," kadi kabayi bacimanye to, bwalu badi babengangana ne Dîyi. Ne Nzambi udi ushindika cintu cimwecimwe aci. Mpindyewu, ndi nya ne bwalu ebu mutangile naabu buludi ku diteetangana dya makanda mpindyewu, bwalu nwamonu cintu cimwecimwe aci cyenjiibwe kudi bantu aba cidi cyenjiibwe kudi balelela. Ne Yesu wakamba nanku.

<sup>225</sup> Mpindyewu, bu mûngâmbì, mpindyewu nwênù badi pambelu, mu citupa cidi telefone ufika mwamwa, mêmè—mêmè ncyèna nnuipiisha to, kadi ewu ng'ekeleeziya wanyi mêmè ne—ne kasumbu kaanyi kadi Nyuma Mwîmpè munteeke kumutu, ne bûndi naabu mbwa kubambila Bulelela. Dîbà dikaadi dyenda diya.

<sup>226</sup> Mpindyewu, kî mbafwanyine kutwala aci to, kadi, "ba-Kilisto baa mashimi," baa mashimi, balaaba maanyi, bamba kwikala ne cimanyinu cyônso ne dileeta dyônso dya Dîyi. "Badi biitabuuja dibatiiza dya Nyuma Mwîmpè anyi?" Kakuyi mpatà to. "Biitabuuja *bikampanda* byônso anyi?" Eyowa. "Biitabuuja dyakula dya mu myakulu anyi?" Eyowa. "Biitabuuja ne bimanyinu ne maalu a kukema bidi byenda bilonda, ne bimanyinu nebibashindikije anyi?" Eyowa. Abu kî mba-Méthodistes to, kî mba-Baptistes to. To, to. Abu mbeena Mpenta. Nwamonu's, dituku dya ndekeelu ndyôdi edi.

<sup>227</sup> Mpindyewu, cikondo cya kumpala cya ekeleeziya kacivwa cifwanyine kwikalaku cimone aci to. Cikondo cya ekeleeziya cya ba-Méthodistes kacyakacimonaku to; cikondo cya ekeleeziya cya ba-Baptistes, kabaakacimonaku to; cikondo cya ekeleeziya cya ba-Presbytériens, kabaakacimonaku to. Kadi, beena Mpenta,

bafwanangane menemene ne Cintu cilelela! Mwômò amu, ki mudi Blé...cizubu cyàmba kufwanangana ne Blé. Bôbò kî mbafwanyine kucimonaku to. Nwamonu anyi? Kî mbafwanyine kucimona to. Kadi mmatuku a ndekeelu, dituku edi. Eyowa's, mukalenge.

<sup>228</sup> Monaayi, anu muvwabi ku cibangidilu, ki mwikalabi kabidi ku ndekeelu. Muvwa Eva muumvwije bibi Dìyì dimwepele, Sataana muumvwije Eva, yêyè pende kuciitabuuja. Mukaji, kî mmulume to; ekeleeziya, kî n'Yêyè to. Nwamonu anyi? Ekeleeziya nguvwa mupete dîyì dya mashimi. Nwamonu anyi? Kî ng'Adama to; Eva. Kî n'Kilisto to; ekeleeziya, mukaji-musela, mulaaba maanyi, mudibo bacinka, udibiikila mudiye Mukaji-musela, nwamonu's, yêyè ngudi mupete dîyì dya mashimi.

<sup>229</sup> Kanwenaayiku mwa kumona aci anyi? Mona's, nciswikakane anu mùtù nshinga wa cisabaata amu, mùdì nkofya ya ku dîsù dyebe ayi. Mona's, mwaba wônsò uwabuulula awu, mu Bible, Udi anu ubiswikakaja pamwe. Eve, kî ng'Adama to; Eve ngwâkaciitabuuja, kî ng'Adama to. Mukaji-musela leelu, wa ku dîna awu, ngudi mucitâbùùje; kî n'Kilisto to. Mukaji-musela awu udi naabi mishindu yônsò, mukaji-musela wa ku dîna awu; bimanyinu bimwebimwe abi, maalu a kukema amweamwe awu, bintu byônsò bimwebimwe abi; kadi kî n'Cilelela aci to. "Kuseeswisha Basungula bu ne bivwa mwa kwenzeka."

<sup>230</sup> Lukasalukasa mpindyewu, bu twêtù mwa kucijikijaku mu tusunsa dikumi ne tutaanu, netwikale pa dîbà. Monaayi ne ntema yônsò mpindyewu, bwa kanwikadi—kanwikadi nwâlwa kuumvwa bibi to, nwênù.

<sup>231</sup> Mpindyewu, to, bôbò kî mbafwanyineku kutwala bwa kubiikidibwabo ne "ba-Yesu" to. Kî mbafwanyine kwikala aci to, kutwala bwa kubiikilangana ne, "Yesu." Bwa aci to. Aci's nci tambe kwikala citooke be. Muntu yônsò ewu mmufwanyine kumanya aci. Muntu yônsò ewu mmufwanyine kumanya ne bôbò kabeena Yesu to. Nansha byôbi ne badi ne mashi mu mwongo, ne mashi mu byanza anyi kuulu ne kwinshi kwa mèsù, badi anu bamanya ne cidi. . . Muntu wetu yônsò wa meeji mu ôwò ewu, uvwa anu umanya ne kî n'Yesu to. Nwamonu anyi? Kî mbafwanyineku kutwala aci to. Kadi badi badibiikila ne "balaaba maanyi." Nenku badi benza bimanyinu ne maalu a kukema, "bàmba kuseeswisha Basungula." "Kadi ba-Kilisto baa mashimi, balaaba maanyi, nebajuuke, ne nebaseeswishe Basungula bu ne bivwa mwa kwenzeka."

Mpindyewu tangilaayi ne ntema. Dìyì dîndì ngamba edi kadinupiciku to, bwalu didi ne mushinga bwa kuditeeleja.

Ûdi ulamika anu kakaba kampanda kaa budimbwa ku cikokoloko eku mwab'ewu, bwa kaciikadi cidikupa eku ne eku to. Mêmè ki wakopakanyi; bisuululu mbimacile pa kakaba aku, nwamonu's.



Nenku neciikale anu muvwàYe, Bible, mwambe ne mmwikalàbi. Nwamonu anyi?

<sup>232</sup> Monaayi, kî mba-Yesu baa mashimi to. “Ba-Kilisto baa mashimi!” Badi biitabuuja ne mbalaaba maanyi, kadi mbamanye ne bôbò kabeena Yesu to. Nwamonu’s, aci’s ncitambe kwikala citooke be. Bu muntu mwa kuyaku leelu ewu, kwamba ne: “Monaayi bibangu mu byanza byanyi. Tangilaayi pa mpala paanyi apa. Mêmè’s ki Yesu.” Ee, mpindyewu, s’tudi bamanye ne aci ncyà mashimi. Nenku, vulukaayi ne, Yesu kaakambaku ne balumyana baa nanku awu nebamweneke to. Yêyè wakamba ne nekumweneke “ba-Kilisto baa mashimi.” “Ba-Kilisto,” ku bûngi, mangumba, ne bikwabo, *balaaba maanyi*; balaaba ne nyuma wa cyena mangumba, kî nne Dîyi to. Nudi nulonda aci anyi? Kî n’Yesu wa mashimi to. “Ba-Kilisto baa mashimi,” baa mashimi, balaaba maanyi. Nwamonu anyi? Kaa, mushindu mwine udi bi bitooke’s we! Mushindu mwine utudi... Ncyà bushuwa ne kacyakunupita to!

<sup>233</sup> Mpindyewu, vulukaayi ne, ntu anu ngenza kunwambila misangu yônsò ne kudi bitupa bisatu bya bantu. Kudi bisà bisatu bya bantu: Ham, Sem, ne Yafete, bisà bisatu. Bitupa bisatu, ki mêmè kwamba ne, mmwena kwitabuuja, mwena kwitabuuja wa budingibudingi, ne mwena bupidya. Ki mutubi misangu yônsò, ki mwibiikalabi misangu yônsò. Nwamonu anyi? Kuvwa Mòsà, mwena kwitabuuja; kuvwa Yane ne Yambele; beena bupidya. Nwamonu anyi? Kuvwa Baalama, Mòsà... Misangu yônsò anu bitupa bisatu bya bantu abi, bitupa bisatu; mwena kwitabuuja, mwena kwitabuuja wa budingibudingi, ne mwena bupidya.

<sup>234</sup> Mpindyewu vulukaayi ne, mwena bupidya, ekeleeziya wa cyena mangumba awu, kêna witabuuja bimanyinu to nansha kakese; mukwate mashika, wa maalu a kwîsûkwîsù, muumakane, ekeleeziya udi yêyè mu baa pa buloba, dingumba. Kadi mwena kwitabuuja wa budingibudingi ki cizubu aci. Ki mulumyana udi udingidija bu udi witabuuja awu. Ne pashiishe kudi mwena kwitabuuja mulelela udi mulelela anu wa menemene ewu. Mpindyewu, nubatangilaayi numone padibo benda baya pamwe mpindyewu, bwa katanci cyanaana.

<sup>235</sup> Nenku monaayi beena bupidya aba mudibo ne dikamakama, anyi beena kwitabuuja baa budingibudingi ne beena bupidya aba. Ekelekele! Badi ne dikamakama, tangilaayi, anu muvwa Sataana mwimane mu Bwikadi bwa Dîyi, wamba ne: “Baakafunda ne!” Mmwômò anyi?

<sup>236</sup> Sataana wakenza nanku bwa cinyi? Mbwalu kavwa mumanye Dîyi bwa adi... Ûvwa mumanye ne Dîyi divwa bwa adi dîbà, kadi ùvwa wela mpatà bwa kaaMuntu kakese kadipwekeshe aku kwikalaku Dîyi adi. “Wêwè ní udi Mwânà wa Nzambi. Mêmè ndi mumanye ne Mwânà wa Nzambi ulwalwa, bwalu Dyòdi ndyambe ne Yêyè neênzè aci. Ne baakafunda ne:

‘Yèyè neatumine Banjelo Bende dìyì bwa bwalu Bwebe.’ Wamonu anyi? Anji cinjaadikilebi tǔng! Enza cishima tǔng! Nkumonebi Wèwè ucyenza.” Nwamonu anyi? Nwamonu anyi?

<sup>237</sup> Nwamonu’s, mwena bupidya, mwena kwitabuuja wa budingìbudingì, mutentudi. Tangilaayi Yudaasa anu munkaci mwabo amu mene, cikondo cimwecimwe aci, mwena kwitabuuja wa budingìbudingì! Nwamonu anyi? Monaayi, Dìyì dilelela pàadi mwaba awu.

<sup>238</sup> Mushindu mwine udibo ne dikamakama’s we! “Mpindyewu, kuteyiku ntema ku lukutukutu alu to. KaCyena ne bwalu bwine bwa nsongo to. Kuyi kwine kuntwaku to. Cidi anu mitooyi cyanaana kacya yamonangana. Aci kacyna ne bwalu bwine bwa nsongo to. Byònsò abi bidi anu maalú mafwikakaja. Aci’s cidi anu mu mutu mwebe amu.” Nwamonu’s, nudi numona cìndi muswe kwamba aci anyi? Kwimana anu mu Bwikadi bwa Dìyì kadi kucyamba’s.

<sup>239</sup> Sataana wakabwelamu anu nanku. Bu mudi Bible mwambe mu Yuda emu ne: “Nansha Mwarkanjelo mwine, pavwaye ukokangana ne Sataana, wakamba ne: ‘Mukalenge akutàndishè.’” Ùlwishangana ne Dìyì Dyòdi diine’s!

Kadi ki mufwilakanyi ne Kilisto nyèyè ewu, mulaaba maanyi, mwimane anu mwab’ewu mene ùlwishangana ne Dìyì dilelela dya dituku, Yesu Kilisto, wamba ne: “Baakafunda ne.”

<sup>240</sup> Tangilaayi ku matuku a ndekeelu. “Nebiikale bifwanangane menemene mu mushindu wa bifwanyine kuseeswisha Basungula mene bu ne bivwa mwa kwenzeka.” Kaa, ekelekele! Kabingila kadi kenza ne Basungula kabaakuseeswishibwa, nudi bamanye ne mbwa cinyi? Bwalu bòbò badi Dìyì. Nwamonu anyi? Anu mudi Mwoyi udi mu muji, mungãmbi katanci aka, kaWena mwa kuDiviva to. Nwamonu’s, Udi n’Dìyì ne mu muvù wa Dìyì. Aci ncyà bushuwa.

<sup>241</sup> Anu muvwa Yelemiya, ùvwa mumanye. Nansha civwa Hananiya wamba ciikàle cinyi, yèyè uvwa mumanye mwaba uvwaye. Ncyòci aci menemene cyàkenzà Mòsà, ne—ne bakwabo. Mbwena kwamba ne, yèyè uvwa mumanye ne, civwa muprofeta wa mashimi wamba nansha ciikàle cinyi, Dìyì dya Nzambi divwakù. Divwa difundiibwe.

Ki bwa cinyi Miika uvwa mwa kwamba ne: “Eyo, indila anu cyanaana kadi umone.”

<sup>242</sup> Aakaba kwamba ne: “Mémè ndi ngiitabuuja baprofeta baanyi. Bulongolodi bwanyi budi bwamba cya bushuwa. Pàngiikalà mwalukile mu ditalala... Elaayi mulumyana awu mu buloko mwamwa. Mémè ki wamona mungãapita nende! Numupe mâmpà a kanyinganyinga. Numwipate, kanwikadiku nende mu bwomumwe to nansha kakese. Pàngiikalà mwalukile mu ditalala, netumone mutwapita ne mulumyana awu.”

243 Miika kwambaye ne: “Wêwè anu mwalukile mene, Mukalenge kî mmwakule naanyi to.” Ûvwa mumanye ne ùvwa ne EMU MMUDI MUKALENGE WAMBA, ne cikeena-kumona cyende civwa menemene anu EMU MMUDI MUKALENGE WAMBA; kacyi bwa movù kampanda mukwabo to, kadi bwa movù awu. Amen! Aleluuyah! Muvù’s!

Dikamakama’s, ujuuka pende kadi kubanga kukokangana ne Mwarkanjelo! Batu bambe, ne: “Bakutakane batu bendela ne bisabaata bya misonso muntaku mwaba udi Banjelo baciina bwa kwendela.” S’ncyà bushuwa.

244 Kabingila kadi kenza ne Basungula, mwàkambà Yesu, kabaakuseeswishiiwba, mbwalu bôbò badi Dîyi adi. Kabeena mwa kwikala cîngà cintu to. Kabeena mwa kuteeleja cîngà cintu to. Kî mbamanye cîngà cintu to. Aci ncyà bushuwa.

245 Vulukaayi ne, Môsà kaakakokiibwaku ntema ku matentula abo ônsò awu to. Mmwômò anyi? Môsà wakamba ne: “Mpindyewu, indila kakese, Pâlò. Udi mumanye mudi bwalu? Mukalenge ngudi mungambile bwa mêmè kwenza cyôci eci, kadi, butumbi kudi Nzambi, nyewu mmona ne nsongaalume yebe eyi yidi paayi mwa kwenza cintu cimwecimwe eci. Nenku, ndi nkwambila cîngènà, nêndisangè kunudi”? Huh! Aci kaciyena cyumvwika bu ne mmuprofeta wa Nzambi to. To, cya bushuwa! Wàkashaala anu kacya wimana kamungulu ne mwende mwônsò. Ûvwa mumanye, menemene ne, Nzambi uvwa mwa kumona mwa kupita ne bwalu abu nansha bya munyi, bwalu Yêyè wakalaya bwa kucyenza. “Mêmè nêngiikalè neebe. Ncyakukulekela to.”

246 Ûvwa mumanye, pa nanku kaakadisanga naabo to. Kaa, to. Wakashaala anu naabo. Kavwa muswe nansha dimwe dya ku mangumba abo awu to. Yêyè wakashaala anu ne Nzambi. Yêyè kaakakokiibwaku ntema ku bintu byônsò bivwabo mwa kwenza abi to. Pavwabo benza cintu cimwe. . . Wàkapâtula nkùsù; bôbò kupatula nkùsù. Wàkapâtula mashi; bôbò kupatula mashi. Wàkapâtula byônsò; bôbò kumutentula mu mushindu wônsò, benda anu balonda. Kushaalaye anu mupuwe. Ûvwa mumanye menemene civwa bwalu. Nzambi nguvwa mu mudimu awu.

247 Nuuvvu mpindyewu anyi? [Disangisha didi dyamba ne: “Amen.”—Muf.] Panudi nusangisha ibidi ne ibidi, yidi yenza inaayi anyi? [“Amen.”] Kî mbîmpè bwa kwosha kupicisha to. Pa nanku, pa nanku nudi—nudi bumvwe, nwamonu’s.

Bwa cinyi? Bôbò kabaakuseeswishiiwaku ku aci to, mwena kwitabuuja mulelela, n’Dimiinu didyanjila kulongolola didi ne cya kukandamana mu dituku adi.

248 Anu bwalu, kabidi, Yesu wakamba eci: “Bààbûngì nebalwe mu dituku adi, mu Dîna Dyanyi, bàmba ne: ‘Mukalenge, mêmè ewu ncyakiipataku badémóns mu Dîna Dyebe anyi?’” Yesu kwambaye ne: “Ku matuku a nshiikidilu, piikalà cikondo cijike cyônsò ne dibiika dya ku bafwe dinene adi dilwe, bààbûngì

nebalwe ne nebasòmbè mu Bukalenge.” Bukalenge bwa Nzambi budi munda mwebe amu.

<sup>249</sup> Bààbùngì, bisoosa bibi nebilwe ne nebisombe anu pamwe ne Blé apu, byàmba ne: “Mpindyewu, indila kakese, Mukalenge! Mémè’s ngàkaakula mu myakulu. Ngàkeela mbila. Ngàkajà maja mu Nyuma. Ngàkiipata badémóns. Ngàkaakula mu myakulu. Ngàkenza bintu byònsò ebi.”

CidiYe mufwanyine kwamba ncinyi? Monaayi. “Nwènú beena mudimu baa bubu, kacya Mémè nciú munumanyeku mene to.”

<sup>250</sup> *Bubi* ncinyi? Konka muntu kampanda. “Ncintu kampanda cyùdi mumanye ne ncivwa cìkèngelà wèwè kwenza, kadi kuyi ucyenza to.” Bòbò’s mbamanye Dìyì adi. Batu baDiteeleja. Udi uteeleja mukaba wa mèyì ewu. Udi uteeleja Mukenji ewu. Udi umona Mukalenge Nzambi wàmba nanku; udi uMumona ucishindika, ucivwija cilelela. Kabidi udi mumanye Cyòcì eci bitooke tòò anu mudi muumya uteema pambelu pàapa mwamwa, kadi wèwè udi anu kacya wèla nzadi mu dingumba dyenu awu, mwele nzadi mu bintu bya mashimi abi; mwena mudimu wa bubu naanyi we!

“Kaa, eyowa’s, mémè’s ngàkenza tumpanye tunene. Ngàkenza *cikampanda*. Ngàkenza *cikansanga*.”

Yèyè ne: “Nguumukila apa, wèwè mwena mudimu wa bubu, kacya nciú mukumanyeku to.”

<sup>251</sup> “Ee, Nyuma Mwìmpè’s wakapona pambidi paanyi.” Ncyèna ngeela aci mpata to nansha kakese. “Nkaadi mwakule mu myakulu. Ntu nkaadi mwimbe misambu mu Nyuma. Nkaadi mwenze...” Ncyèna ngeela aci mpata to nansha kakese. Kakwena mpata ku aci to. Kaa, mwaneetu wa balume, mwaneetu wa bakaji, nngiikadilu wa mushindu kaayi’s we!

Eci ncikondo cya kuzakala. Tukaadi penyi? Dìyì edi dikaadi dilwa ku Mwoyi mpindyewu. Monaayi.

<sup>252</sup> Eyo, Yèyè ngwákamba ne nebènzè cyòcì aci. Monaayi: “Nwènú beena mudimu baa bubu.” Ndi ne Mufundu mufunda kaaba aka. Ncyèna anu mumanye kuvwawu to. Ngàngàcì dìbà dipitepite bùngì be. Nèngùkèbè mwaba udiwu, indilaayi kakese, bwa mmone ne uvwa bishi. Ndi ne—ndi ne Maataayi 7.21. Ncyèna—ncyèna anu mumanye ne mpenyi to. Mémè, misangu mikwabo nciú mfunda cintu kampanda pamwe naabi to, ee, pantù—pântù nyiisha mushindu ewu, ntu—ntu mpwa mwoyi ciine cìmwà ndeedila mu mwine Mufundu awu. Maataayi 7.21.

*Kì mmuntu yònsò udi ungamba ne: Mukalenge, Mukalenge, wàbwela mu bukalenge bwa mu dyulu nansha; kadi ng’ewu udi wenza diswa dya Taatù wanyi udi mu dyulu.*

*Bààbûngì nebangambile mu dituku adi ne: Mukalenge, Mukalenge, twêtù aba katwakambaku biprofeta . . .*

253 Baprofeta, balaaba maanyi! Mmwômò anyi? “Twêtù katuvwaku muprofeta anyi? Katuvwaku mulaaba maanyi, mulaaba maanyi anyi? Ncyêna mwambeku biprofeta mu Dîna Dyebe anyi? Ne mu Dîna Dyebe ncyêna mwipateku badémóns anyi?” Mmuniyi múdì mwa kwenza aci, kadi kubenga bwa kubatiijibwa mu Dîna dya Yesu? Nwamonu anyi? Kaa, ekelekele! Nudi numona mushindu udici ciseeswishangana anyi? Anu too ne pa kaaba kiine aku’s, kadi kwalukila cyanyima. Badi baya too ne ku Dîyi, kadi kwalukila cyanyima. Mpindyewu tangilaayi eci. Tudi tupatula eci patooke, indilaayi kakese cyanaana.

*Bààbûngì nebangambile . . .Mukalenge, Mukalenge, twêtù aba katwenaku bambe biprofeta, katuvwaku baprofeta anyi? . . .*

Eyo, nkaavwa mwambe cyôci aci mu Maataayi 24.24.

*. . . ne mu dîna dyebe . . . biipate badémóns anyi? ne mu dîna dyebe benze maalu àbûngì a kukem- . . . byenzedi byàbûngì anyi?*

*Ne pa dîbà adi mêmè nêmbàjikwilè ne: Kacya nciyu munumanyeku to: nguumukilaayi apa, nwênù benji baa bubu.*

254 “PaakateekiibwaCi kumpala kwebe wêwè kuCimona, ne kuCimona cikwàta mudimu, kumona ne n’Dîyi; kadi bwa dinanga dyebe dya cyena mangumba, wêwè kushaala kacya wâlamatamù. Kacya nciyukù mene mukumanye to. Nansha badémóns baukaadi mwipate biikàle bûngì munyi, nansha bikampanda ne bikansanga byûkaadi mwenze biikàle bûngì munyi; ncivwaku mumanye kantu kakutangila wêwè ewu to.”

Baalama kwambaye ne: “Ngákamba ciprofeta cya bushuwa, mu Dîna Dyebe. Cyôci kwenzeka.”

“Bwa aci kaayi ncy bushuwa menemene, kadi, paakafikabi ne ki Dîyi ndyôdi edi, wêwè’s wâkaDibenga.”

255 Kaa, mwaneetu, udi umona luseke ludi lùseeswishà anyi? Kî nne “muprofeta” to, aci ncyôci menemene; kadi nkwikala ne Dîyi, Dîyi dilelela, Dîyi dishindika dimweneshiibwe. “Nwênù beena mudimu baa bubu!”

Kuteeta, Sataana mmuteete mu bikondo byônsò bwa kutentula Dîyi dilelela. Tudi bamanye aci, kî mmwômò anyi?

256 Monaayi, kufika too ne ku mukalu kadi kulekela. Monaayi mwab’ewu, yêyè mmwambe, mu Ebelu nshapita mwi6 (Mpindyewu, tuvwa tubala kukaadi katanci, mûngânwâmbidi, “kukwâlukila,” nenku netûkwâlûkile mu ndambu wa tusunsa tudi tulonda etu), mmwambe ne:

...kadi *mèbà ne mingonga*...bidi *pabwìpì ne kubengiibwa; ndekeelu wabi nkwohùbwa*. (Mukalu!)

...nwènù badi *balabule*... *dipà dya ku dyulu*,...

<sup>257</sup> “Balabule,” mu ngaakwilu mukwabo, udi muCimone! Kwèna mwa [Mwaneetu Branham udi utuutakaja mishiku—Muf.] kuCilabula anu cyanaana ne mukana mwebe to. Kadi udi muCimone, ne mumanye ne Civwa m’Bulelela. Wèwè kumanya ne Civwa m’Bulelela. “Balabule dipà dya ku Dyulu.”

...ne *bavwijiibwe baabanyanganyi baa Nyuma Mwîmpè*, pavwaYe mupone pambidi peenu apu,  
... *balabule ku dîyì dîmpè dya Nzambi*,...

“Balabule,” wèwè kuCimona ne ncya bushuwa. “Ne Nyuma Mwîmpè mwikale upona pambidi peebe,” bisoosa bibi mu budimi.

...ne *pashiishe kukudimuka kuya*,...

“Uvila Kilisto mwine utu mukujidile, ne mukubiikile, ne mwele dilaabiibwa adi pambidi peebe awu.”

...*kî nkushaale kabidi mulambu bwa mpekaatu to*,  
*bwa cyôci aci*.

Cikaadi kaciyi cya bafwa luse to! “Kabyenaku mwa kwenzeka bwa bôbò abu kufikabo ku dimanya dya Bulelela to.”

*Bwalu kabyena mwa kwenzekaku bwa aba bakaavwà*...*bavwijiibwe baabanyanganyi baa Nyuma Mwîmpè*,

<sup>258</sup> Mupone pa bisoosa bibi, nwamonu’s: “Babange lwendu ne Yesu, ne: ‘Mukalenge, nênye too ne kundekeelu,’” kadi paudi ufika anu pa Dîyì anyi, umba ukudimuka walukila cyanyima. “Bavwijiibwe baabanyanganyi baa Nyuma Mwîmpè, balabule ne kulabula, anyi bamone Dîyì Dyôdi diine dimweneshiibwe.” Ki *pashiishe kukudimuka kuDyela nyima*: “Mbikole bipange ne mwa kukola bwa bôbò abu kumonabo Dyôdi adi anyi kulwabo ku Dyôdi.”

<sup>259</sup> Aci’s ng’EMU MMUDI MUFUNDU WAMBA. Mpindyewu, wèwè... “Maulu ne buloba nebijimine, kadi Dyôdi adi kadyakujiminaku to.” Nudi bacimone anyi? “Bikole bipange ne mwa kukola.” Bible ngudi mwambe nanku awu, ne Nyuma udi ucifidila bujaadiki.

<sup>260</sup> Monaayi, lekelaayi nnupe cileejiilu cikese. Tangilaayi bantu bààkapàtukà ku ciprofeta cya Mòsà abu, bààkapàtukà mu bulongolodi abu abu, ne bapatuke mu bintu byônsò, ku ciprofeta, bamone byenzedi binene ne maalu a kukema, ne bintu bya mushindu awu, ne bafike too ne ku mukalu wa ku dibwela.

<sup>261</sup> Mpindyewu, Lee, ki padi palwa bwalu bwebe bwa “dînà mu Mukanda” apu’s. Wamonu anyi? Ukaadi mubukumbaje.

Ne nwênù badi kanuyi apa abu, ne badi pambelu mu—ku nshinga, n’Docteur Lee Vayle udi musòmbe apa ewu. Yèyè ngudi ulongolola mfundilu wa mwakulu mu mukanda ewu wa Bikondo Mwandamutekete bya Ekeleeziya. Nenku bwalu buvwa bujuuke, anyi lukonko, pa bidi bitangila bwalu bwa “dîna dikupudiibwe mu Mukanda wa Mwoyi wa Mwânà wa mukooko” abu. Nwamonu’s, bwalu abu mbupande bambi bûngì cyanaana mitu. Kadi indilaayi too ne panwapeta mukanda awu, nenùbûmvwè panwikalaku ne ndambu wa Bukênkè mu nwênù amu. Nwamonu anyi?

<sup>262</sup> Monaayi, mpindyewu, neucinguluje mutu kadi kubenga nansha bwa kuCitangila pawikala kuyi muswe kuCimona to. Anu muvwa maamù wanyi ne ciibidilu cya kwamba ne: “Kwêna mwa kupatula mashi mu tuunèpà to, bwalu kamutu mashi to.”

<sup>263</sup> Monaayi, bikengela Bukênkè bulwe; kî mmu mîdimà to. Bukênkè butu bulwa kudi mîdimà, kadi mîdimà kayitu yiBumona to. Monaayi mpindyewu balaaba maanyi mu dituku edi.

<sup>264</sup> Mushindu uvwa Mòsà mupatule bânà baa Izaleela abu; nenku bôbô kuteeleja nenku kupetabo cibwejàkàjì ne ditunga dinene adi kuntu kwaka. Mpindyewu, Izaleela uvwa kayi wa usungulujangana bilondeshile mangumba to. Kayi ne buloba, kayi ne kwende pende to. Úvwa munkaci mwa kuya kwende pende.

<sup>265</sup> Twètù aba katwena ne ekeleeziya to. Katwena... Tudi—tudi tuya batangile ku Ekeleeziya kampanda, Ekeleeziya wa Baanaabute, Ekeleeziya udi mu Butumbi; kî ng’ekeleeziya udi pa buloba, mwenza kudi muntu to. Ekeleeziya udi mu Butumbi, babiikila pambelu, badyanjila kulongolwela Mwoyi wa Cyendelele, nwamonu’s, baya batangile Kwabo.

<sup>266</sup> Kadi paakafikabo mwaba wa kusabukila, kwelabo Dîyi mpatà, ne kwalukilabo cyanyima. Paanyima paa Yoshuwa ne Kaaleba ne bakwabo bamane kuya dyamwamwa ne baalukile ne bisumbusumbu bya tumuma twa mvinyo, bwa kubajaadikila ne buloba abu buvwaku, Dîyi dya mlayi wa Nzambi awu ne: “Mbuloba bwîmpè, bwa mabeele ne bwîci.” Ki kulwabo naabi mu dyalukila, lwà dyamunu, bwa kubajaadikilaci. Ki kubilabulabo, kwambabo ne: “Kaa, kaa, katwena mwa kucyenzaku to, nansha nanku.”

<sup>267</sup> Cyàkenzekà ncinyi? Baakabutukila mu cipeela. Baakashaala anu muntwamu ne baakadivwija bulongolodi, ne baakafwa, muntu ne muntu wa kudibo, kadi aba bààkayà dyamwamwa e kwalukila ne bintu abu, Yoshuwa ne Kaaleba; Mòsà wakatentemunyiibwa. Cifwanyikijilu cya dindila dya Ekeleeziya; ne dibiika dya ku lufu dya Dipungila Dikulukulu, Dipungila Dipyadipya; ne Mubidi mwambwibwe. Nudi numona basatu abu mwaba awu anyi? Bikengela nwênù kulama basatu

abu mu mulongo, nwamonu's, pa nanku, mu mwena kwitabuujja ne mwena bupidya. Nwamonu anyi?

<sup>268</sup> Monaayi muvwabi “anu menemene.” Nwavulukaayi ne, Nzambi kaakafwaku mpekaatu awu luse to. Mpindyewu mmunyi mwikalabo mwa kubwela? Piikalabi ne mmêbà, anu ku cibangidilu aku, s'mmêbà ku ndekeelu. Anu badyanjila kulongolola ki baaCimona.

<sup>269</sup> Monaayi ne ntema yônsò mpindyewu. Anu bu mu matuku a Martin Munsantu, kumpala menemene kwa Bikondo bya Mîdimâ; kaamuntu kakese kaa difwana dya Nzambi. Mbanganyi baakaadiku babale mifundu ya Martin Munsantu? Bâàbûngî baa kunudi bakaadi bayibale. Twâkaya bwa kupeta mifundu ya Martin Munsantu; nsaserdose awu kwambaye ne: “Kadi kabatu bamuvwije munsantu to.” Ncya bushuwa ne, kabaakamuwija nanku to; kî nkudi bôbò abu to, kadi wakavwijibwa munsantu kudi Nzambi. Nyuma Mwîmpè ngudi mutwâmbile twêtù bwa kumuteeka mwaba awu pa cikondo ciisâtù cya ekeleeziya aci. Nwamonu anyi?

<sup>270</sup> Tangilaayi numone ne yêyè uvwa muntu mukese wa difwana dya Nzambi wa mushindu kaayi; mubiikidiibwe, mudyanjila kulongolola. Baledi bende, bampangaanu. Tatwëndè, musalaayi. Byakakengela bwa kulondaye njila wa tatwëndè, bwa kwikalaye musalaayi. Nenku, paakashalaye musalaayi, ùvwa misangu yônsò witaabuujja anu ne kuvwaku anu Nzambi mwaba kampanda; muntu wa mu meetu, ne mwikale mwa kumona Nzambi. Dimwe edi kupicilaye mu cimenga kampanda, nenku kuvwa mulalakanyi kampanda mukulakaji mulaale panshi mwaba awu, ùpunga ne lufu, ùlomba bwa muntu kampanda. . . Ùvwa muumvwe mashika diloolo adi. “Kaa,” wamba ne, “mpaayiku cintu cya mêmè kudibwikila; mfwâfwa bufuku ebu.”

<sup>271</sup> Muntu nansha umwe kavwaku muswe kumupeesha to. Ki Martin kushaalaye ku luseke ne kumubandilaye katanci. Muntu nansha umwe kavwaku muswe kumupeesha to. Pende ùvwa ne cinkutu anu cimwepele. Ùvwa pende mwa kuumininya ne mashika, yêyè mwine, ùvwa ku mudimu, bu yêyè—bu yêyè mwa kumupa cinkutu aci. Ki kudyambidilaye ne: “Twêtù bônsò babidi netwikaleku ne mushindu wa kupânda bu mêmè mwa kucyabanyangana nende.” Ki kwangataye cinkutu cyende ciine aci, kucikosololaye mu bitupa bibidi ne mwele wende wa mvita, ne kujingilaye mulalakanyi mukulakaji awu mwômò. Kudijingilaye cinkutu cyende yêyè aci.

Bantu bônsò kwambabo ne: “Kadi monaayi anu nsentedi wa bwalu bukole wawa. Monaayi anu musalaayi wa bwalu bukole wawa, mudjîngile cipese cya cinkutu!”

<sup>272</sup> Bufuku bwâkalondà, pavwaye kayi ku mudimu to ne mwikale mudyâdije mu bulaalu, wâkabiishiibwa. Ùtàngila, mu



cibambalu amu, ki Yesu Kilisto udi mwimane wawa mudijingile cipese cya cilambà cya kale ciwwaye mujingile muntu awu aci. Kujingululaye anu mwaba awu ne: “Cinudi nvenzela bânà Baanyi bakese, Mémè ngunudi bacyenzèle, benzele balaaba maanyi Baanyi,” mudyädije mwaba awu.

<sup>273</sup> Ûvwa musadidi munene wa Nzambi. Ekeleeziya uvwa umuseka, umukengesha, umwipata, ne bikwabo byònsò, kadi ùvwa muprofeza wa Nzambi. Bivwaye wàmba bivwa byenzeka. Kuvwa kabidi bààbúngì bààkamwitabuujà, mu ciine cikondo aci.

<sup>274</sup> Ndi muswe kunuleeja mùtù dyabulu useeswishangana. Dìngà dituku ùvwa musòmbè mu bìrò byende. Mwanjelo kampanda wa bukole kumwenekaye, ne cifulu cya butumbi cyasa ku mutu, muvwale bisabaata bya ngòlò, ne mukaba wa ngòlò muswika naawu bilambà, wàmba ne: “Martin, udi mummanyè mémè ewu anyi?” Yèyè ne: “Ki mémè Mukalenge ne Musungidi webe ewu. Mémè ki Wákakusungila awu. Nkuukwilaaku, Martin.” Kadi muprofeza awu, paakamanyaye ne kuvwa kaacintu kampanda kàvwà kakayi kumvwika mwaba awu, kushaalye anu kacya wamutangila. Awu ne: “Martin, mémè’s ki Musungidi webe, Yesu Kilisto. Nkuukwilaaku’s! Kwèna mummanyè anyi’s, Martin?”

<sup>275</sup> Martin kushaalye anu kacya wamutangila, Mifundu miikale yimupitakana mu mutu. Yèyè ne: “Sataana, nguumukila mwab’ewu.” Yèyè ne: “Mwase peebe ne cifulu cya butumbi ku mutu. Pàdì Dìyi dya Nzambi dyambe ne ‘bansantu Bende ki bààMwasà cifulu’ ku nshiikidilu kwa cikondo.”

Aci kî ncifwanyineku kwikala cîshi cya kwelela beena Mpenta ku ndobo anyi? Tàbaleelà Dìyi adi, wèwè mwaneetu. Mwaba awu’s ki udi ufuta’s.

<sup>276</sup> Dituku dikwabo, kabidi, mu cisòmbedi cya badyãmbike balume, bavwa ne munsantu mukwabo mukulakaji muntwamu, musòmbà wa bansaserdose baa nsongaalume. Kuvwa umwe wa ku bóbò mwenze bu wa cimfiikààmùndà. Tangilaayi eci, ki lusumwinu lwa lwìmpè—lwa lwìmpè leelu ewu ndwalu. Ûvwa yèyè muswe kwikala cintu kampanda kumutu kwa bakwabo abu. Ûvwa muswe kudileeja, muntu wa bukookeshi, cintu cya citambe bunene, cintu cya citambe bwìmpè, wa cipidi citumbuke cyònsò, nudi bamanye’s, ne cintu cya cinenaanaale. Bivwa bikengela kwikalaye wa ukoka ntema. Ûvwa yèyè misangu yònsò anu muswe bwa bânà beetu bakwabo abu kabiikadi... Nudi bamanye’s, bivwa bikengela yèyè ikale mushiilangane. Nwamonu anyi? Yèyè, nansha ciikàle cinyi, ùvwa ne dyambu dya dikema. Yèyè kayi ki uvwa èhelè. Kakuvwaku muntu nansha umwe uvwa mwa kumutwa yèyè munu to. Mpindyewu monaayaaku cyàkenzekà. Bivwa bikengela ikale ne cintu kampanda cya cinene. Bivwa bikengela biikale bamufwanyikija

ne ba—bantu baa maalu manene. Nudi nundonda anyi? Nwamonu anyi? Pa nanku, kwambaye, kwambaye ciprofeta. Kwambaye ne: “Mukalenge wamvwiji paanyi muprofeta, mêmè. Nkaadi muprofeta.”

Mpindyewu, kuvwa umwepele uvwa mujaadikiibwe ne mmuprofeta mu ditunga amu, ùvwa m’Martin Munsantu; ùvwa mulediibwe muprofeta.

<sup>277</sup> Kadi mwânà ewu kwambaye, nsongaalume ewu wamba’s, nsaserdose mutekete wa bidimu bu makumi abidi ne bitaanu nanku, yêyè ne: “Mukalenge wamvwiji muprofeta, nenku nênnùjaadikileci.” Yêyè ne: “Diloolo edi Mukalenge neãmpèèshè muzabi munene, mulenga, uwumvwadika, muzabi mutooke, ne nênsòmbè munkaci mwenu. Pa dîbà adi nwênù bônso nenwikale nulwa kûndi mêmè, nwamonu’s, ne nenwikale nupetela mêyi kûndi.”

Mpindyewu fwanyikijaayi aci leelu ewu, nwamonu’s: “Mêmè ki wîkala mfumu wa bulongolodi. Mêmè ki wîkala mwa kutangila bwalu bwenu, nwênù bakwabo bônso bansaserdose aba.”

<sup>278</sup> Ncya bushuwa nanku: “Bufuku abu, bukênkè kulwabu mu nzubu amu,” mudi mifundu ya Martin Munsantu yamba. Nwayibalaayi. Kabidi ncya bushuwa. Mbwalu bulonda. Nenku ki makênkè kulwawu, ne bakwabo bônso kutangilabo, ki kulwaku. . . Yêyè uvwa ne muzabi mutooke, mwimane munkaci mwabo. Yêyè ne: “Nwamonu cîmvwà munwãmbile anyi?” Kadi aci’s ncibengangane ne Dîyi.

<sup>279</sup> Nenku mmwenze anu uya kangata mukulu wa kale wa tulaasa tutumbuke atu, kwendaye eku ne eku ndambu, yêyè ne: “Mwanaanyi, aci kacyna cimweka cijaalame to.” Yêyè ne: “Kudi mushindu anu umwepele.” Ngwôwò ewu! “Kudi mushindu anu umwepele utudi mwa kumanya. Cyãmwèki citambe-mfukilu.” Balumyana wanyi, Mpenta nunku’s mmubakule cyôci aci mucisukumine, muji, cidiidi, nshinga, ndobo, ne bikwabo byônso! Yêyè ne: “Cishima ncifwanyine kumweka cîmpè, kadi kacyna cimweka cijaalame ku Dîyi to. Mpindyewu, tudi ne muntu wa mushindu ewu, muprofeta mulaaba maanyi, dyende m’Martin. Lwâku, nda kadileeje kumpala kwende yêyè.”

Mulumyana awu ne: “Bwèhé, to! Martin kèna mu bwalu to.”

Ki yêyè ne: “Wèwè’s uyaaya, nansha bishi.” Ki kumupyabo ku diboko, bwa kumufikishabo kumpala kwa Martin, ki muzabi awu kuumumukawu.

Nwamonu’s: “Kuseeswisha Basungula bu ne bivwa mwa kwenzeka.” Nwamonu’s, mbabamanye. Yesu wakamba ne: “Mikooko Yanyi mmimanye Dîyi Dyanyi.”

“Kaa,” mùdi wamba, “yumvwa Dîyi Dyanyi.”

280 S'ki Dîyi Dyende ndyôdi adi. “Muntu kaakwikala ne mwoyi anu ku dyâmpâ nkaayadi to, kadi ku Dîyi dyônsò.” Nwamonu anyi? Muntu mudyanjila kulongolola mmumanye eci. “Dîyi dyenyi, anyi lubila lwenyi, yôyi kayakulondaku to.”

281 Mushindu awu ki wùwà balumyana abu; kabavwa baswe kulonda to. Bavwa bamanye ne Martin uvwaku, muprofeta wa cikondo aci, mujaadika kudi Nzambi ku Dîyi, uvwa mumanye Dîyi. Kadi muntu awu kavwa yêyè muswe kwimana kumpala kwaDi to.

282 Wâkamba kabidi ne: “Mwaba udi Mubidi,” anyi Dîyi, “mwaba awu, mu movù awu, ki wàdisangishilà mikanku.” Mpindyewu awu m'Maat-. . . Panwikala nujinga kufunda aci, m'Maataayi 24.28. Anu kumpala kakese aku, Maataayi 24.24; mvensa yinaayi kwinsi kwaci aku, nwamonu's, panwikala baswe kucyangata. “Mwaba udi Mubidi,” udi Manà, udi Dîyi, “ki wàdisangishilà mikanku.”

283 Mpindyewu ndi ne cya kulwijakaja. Ngâtâpi disù kuulu kwaka ne ngâmònu dîbà ditukaadi. . . Tukaadi—tukaadi mene dîbà dikumi ne ibidi ne tusunsa mwandamutekete anyi tusunsa mwandamukulu. Nêndwijakajè bikole menemene, anyi netubijikije diloolo edi, dimwe dya ku mêbà awu dinwaswa bwa kucyenza adi. Dinda edi anyi diloolo? Huh? Mbanganyi biikala ne cya kwalukila mu mààbò leelu ewu paanyima paa disangisha, tumonaayibi byanza byenu, nwamonu's. Kaa, ekelekele, mbîmpè kutungunuka's!

284 Ndi ngumvwa bintacisha bwa kulama bantu badi ku maatelefone pambelu pàâpa baba, kadi nêndwijakajè. Cidi ne musinga kupita ne mfranga yenu ayi. Ki mûndi ngiitabuja, bwanyi mêmè, nwamonu's. Mfranga yenu ayi neyibutuke. Bwa Eci to; Eci n'Dîyi. Nwamonu anyi?

285 “Mwaba udi Citalu, ki wàdisangishilà mikanku.” Mwaba udi Citalu, mwaba udi—udi—udi dishipiibwa, ki wàdisangishilà mikanku. Mwaba udi Munyiinyi mubishi, Dîyi dya movù, ki wàdisangishilà mikanku.

286 Kadi paanyima paa wôwò mumane kubola, pa dîbà adi ki padi biminyi bilwapu mbimbimbi. Eyowa. Nudi bamone cîndi muswe kwamba aci anyi? Padi dishipiibwa dyenzeke, ki mikanku yilwalwà eyi; kadi paanyima paa mumane kushaala mwaba awu, mumane kubola, ki biminyi bilwalwà ebi. Mukanku wôwò kawakwila naaci bwalu to. Nwamonu anyi?

287 Yesu wakamba ne: “Mwaba udi Citalu,” mwaba udi Manà mamacile awu, diloolo dîdi Manà amata mabishi adi, “pôpò apu ki pààdisangishilà mikanku bwa Wôwò awu.” Ki Manà a dituku ngôwò awu. Nwamonu anyi? Monaayi.

288 Kadi paanyima paa mumane kubola, biinya bibwelamu, ki biminyi bilwalwà ebi. Kabyena mwa kuumvwa mupuuya wawu padiwu kawuyi mwanji kubola to. Kabyena bikemesha

to paakiimana Yesu mwaba awu wàmba ne: “Yelusalema, wêwè wâkaasa muprofeta yônsò mabwe awu!” Monaayi mupinganyi muleeji muntu awu, nwamonu’s: “Yelusalema, Yelusalema, mmisangu bûngì munyi yînkaadîku Mêmè ewu muswe. . .” Yêyè uvwa nganyi? “Mmisangu bûngì munyi yînkaadîku Mêmè ewu muswe kukukungwija mudi nzoolo wa cikuka ukungwija twânà twende, wêwè wâkaasa mabwe muprofeta yônsò ûntù Mêmè mukutumine,” ekeleeziya munene awu, Yelusalema.

<sup>289</sup> Yelusalema udi kayi wa apa pa buloba to, “kadi twêtù tudi baa mu Yelusalema wa ku Dyulu,” kudi Dîyì difumine, ku didyanjila-kulongolola, nwamonu’s. Kî n’Yelusalema wa kale udi ubutuka awu to; n’Yelusalema Mupyamupya udi kayi mwa kubutuka awu. Kî n’Yelusalema wa kale, wâkiibakabò kudi bantu awu to; kadi n’Yelusalema Mupyamupya mwibaka kudi Nzambi, nwamonu’s, Dîyì muulu mwamwa mpindyewu munkaci mwa kumweneshiibwa. “Mu nzubu wa Taatù Wanyi mudi nzubu myalabale yàbûngì. Nyaaya kanulongolwelayi,” Mufuki wenza mîsèèsù ya ngòlò, ne bikwabo. Ki Yêyè awu udi kayi ubutuka to.

<sup>290</sup> “Yelusalema, Yelusalema, mmisangu bûngì munyi yînkaadîku Mêmè ewu muswe,” kubangila anu ku ntwadijilu wa cikondo; kayi Mupersona mwisâtù, muntu kampana mukwabo to, kadi, “Mêmè ewu mufwanyine kukukungwija mudi nzoolo wa cikuka ukungwija twânà twende, kadi wêwè kwêna muswe to. Kadi mpindyewu dîbà dyebe dyafiki.” Nwamonu anyi?

“Mwaba udi Citalu, ki wàdisangishilà mikanku.” Kadi paanyima paa citalu cimane kubola, ki padi tubangu-nyuunyi tulwa kukungwila. Nwamonu anyi?

<sup>291</sup> Monaayaaku. Mòsà, yêyè kaakapeeshaku bânà baa Nzambi. . . Mòsà uvwa mukanku, ne kaakapeeshaku bânà baa Nzambi bishààdilè bya pa Noa to. Nwamonu anyi? Úvwa ne Dîyì dya Nzambi dibishi. “Mukalenge Nzambi mmutuutakeene naanyi mu cipeela, ne mushindike Dîyì Dyende, ne muntume mwaba ewu bwa kunubiikila ku dipatuka.” Pashiishe ki batentudi bàlwalwà eku ne eku aba, bacitentula. Nwamonu anyi? Kadi yêyè guvwa ne Dîyì dya dîbà adi.

<sup>292</sup> Bwalu, Nzambi uvwa mwambile Abraham, yêyè mene uvwa mupete mulayi awu ne: “Dimiinu dyebe nedisombe mu buloba bwenyi, bidimu nkama inaayi, kadi nêmbamwenekele ne nêmbâpâtùlè ne cyanza cya bukole.”

Mòsà kwambaye ne: “Mpindyewu, Mukalenge Nzambi neakule naanyi ne neandeeje, ne ûkaadi mungambile cya kwenza, ne nênnwâmbilè.” Yêyè ne: “‘NDI’ ngudi muntume.”

<sup>293</sup> “NDI!” Kayi “Mvwa, anyi Nêngìikalè” to. “NDI,” mu dîbà dya mpindyewu, Dîyì mpindyewu. Kî n’Dîyì divwàku, Dîyì dyalwa to; Dîyì didîku mpindyewu. Nwamonu anyi? Nudi bacyûmwè anyi? “NDI!” “NDI” ki Dîyì. “Ku cibangidilu kwakadi Dîyì, ne Dîyì dyakadi ne Nzambi.” Ncya bushuwa anyi?

“NDI.” “Nzambi mmuntume mêmè bu muprofeta Wende, bwa kushindika ne eci ncilelela. Mêmè ki dyandamuna ku Dîyi edi, mungambile bwa kupweka muneemu ne kwenza cyôci eci.”

Nenku pàakacyènzàye, Pâlò kwambaye ne: “Ee, tudi ne nsongaalume bûngî cyanaana mu cisumbu cyetu yidî mwa kwenza paayi, cyôci aci,” batentudi’s.

<sup>294</sup> Yesu wakamba ne: “Mpindyewu, aci necyenzeke cyakabidi mu matuku a ndekeelu,” nwamonu’s, bâlâka mukana pa cintu cimwecimwe aci. Tangilaayi numone ne wâkalwamù kumpala nganyi. Tangilaayi numone ne wâkashââla ne Dîyi nganyi. Ki bwalu abu’s. Mushindu awu ki udici cimanyiibwa.

<sup>295</sup> Nanku, nudi numona’s, tudi tumona ne, Môsà kaakabapeeshaku civwa cya cikondo cya Noa to ne: “Netwibake bwâtù mpindyewu, bwalu ki Dîyi adi, nudi bamanye’s. Noa wakiibaka bwâtù mu dituku kampanda.” To, biminnyi mbivwa munkaci mwa kudya aci. To. To.

Eci n’Dîyi dilaya. Monaayi, bwa mukenji wende wakapetaye kudi Nzambi awu, yèyè uvwa ne Dîyi dya Nzambi dishuwashuwale didyanjila kulongolola bwa dîbà adi.

<sup>296</sup> Nansha Yesu kaakabadiisha bishââdilè bya pa Môsà to. Môsà uvwa ne Dîyi bwa dîbà adi, kadi Môsà uvwa muprofeta. Ki Nzambi Yèyè mwine nyewu, nwamonu’s, Kaakabadiishaku bishââdilè bya pa Môsà—bya pa Môsà to.

Kadi tangilaayi anu biminnyi abi mu bulongolodi abu, bivwa munkaci mwa kubisukumina. “Tudi bamanye! Twètù tudi ne Môsà! Kabyena bikengela twikale neebe Wèwè to.”

Yèyè kwamba ne: “Bu nwênù bamanye Môsà, nuvwa nummanya Mêmè, bwalu Môsà wakamba bwanyi Mêmè.” Nwamonu anyi?

<sup>297</sup> “Mwaba udi Citalu, ki wàdisangishilà mikanku.” Mikanku! Dishipiibwa dipyadiya dya Dîyi, Dîyi didi dijuudiibwe ne dipaya ne mafuta, ne dimweneshiibwe ne dyabanya bu Cyakudya bwa bânà.

Mpindyewu, citalu cya kale cîkaavwà cilââlâkàne kwaka nkama ya bidimu aci, neciikale anu kuntwaku.

<sup>298</sup> Bya mwomumwe mpindyewu! Luther uvwa ne mukenji wa kanyinganyinga; kadi, nwênù musumbà wa tubangu-nyuunyi twa ba-Luthériens etu! Ba-Baptistes bavwa ne mukenji; kadi, nwênù tubangu-nyuunyi twa ba-Baptistes etu! Nwamonu anyi? Mpenta uvwa ne mukenji; nkaadi ntubula cyûjà mpindyewu, tubangu-nyuunyi twa cyena Mpenta!

“Kadi mwaba udi Citalu, ke wàdisangishilà mikanku.”

Vulukaayi ne, kuvwaku mufwanyine kudiisha mwena Luther, mu matuku a kale âa (bwa mpindyewu udi mwa kumudiisha), ne munyinyi mubole wa cyena Katolike nansha.

To, mukalenge. Yêyè's uvwa ne munyinyi mubishi. Aci civwa ncikondo aci cya ekeleeziya.

<sup>299</sup> Kuvwaku mufwanyine kudiisha Méthodiste, ne mukenji wa ba-Luthériens to. Kaa, to, kavwa muswe munyiinyi mubole awu to. Mmubole! Nwamonu's, Mwoyi ukaavwa mumane kupatukamu muye mu cintu cikwabo. Aci ki cikolakola cya kale cikaadi cifwe, kale wawa. Mwoyi mmutungunuke wenda uya.

Anyi kwêna mwa kudiisha Mukaji musela wa Yesu Kilisto cyena Mpenta nansha. To, nansha kakese! Malongolodi matapile biinya; kakwena cya dyenza to! To, to!

<sup>300</sup> Bwalu mulayi udi ne: “Nenku kumpala kwa dituku dinene ne didi dikwacisha bwôwà adi kulwadi, Mémè nênnûtùmìnè Eliya muprofeta. Yêyè nealujulule myoyi ya bânà ku Diitabuuja dya baataatù.” “Milayi yônsò yàkafidiibwà mu Bible eyi, Mémè ki wayenza, nenku ki mwaba wadisangishilà mikanku.” “Bônsò badi Taatù muMpe nebalwe kûndi Mémè.” Nwamonu anyi?

<sup>301</sup> Yesu kaakateetaku aci to. Kadi paakalwa Yesu, Yêyè wakasangana dilwa dya biminyi mbimbimbi adi ne: “Twêtù tudi ne Môsà ne mikenji.” Nwamonu anyi? Ee, aci's civwa didya dilenga dya kalekale wawa pashebeelebo ciine aci e kubapabo. Nwamonu's, aci civwa cimpè mwine musangu awu.

<sup>302</sup> Kadi eci's ncyakadyanjilabo kwambila Môsà, yêyè mwine, mwine wâkashipa mulambu awu, ne: “Mukalenge Nzambi webe neajuule munkaci mwebe, mwa bânà beenu menemene, Muprofeta. Nebyenzeke ne, ewu yônsò wabenga kulamatangana ne Muprofeta awu ne cidiYe Yêyè wamba, neumushiibwe munkaci mwa cisamba.” Ne byakenzeka nanku.

<sup>303</sup> Tangilaayi muvwa biprofeta bishiileshiilangane bitwe ku nkama yisambombo byûle anu mwaba awu, bya mu Dipungila Dikulukulu, kudi Yesu Kilisto. “Mbatubule byanza Byanyi ne makàsà Aanyi.” Bitwè ku, ndi mupwe mwoyi ne mbiprofeta bûngi kaayi byàkuulà mu mêtà mwandamutekete anyi mwandamukulu a ndekeelu a mwoyi Wende, bìvwà baprofeta bônsò abu bambe, patapata.

<sup>304</sup> Bu mémè mwa kwamba ciprofeta leelu ewu ne cintu kampanda necyenzeke mu cidimu cimwe kuumukila ku mpindyewu, pâmwäpa ndi—ndi ne bya pa lukama makumi abidi bya ntuuta dyakalenga dya kuulaci, nansha ciikàle cya bushuwa anyi cya mashimi. Kadi bu mémè mwa kudyanjila kwamba ne necyenzeke, kadi nciyi ngamba ne ndibà kaayi to, ndi ne bya pa lukama bikese bishaadile. Mémè mwa kudyanjila kwamba ne necyenzeke cikondo kampanda, aci cidi cimpà kaadyakalenga kanciin. Bu mémè mwa kudyanjila kwamba mwaba wikalaci ne cya kwenzekela, cidi cimpà kabidi anu kaadyakalenga kanciin. Mémè mwa kudyanjila kwamba...ne necikumbanyine muntu kampanda, pa dîbà adi nêngiikalè anu



310 Kaa, bya luse's, mwaneetu! Tucidi ne cikondo bule munyi kabidi cya kwamba miine maalu aa, nwamonu's, mbikwabo bûngi munyi bìdì mu Mifundu? Nêndwijakajè. Ndi mwab'ewu ne mabeji matwe ku dikumi, a Mifundu, mushindu wa kujaadika maalu ônsò. "Muunya pa baakane ne babi, umweumwe awu."

311 Yesu ngwâkamba, bwa kujaadika ciine eci. "Pângîikalà ngiipata badémions ne munu wa Nzambi, bânà beenu balela badi bayiipata mu nganyi?" Mpindyewu, s'bavwa biipata badémions. S'bavwa bamba biprofeta. Ncya bushuwa anyi? Kadi kabayi bajingulula ne Yêyè ki uvwa Dîyì dya dîbà adi to, (bwa cinyi?) bwalu Yêyè kavwa muswikakane naabo to.

312 Mpindyewu angataayaaku Maataayi 24.24: "Ba-Kilisto baa mashimi," balaaba maanyi, "nebajuuke, ne nekwikale baprofeta baa mashimi biikalà mwa kwamba biprofeta pa bwalu abu," nwamonu's, "ne nebaseeswishe Basungula mene bu ne bivwa mwa kwenzeka." Nwacyûmvù mpindyewu anyi?

313 Monaayi bânà. "Mmu nganyi mudi bânà beenu balela. . . Pângikalà ngipata badémions ne Dîyì dya Nzambi," bwalu, Yêyè uvwa Dîyì dya Nzambi, "bânà beenu balela baa cyena mangumba badi bayiipata mu nganyi?" Mpindyewu, Nzambi nkaayende ngudi mwa kwipata démon, tudi bamanye aci, Nzambi nkaayende. Bwalu, bidi bikengela ne muntu wa makanda ikale ne makanda matambe a udi mu nzubu mwende awu. Bôbò's bavwa ne bukole bwa kucyenza.

314 Nudi bamanye's, mu Bwakabuulwibwa mwamwa, mbambe ne yêyè uvwa mwa. . . mufwilakanyi ne Kilisto uvwa mujuuke ku matuku a ndekeelu awu: "Ûvwa wenza bimanyinu ne maalu a kukema, bivwa biseeswisha too ne bantu bônso bavwa basômbèle pa buloba bujima, ne biseeswisha muntu ne muntu wa kudibo, ne beena Kilisto ne bônso, beena mênà avwa kâyi mafunda mu Mukanda wa Mwoyi wa Mwânà wa mukooko," dyandamuna ku Maataayi 24.24, "beena mênà avwa kâyi mafunda mu Mukanda wa Mwoyi wa Mwânà wa mukooko kacya ku difuka dya dyulu ne buloba."

315 Mwoyi ùvwà mu muji wa—wa mucu mulelela wa orange awu, ùvwà mubànde mupicile mu madimà ônsò awu ne bikwabo byônsò abi awu, ne mupite too ne ku dikakwamisha dya cimuma ku lusongo lwa mucu, kumutu kwa matamba ônsò masomeka ne matamba a cyena mangumba awu. Nwacyûmvù anyi? Nêndwijakajè. Muntu wa makanda. . .

Vulukaayi Davidi mpindyewu, ùvwà wa kweyemena, ne meeji matooke, uteeta bwa kwenzela Nzambi mudimu, kadi yêyè kayi muteekiibwe bwa kuwenza to.

316 "Bôbò," balaaba maanyi abu; kadi Yesu wakamba ne: "Bôbò badi balongesha dyumvwija (dya Mifundu) dya bantu bu ne ki Dilongesha diine," nwamonu's, kaciyi Dîyì dya Nzambi to, kaciyi



Diyi Dyende dishindika to; balongesha Kilisto wa mu maalu malonda, nwamonu's, cintu kampanda civwaku kale.

Kadi Bible mmwambe ne: "Yeyè udi." "NDI," kî nne "Mvwa anyi Nêngiikalè" to. "NDI, mpindyewu mene." Yeyè udi Diyi adi didi diikadilà ne mwoyi apa.

Yeyè uvwaku, ku cibangidilu, Ûvwa mu—Ûvwa mu—mu tubeji twa mutoloku; Ûvwa mu mwepu; Ûvwa mu cizubu; kadi mpindyewu Ûdi mu Lutete.

<sup>317</sup> Mpindyewu, udi walukila cyanyima bwa kuteeta kwikala kabidi ne mwoyi anyi? Twambèbi tûng bu ne Mwoyi awu uvwa mwalukile mupweke mu buloba, nudi nwela meeji ne Mwoyi (udi mupatuke awu) mmufwanyineku kuyiikila, kwalukila pâkaavwà cizubu cya kale aci cimane kuuma apu, kwalukilamu ne kwikalamu kabidi ne mwoyi anyi? KaWutuku wenza nanku to. "Bwalu kabyena mwa kwenzekaku to bwa aba baakakenkeshilabo musangu kampanda," kadi kabayi batentemuke ne Diyi pâvwàDi dyûla apu, "bakaadi bafwe, baye; nenku mêmà ne mingonga bidî biikale pabwîpi ne kubengiibwa, ndekeelu wabi nkwoshiibwa." Ncya bushuwa anyi?

Mpindyewu ndi ndwijakaja ne mwanyi mwônso.

<sup>318</sup> Monaayi Mufundu mpindyewu. Balongesha Nzambi wa mu maalu malonda, nwamonu's, anu bu ne badi bateeta kwikala ne mwoyi mu matuku a kale, bu ne: "Ee, Wesley's wakamba *cikampanda*." Anyi ne: "*Kampanda* wakamba *cikansanga*." Nudi nubenga Diyi dilaya dya dituku, Manà a dituku majaadikiibwe patooke tòò. Badi bateeta bwa kwela mvinyo wabo mukulukulu wa ci-Luthérien, wa ci-Baptiste, wa cyena Mpenta awu mu milangi yetu twètù mipyamipya ya biseba. Kabyenaku bikumbana to. Ne wetu Mvinyo mupyamupya ewu, mu milangi yabo ya biseba mikulukulu ayi, kabyakukumbanaku to. Bôbò bateete kwela Mvinyo mupyamupya ewu mu dingumba, dikutakana dyabo's dyâmweneshiibu. Kabeena mwa kucyenza to. Ûdi ùditaayisha.

"Mpindyewu, mwaneetu, ngamanyi kumona Diyi dya Nzambi, anu ku Diyi menemene!"

<sup>319</sup> "Mpindyewu, tangila kunu, docteur, piikalà... Twètù katwena—katwena mwa kwangata Aci to." Ned, ngeela meeji ne udi mupete ndambu wa bya nanku matuku mashaale aa. "Twètù, katwenaku mwa kwangata Aci mwab'ewu mpindyewu to. Bwanyi—bwanyi mêmè mbipiciibwe pâmwâpa ne wêwè mutungunuke mwine." Nudi bamanye's. Nwamonu's, kabyakukumbanaku to. Cidi citaayika anu pakalàkàà.

<sup>320</sup> "Kabatu beela citeetela cya cilàmbà cipyacipya ku cilàmbà cya kale to, bwalu neucifikishe ku dipandika cyônso." Nwamonu anyi? Yesu kaakambaku nanku anyi? Kwèna mwa kwela Mvinyo mupyamupya mu milangi ya biseba ya kale to. Ûdi ùyitaayisha. Mvinyo mupyamupya udi ne Mwoyi mu yeyè amu. Eyo.

321 Monaayi mwab'ewu cintu kampanda, lukasalukasa mpindyewu, patukaadi tujikija. . .muyiiki wetu apa. Monaayi Bwakabuulwibwa 16.13 too ne ku 14, panwikala baswe kufunda aci. Pàmwāpa ncyakupeta dībà dya kukùfika to. Ndi muswe nwikale batwishii bwe ne nucimone. Mpindyewu monaayi, eci mmpungi udi udila pankaci paa Lupanza Lwisambombo ne lwa Mwandamutekete.

Mpindyewu tudi. . .netujikije anu mu katanci kakese emu, bu nwênù mwa kuntwalaku mu ndambu wa tusunsa cyanaana. Ndi njikija mpindyewu.

322 Monaayi Bwakabuulwibwa 16.13 too ne ku 14, pankaci paa Lupanza Lwisambombo ne lwa Mwandamutekete: “Nyuma ya bukooya yisatu mifwanangane ne ndimba” (nukaavwa bamone aci anyi?) “yakapatuka mukana mwa muntu kampanda.” Mpindyewu monaayi, lukasalukasa. Nudiku anyi? Ambaayi ne: “Amen.” [Disangisha didi dyamba ne: “Amen.”—Muf.] Busatu bwa nyuma!

323 Mpindyewu wêwè mwaneetu wa cyena mangumba, sòm̄ba talala bwa katanci kakese cyanaana. Kujuuku wapatuka mu nzubu emu to, wêwè udi pambelu pààpa uteelejila ku cisanji, ku nshinga ku telefone awu. Kukangiku cisanji cyebe cya dikwata naaci mikaba ya mēyì aci to. Anji sòm̄baku talala bwa katanci kakese cyanaana, ne teeleja. Pawikala mulediibwe kudi Nzambi, neuteeleje.

324 Busatu bwa ndimba! Ludimba nnyama utu misangu yònsò utangila anu paanyima. Kacya kàtukù yèyè utangila kuyaayaye to; utu yèyè utangila anu kudiye ufuma. Nwamonu anyi? Kanwenaku numona anyi? Cintu cya busatu bunsantu cyakalediibwa penyi? Vulukaayi, “nyuma ya bukooya yisatu,” nyuma ne nyuma misunguluke. Nudi nucyumvwa anyi? [Disangisha didi dyamba ne: “Amen.”—Muf.]

325 Monaayi, yidi yitangila paanyima ku Nsangilu wa Nicée kwakalediibwa dilongesha dya busatu bunsantu, kî mmu Bible to. Kamwena cintu cya mushindu awu to. Yidi yitangila paanyima ku Nsangilu wa Nicée ku Nicée, Loomo, kwàkalediibwà dilongesha dya busatu bunsantu.

326 Monaayi kudiyi mifumine. Monaayi. Nenu busatu bwa ndimba bwakapatukila mu busatu bwa kale, bulwe kulela busatu bupyabupya, mamwâbò's. Mbufwanyine kwikala bupatukile mu cinyi? Busatu kampanda, “dragon,” nwamonu's, “nyama wa lwonji,” ne “muprofeta wa mashimi.” Busatu kampanda, bupyabupya. Bwalu ndimba eyi yakapatuka dībà kaayi? Bwôbò mene bwakapatuka dībà kaayi? Monaayi, yôyi eyi yikaavwa anuku kwine kwònsò aku, kadi kacivwa cyanji kumweneshiibwa to too ne pankaci paa Lupanza Lwisambombo ne lwa Mwandamutekete, pabwîpî menemene ne Bitampi kukangukabi (Hmm?) bwa kucibuulula.

327 “Bwalu mu Mukenji wa mwanjelo wa mwandamutekete, maalu masokoka a Nzambi avwa ne cya kumanyika,” bintu byônsò bya busatu ebi, ne mabatiiza a mashimi aa, ne bintu byônsò bivwa ne cya kumweneshiibwa. Nzambi atukwacisheku bwa twètù kumona cidi Bulelela! Kî nkwela meeji ne mmuntu kampanda udi uteeta bwa kwamba cintu kampanda bwa . . .

328 Ndi munkaci mwa kuumvwa mudi mwine nyuma awu umvwa Cyôci aci cimutacisha ku mwoyi, nudi numona’s. Ncyêna ngaakula bwanyi mêmè mwine to, mwaneetu wa balume. Ndi ngaakula bwa Mwanjelo wa Mukalenge udi mu cituudilu. Ncyá bushuwa menemene.

329 Monaayi, busatu kampanda! “Dragon,” mbanganyi badi bamanye civwa dragon awu? Úvwa Loomo. “Nenku dragon kwimanaye kumpala kwa mukaji awu bwa kudyaye mwanende wa balume anu uci ulediibwa.” Ncyá bushuwa anyi? “Nyama” udi umvwija cinyi mu Bible? Bukole. Eyo. “Muprofeta wa mashimi, muprofeta wa mashimi,” wa mashimi, mulaaba maanyi. Nwamonu anyi?

330 Wàkabangila penyi? Ewu udi “mmuprofeta wa mashimi”, ku bumwe. “Muprofeta wa mashimi,” paapà wa kumpala; nenku kubangila apu ki kupatukaku “mu—mukaji wa masandi, ne mamwëndè wa bandumba,” cintu mu kaabuujima.

331 Busatu bwa mashimi kubangabu kuujuuka; kî mmu matuku a mbangilu to, kacivwa cifwanyine kumweneshiibwa mu matuku a mbangilu to, byakatungunuka anu naaci too ne ku ndekeelu. Kadi paalu Bitampi Mwandamutekete, ne paalubi kukangula maalu masokoka awu ne kuàbuulula, ki pôpò apu “paalu ndimba ayi, nyuma ya bukooya yisatu yidi mifwanangane ne ndimba, kupatuka bwa kudimweneshayi,” dilongesha dya busatu dilwishangana ne Bulelela. Nwamonu anyi? Huh!

Nudi numona kudidi difumine anyi? Nudi numona kudidi dyalukila diya anyi? Nsangilu wa Bukwântèndeleele. Bwônsò bwabo mbâna baa muntu, nansha bishi; nyuma yimweimwe ayi, cintu cimwecimwe aci.

332 Kadi tangilaayi. Ciseeswisha dikema, cyenza bishima! Nenku yôyi eyi ndémóns miikale yiya kudi nzambi yônsò ya pa buloba, yenza bishima, bwa kubaseeswisha mu dituku dya ndekeelu, ne neyituute dyakalenga mu diciyenza. Cyàkambà Nzambi ncinyi bwa mwine nyuma wa bukooya awu?

Wakamba ne: “Nêmpwekè nkabwele mukana mwa baprofeta abu bwa kubafikisha ku dyamba ciprofeta cya mashimi, bwa kufikisha Aakaba ku dipatuka kwaka bwa yêye kubutudiibwa.”

333 Nzambi kwambaye ne: “Ndaaku. Neutuute dyakalenga. Neubafikishe ku diciitabuuja. Bôbò kî mbiimanyine pa Dîyi adi to, anu kwine kwônsò aku.” Nwamonu anyi? “Ndaaku, bwalu wêwè neumutwishe. Wêwè ki wacyenza, pawabwela munda mwa baprofeta baa mashimi abu, bwalu yêyè mmubêyemène

anu bôbò. Ne yêyè kî mmumanyeku kantu nansha kamwe pa bidi bitangila Diyî to, anyi kaakudyenzejaku nansha bwa kuyiila Dyôdi adi to. Kêna mwa kucyenza to, bwalu yêyè mwine's mmungonga, anu kwine kwônsò aku." Nwamonu anyi? Nwamonu anyi? "Neutuute dyakalenga."

Tangilaayi kuneeku ndimba ya mashimi eyi, yitangila paanyima ne: "Mona's, nudi bamanye cyakambabo kwaka ku Nicée anyi?"

<sup>334</sup> Cyakambabo nansha ciikàle cinyi, kwaka ku Nicée. Mêmè ndi ngamba cidibo bambe apa ku Nkwasa wa butumbi wa Nzambi; civwà mwa kwikala, kî ncìvwàku to; ciikalàku, bwalu Yêyè udi "NDI." Nwamonu anyi?

"Baa mashimi." Tangilaayi aci. Huh! Monaayi kudiyi mifumine.

<sup>335</sup> Mpindyewu (Teelejaayi ne ntema.) Tudi tumona bitooke tòò, paanyima paa Bitampi Mwandamutekete bikangudiibwe. Aci mbwa kubuulula bwalu busokoka abu: Busatu abu ncinyi? Nwamonu anyi? Mmwaba kaayi ukaavwaci kwôkò cibiikidiibwe ne mbusatu? Nwamonu anyi? Mmwaba kaayi mu Bible udiYe nansha uteela mwaku wa busatu? Mmwaba kaayi udiku kufwanyine kwikala Nzambi yisatu, utudi tukuukwila Nzambi yisatu kadi twètù kupanga kwikala bampangaanu?

<sup>336</sup> Mmunyi mudibo mwa kwikala batapuluke, padiYe mwambe ne: "Mêmè ne Taatù Wanyi tudi Umwe"? "Panudi kanuyi nwitabuujà ne Mêmè ki Yêyè to, nenubutuke mu mpekaatu wenu, nwamonu's, mu bupidya bwenu." Mpekaatu mbupidya. "Nenubutuke mu bupidya bwenu."

Kaa, nudi nwamba ne Mêmè ndi nganyi,  
nwambi ne Mêmè ndi mufumine penyi,  
Kaa, nudi bamanye Taatù Wanyi, anyi nudiku  
mwa kwamba Dîna Dyende anyi?

NDI Rose wa Shalona, Mutooto udi Ûkenkà wa  
mu Dinda.

Nudiku mwa kungambilaku ne Yêyè awu Nganyi anyi?

NDI wâkaakula ne Mòsà mu cipuka civwa  
cilaluka Kapyà awu,

NDI Nzambi wa Abraham, Mutooto udi  
Ukenka wa mu Dinda awu.

NDI Rose wa Shalona, kaa, nwambi ne Mêmè  
ndi mufumine penyi;

Kaa, nudi bamanye Taatù Wanyi, anyi nudiku  
mwa kwamba Dîna Dyende anyi? (Amen!)

NDI Alpha, Omega, Cibangidilu ne Ndekeelu;  
NDI bufuki bwônsò nkòòng, ne Yesu ki Dîna  
Dyende.

Acì ncyà bushuwa. Kamwena busatu nansha! To, mukalenge. Acì ncintu cya mashimi.

<sup>337</sup> Bitampi Mwandamutekete, bikangula maalu masokoka “avwa ne cya kujika” awu, bidi bileeja patooke. Citampi cikangula; citeeka bintu mu myaba yabi, cileeja patooke, citookesha Malelela masokoka avwa Bitampi bisokoke munda mwa bidimu byònsò ebi awu, kupicila mu ekeleeziya yònsò ayi ne mangumba awu.

“Mukaji munene wa masandi awu,” wa mu Bwakabuulwibwa dikumi ne mwandamuteket-. . . Ûwva nganyi? Kadi’s nyawu kabidi “MAMWÈNDÈ WA BANDUMBA.” Nwamonu anyi?

“Mpindyewu, wêwè wababiikidi ne ‘mbiminyi,’” mùdi wamba, “Mwaneetu Branham.” S’ncyà bushuwa.

<sup>338</sup> Kadi, nwavulukaayi ne, ciminyi nnyuunyi’s. Yêyè pende, mmulaaba maanyi bwa kwikalaye ubuuka. “Nyuma yibidi ayi neyiikale mitambe kufwanangana mu mushindu wa bifwanyine kuseeswisha Basungula. . .” Ciminyi ncinene anu mudi—mudi mukanku amu. Ncifwanyine kubuuka anu bu mukanku awu; ne ncilaaba maanyi bwa kwikalaci cibuuuka, anyi ciyiisha, anyi cyamba biprofeta, monaayi, mwomumwe anu ne mukanku. Kadi kaciyena mwa kulonda mukanku muulu mutumbuke to. To, to. Cyôci cididinge citeete bwa kulonda mukanku, dikutakana dyaci nedimweneshiibwe. Eyowa’s, mukalenge. Kacyenaku mwa kulonda mukanku to.

<sup>339</sup> Kaa, ncifwanyine kwamba ne: “Ndi ngiitaba ne Yezu Kristo m’Mwânà wa Mvidi Mukulu. Ndi ngiitaba Mvidi Mukulu, Taatu wa ngulu yònsò, Mufuki wa dyulu ne buloba; Yesu Kilisto Mwan’Ende,” ne bikwabo. Kaa, cya bushuwa, badi mwa kwenza nanku. Kadi bishi bwa ne Yêyè udi umwèumwè awu makeelela, leelu, too ne kashidi? Nwamonu anyi?

<sup>340</sup> Mukanku nnyuunyi utu mwibaka ne ngiibakilu wa pabwende. Kakùtukù cintu bu yêyè awu to, pa buloba apa. Nwamonu anyi? Yêyè—yêyè. . . Kabangu-nyuunyi yêyè anu mudidinge muteete kumulonda, anyi nyuunyi mukwabo kana yònsò ewu, mmufwanyine kusunsuluka. Dikutakana dyende ndifwanyine kumweneshiibwa, cya bushuwa menemene. Mmufwanyine kutaayika anu pakàlàkàà paaswaye kuteeta kwela Mvinyo mupyamupya mu mulangi wa ciseba cya kale. Nwamonu’s, mmufwanyine kutaayika anu pakàlàkàà. Mmufwanyine kusunsuluka. Yêyè katu mwibaka, yêyè kêna. . . Wende mubidi kî mmukwatakaja ne misunya yidi mwa kumulama muulu mwamwa to. Pakaadiye ukafika mu bibwashibwashi bya muulu mwamwa, piikalayi kayi mwenza, mudyanjila kuteeka, mudyanjila kulongolola, mulela mwikale mukanku, neataayike ashaale anu tusunsukila. Nwamonu anyi? Masala mmafwanyine kumutuuka ku mapwapwa aku, ne

mufwanyine kupona panshi. Cya bushuwa. Kêna mwa kulonda mukanku to, muulu mutumbuke mwamwa. Yêyè adidinge anu ateete kulonda, dikutakana dyende adi's nedimweneshiibwe. Ncyá bushuwa. Kwêna mwa kucyenza to.

<sup>341</sup> Bwa cinyi? Yêyè kêna mwa kumona bu mukanku to. Kuteeta kutupika bwa kuya muulu menemene kudi ne dikwacisha kaayi, pawikala kuyi mwa kumona ne udi penyi paukaadi usanganyiibwa muulu amu? Ne bu yêyè anu ne cya kuteeta, anyi mene kuteeta kutentula mukanku mwine ewu, mu diya dya muulu, yêyè's udi ushaala mpofu mu mushindu wa kayi umanya cidiye musalukile ciine ne ncinyi to. S'ncyá bushuwa. Yêyè udi ùsàma wela ne mbila, wenza bintu bya lukutukutu; kadi mwambile anu Dìyì tǔng, balumyana wa yaaya, anu mwaba awu dikutakana dyende's didi dyumba dimweneshiibwa.

<sup>342</sup> Yikila nende pa dibatiiza mu Dìnà dya Yesu Kilisto, anyi, ne Yêyè udi umwèumwè awu makeelela, leelu, too ne kashidi, byônsò—byônsò bya mushindu awu abi, umwambile. “Mona's, kaa, mpindyewu anji indila kakese!” Nwamonu anyi? Kaa, eyowa's, mwaba awu nsàlà yibanga kumupoopoka. Nwamonu's, cyônsò cidiye naaci cidi anu kutupika kwa uya muulu, kwamba kwa biprofeta, kwipata kwa badémons, ne kwakula kwa mu myakulu, ne kwela kwa mbila, ne kwenza kwa bintu bya lukutukutu, kunyeemakana kwa wàbànda wàpweka. Kadi kudidingi wàteeta kulonda muulu Mwamwa nansha; mona's, yêyè's neamanyike bushuwa cidiye.

<sup>343</sup> Kadi, paabi's mmuteekiibwe mu mudimu. S'mmulaaba maanyi. S'udi mwa kubuuka. Ùdi mwa kutuuta milèlè, kubànda muulu mwamwa, kadi kayi. . . anu too pa mwaba kampanda. Nwamonu's, yêyè udi mwa kudya munyiinyi mubole, kadi kêna mwa kudya Munyiinyi mubishi wa ucifuminaku ku Nkwasa wa butumbi to.

<sup>344</sup> Yêyè mmpofu. Mmusaluke bikole, kadi kî mmumanye cidiye musalukile ciine to. Nwamonu's, Nyuma umwèumwè udi mupone pambidi pende awu, bu mvula, bwa kumuvwija blé; yêyè kêna blé to anu kwine kwônsò aku. Ùdi ùtaayika. “Kaa, ncyèna mwa kwitaba. . . Kaa, to, mukalenge! Ndi mumanye ne Docteur Jones mmwambe ne. . .” Eyo, tungunuka. Nudi numona anyi? Tungunuka, pawikala muswe.

<sup>345</sup> To, monaayi, yêyè katu mulediibwe, anyi mwibaka, anyi mudyanjila kulongolola, bwa kwikalaye nyuunyi wa mushindu awu to. Yêyè udi mwa. . . Ùdi. . . mmufwanyine kwikala didimà dya mpusu diikale dikolela pa mucu wa orange, kadi kadiyiku dyumukile ku miji to. Yêyè ncintu kampanda cidibo basakidile. Nenku padibo bàbànda bakafika kuulu menemene mu mangumba abo amu mu mushindu wa kabayi mwa kumona Dìyì dya Nzambi didyanjila kulongolola diikàle dishìndika, dìbà adi dikutakana dyabo didi dimweneshiibwa. “Kaa, cintu

aci, Kafulu kaa bukênkè kuulu kwa mutu, ne byônsò abi, kaa, Aci's ndukutukutu's." Nwamonu anyi? Mumanyike.

<sup>346</sup> Yêyè katu mwibaka bwa kumona too ne kule kwa nanku to. Yêyè udi mwa kumona anu mwaba udi tulondo twende twa cyena mangumba tumupetesha mushindu wa kutangila awu. Kadi, paùdi upita aci nanku, yêyè's mmpofo anu mudi mudima amu. Pa dîbà adi's ki padi dikutakana dyende dimanyika. Nwamonu anyi? Apu ki padi mukanku mulelela ùsòmbela ne panshi bwa kudyawu. Eyowa's, mukalenge. Ki mwaba awu udi mikanku milelela misungula, yimona cidiye. Padiye kayi mwa kwangata Diyì adi to, badi bumba bamanya anu mwaba awu ne mulumyana's neiminyi cya cyena mangumba.

<sup>347</sup> Bwa cinyi, bwa cinyi yêyè kèna mwa kubuuka? Mbwalu, tangilaayi numone anu bituye yêyè udyà biine. Yêyè utu udyà minyiinyi mibole ya cyena mangumba. Abi kabya—kabyakwenzaku ne mubidi wende uvwijiiibwe wa nyuma to, kabyakumuteekaku pa dikumbanangana dya mu nyuma to, mu ngaakwilu mukwabo, bwa kumutuntumuna kuya nende kumutu kwa tuumaalu tûtù tutapululangana twa cyena mangumba atu to. Nwamonu anyi? Nwamonu's, yêyè utu udiishiibwa anu ne bintu bibole; wende mubidi mmwenza anu ne biine abi. Kèna mwa kubàndakù mwamwa muulu mudi Munyiinyi mubishi ukafikisha mukanku awu amu to. Kèna anu mwa kubàndakù to. Nwamonu anyi?

<sup>348</sup> Aci cidi cyuja Maataayi 24.24. Ùdi ùbùùka, ùtùpika ùya mu lupeepa, ùtuuta mapwapwa, kadi kayi anu mwa kubànda muulu menemene to. Nwamonu anyi? Ncya bushuwa. Nudi numona's, kèna mwa kuya to, yêyè kèna mwa kukafika muulu menemene mudiye mwa kupeta Manà mabishi awu to. Ùdi mwa kudya manà a kale adi panshi apa, tùlulù tufwe twa kale tudibo badyate ku mashinyi kukaadi lumingu lujima, ne ngondo mujima, anyi bidimu makumi anaayi, tubwele biinya. Ùdi mwa kudya bya nanku awu, ne kucyonkomokelapu, ne kwela mikunda ne mbila, ne kwenza bintu bya lukutukutu, kutupika kuya muulu ne kubuuka bu mukanku mukwabo. Mmulaaba maanyi, anu mudi nyuunyi mukwabo.

<sup>349</sup> Kadi udi cifwanyikijilu cya mukanku, mwine kabangu-nyuunyi awu. Tudi bamanye aci. Ki cidiye bushuwa, kadi kèna mwa kulonda mukanku mulelela awu to. Nwamonu anyi? Kèna anu mwa kucyenzaku to. To, mukalenge. Wende mubidi kî mwibaka to; yê' utu udyà minyiinyi mibole mishiileshiihangane, monaayi, nenku kacyakwikala. . . kacyakwikala—kacyakwikala Munyiinyi mubishi, Manà mabishi to. Neifwanyine kwikala cintu kampanda civwa Luther mwambe, Wesley mwambe, anyi Docteur *Kampanda* mwambe. Kacyakwikala pa cyakamba Yesu bwa dîbà edi to.

<sup>350</sup> Tuyaayaaku mpindyewu, ku dyoya. Balaaba maanyi, “ba-Kilisto,” mu matuku a ndekeelu, kadi “balongeshi baa mashimi ne baprofeta baa mashimi.” Monaayi mudibi bikoka ntema! Mpindyewu ndi muswe nufwanyikije byôbì ebi; katwena ne dîbà dya kubibala to, Maataayi 24.24 ne Timote Mwibîdì 3.8.

<sup>351</sup> Maataayi 24.24 mmwambe, mu matuku a ndekeelu, nwamonu’s: “Nekulwe ba-Kilisto baa mashimi,” balaaba maanyi, baa mashimi, “baprofeta baa mashimi, ne nebaleeje bimanyinu ne maalù a kukema,” anu mudi Mulelela—Mulelela menemene, “ne nebiikale—nebiikale mwa kwamba kuseeswisha Basungula mene.” Mpindyewu monaayi, awu n’Yesu uvwa wakula.

<sup>352</sup> Ki Pòlò ulwàlwa ewu, anu paanyima Pende menemene, kwambaye ne: “Mpindyewu, mu matuku a ndekeelu, nekulwe batendeleedi, nwamonu’s, biikale ne cimwenekelu cya difwana dya Nzambi. Ne nebalombole bakaji bakutakane, badi balalula kudi nkuka ya mishindu mishiileshiilangane ya pa buloba.”

Kadi badi badikonka, bamba ne: “Bwa cinyi wêwè udi anu udyula bakaji abu’s?” Kaa, Nzambi wanyi. . . Kabeena nansha baCimona to.

“Balombola bakaji bakutakane, bambule majitu a nkuka ya mishindu mishiileshiilangane,” kule ne bintu bu mudi. . . bya. . . Nwamonu’s: “Nenku bu Yane ne Yambele. . .”

Maataayi 24.24, “ba-Kilisto baa mashimi,” baa mashimi, balaaba maanyi, benza bimanyinu ne maalù a kukema bwa kuseeswisha Basungula.

“Mpindyewu anu muvwa Yane ne Yambele bakandameene Mòsà, bya mwomumwe kabidi booneke aba; meeji mooneke pa bidi bitangila Diitabuuja adi.” Kabiyi diitabuuja “kampanda” to. “Diitabuuja adi!”

<sup>353</sup> “Diitabuuja dimwe, Mukalenge umwe, dibatiiz-. . . dimwe.” Kwêna mwa kwikala ne “Diitabuuja dimwe” kuyi mwitabuuje “Mukalenge umwe” to. Kwêna mwa kwikala ne mabatiiza abidi, kakuyi dimwe bwa Taatù, ne Mwânà, Nyuma Mwîmpè to. “Dibatiiza dimwe,” Yesu Kilisto. Ncya bushuwa. Nwamonu’s, dibatiiza dya mashimi!

<sup>354</sup> Monaayi, nwayifwanyikijaayi yònsò ayi mpindyewu panwafikila kumbelu. Monaayi Maataayi 24.24, Yesu ngudi wakula ewu; Pòlò, Timote Mwibîdì 3.8; mikwabo yàbùngì. Nenku mpindyewu fwanyikijaayi cyôyì aci.

Ne pashiishe fundayyi Mufundu mukwabo, Luuka 17.30, Maalaki 4.

“Anu muvwa Yane ne Yambele bakandameene Mòsà,” Dìyì dilaaba dya dîbà adi, “bya mwomumwe kabidi bantu aba,” kî mmuntu to, “bantu,” balaaba maanyi, “badi bakandameena Bulelela.”



355 “Mu dituku mene dyabuuludiibwa Mwânà wa muntu.” Bwakabuulwibwa 10.1 too ne ku 7, nwâmubalaayi panwafika kumbelu, “Mukenji wa mwanjelo wa mwandamutekete, ukangula Bitampi.” Ncinyi aci? Kî mmwanjelo udi Mwânà wa muntu to; kadi musanjeela udi ubuulula Mwânà wa muntu. Nudi mwa kubisoolakaja mpindyewu anyi? Mwaba awu ki udibi bimweka bikole menemene bwenu nwênù, nwamonu’s. Kî m’Mwânà wa muntu, Yêyè mwine to; kadi mwanjelo wa mwandamutekete, musanjeela wa mwandamutekete, ki udi ubuulwila bantu bônso Mwânà wa muntu, bwalu Cikaadi cyumuke mu cizubu. Yêyè kêna mwa kuCivwija bulongolodi to. Cikaadi Lutete, Lwôlo lwine, cyakabidi.

356 “Ne mu dituku adi, Yane ne Yambele nebakandameene,” balaaba maanyi (beena kwitabuuja baa budingibudingi ne beena bupidya, ekeleeziya wa kwisukwisu ne beena Mpenta) nebajuuke bwa kulwisha Lutete lulelela, “kadi nubalekele; dikutakana dyabo nedimweneshiibwe, bu mwakadi dya bôbô abu.” Nwamonu anyi? Nuumvu mpindyewu anyi? [Disangisha didi dyamba ne: “Amen.”—Muf.]

357 Bwakabuulwibwa 10, mmwambe ne: “Mu matuku a dyela dya mpungi wa mwanjelo wa mwandamutekete.” Mpindyewu nuvuluke ne, wa mwandamutekete, Cikondo cya Ekeleeziya wa Laodikiya. “Dyela dya mpungi wa mwanjelo awu,” piikalà cikondo aci cya ekeleeziya cimane kudyenza bulongolodi ne cishaale cikondo cya ekeleeziya, piikalaci cimane kujaama mu bulongolodi bwaci bwa cyena Mpenta; piikalà musanjeela wa ciine . . .

358 Musanjeela yônso uvwa cinyi? Martin Luther uvwa cinyi? Kadyuwu keela Katolike. Wesley uvwa cinyi? Kadyuwu keela ba-Luthériens. Mpenta uvwa cinyi? Kadyuwu keela bakwabo abu. Mwoyi mmuye penyi mpindyewu? Kule ne bulongolodi. Kakucyena kabidi cizubu to; cikaadi Lutete. Ncinyi ciine aci? Kadyuwu keela Mpenta, nwamonu’s, bwa kuuja Mufundu wa dibà edi. Nwamonu anyi?

359 Monaayi, dituku mene didi musanjeela ewu . . . Kî mpadiye ucitwadijilaku apu to, kadi padiye ubanga kwamba patooke Mukukenji wende. Nwamonu anyi? Nkokelu wa Kumpala: dyondopa; Nkokelu Mwibidi: ciprofeta; Nkokelu Mwisatu: dikangula dya Diyì, maalu masokoka mabuulula. Kakucyena, kakucyena kabidi mulongo mutambidile bwa kubuulula Diyì to, mutambidile baprofeta. Kadi mushindu umwepele udi muprofeta mwa kushindikiibwa nku Diyì. Nenku, vulukaayi ne, Nkokelu Mwisatu uvwa ndikangula dya Bitampi Mwandamutekete abi, bwa kubuulula Bulelela busokoka buvwa butwibwe citampi mu Diyì. Nudi nucimona anyi? [Disangisha didi dyamba ne: “Amen.”—Muf.]

<sup>360</sup> Mpa díbà adi, mu dituku adi mudi cintu eci ne cya kwenzeka, mwikala Yane ne Yambele, batentudi abu, mwa kumweneka cyakabidi. Anu mwakenzabo paakamweneka Mòsà ne Dìyi dya ku cibangidilu, bwa kuDyambaye, badi bamweneka bwa kuDitentulabo. Cya bushuwa menemene. Mpindyewu nudi mumona Maataayi 24:24 cidiye anyi? Nwamonu's, balaaba maanyi!

<sup>361</sup> Mpindyewu kudi bintu bisatu bitwikala mwa kwamba kumpala kwa kujikija. Ki cyôci eci. Ndi muswe nuteeleje ne ntema yônsò mpindyewu patukaadi tujikija apa. Bintu bisatu, vulukaayi ne, bintu bisatu mbyûle. Bintu bisatu mbiteekiibwe kumpala kwenu patudi twakulangana apa.

<sup>362</sup> Cya kumpala. Buloba budi mu ngiikadilu wa Sodoma. Yesu wakamba ne necyenzeke. Tangilaayi dinyangakaja dya maalû: bakaji beetu bakeba kwenza maalû bu bantu balume; balume beetu bakeba kwenza maalû bu bantu bakaji, bavwijiibwe bilûmaabikàjì; babole, bakooyike, bya ciipanshi, bakwata kudi dyabulu, kabayi bacimanye to. Bible mmwambe ne cyôci aci necyenzeke, ne ki mwaba ukaadici ngwôwô awu.

Ciibîdi. Mmu diine díbà adi, bilondeshile Mufundu ewu, mudi Yane ne Yambele bamweneka. Nciibîdi aci.

Ciisâtù. Mmu dyôdi díbà dimwedimwe adi mudi Mwânà wa muntu ne cya kubuuludiibwa.

<sup>363</sup> Ki mwena kwitabuuja wenu nyêyè awu, mwena kwitabuuja wenu wa budingìbudingì, ne mwena bupidya wenu. Ki Dìyi dilelela ndyôdi adi didisunguluje, dishindikiiibwe; ki mwena kwitabuuja wa budingìbudingì nyêyè awu mwikale uDitentula; ne ki mwena bupidya nyêyè awu mwikale ubenga cintu cyônsò mu kaabujima.

Kadi nekwikale Bukênkè ku díbà dya diloolo,  
Njila wa ku Butumbi nenumupete bushuwa;  
(Ncya bushuwa anyi?)

Matunga adi akosoloka, Izaleela udi  
utabuluka,  
Bimanyinu byakadyanjila Bible wetu kwamba;  
Ne matuku a baa Bisamba bya bende mmabala  
(Sodoma), mûle tente ne bintu bya byenza  
bwôwà;  
“Alukilaayi, Nwênù badi batangalake, nuye  
kwenu nwênù.”

Dituku dya bupikudi dikaadi pabwîpì,  
Myoyi ya bantu yidi yamba kwimana, mu  
bwôwà ebu;

Ujiibwayi ne Nyuma wa Nzambi, ikalaayi ne myëndù yenu milongolola ne misukula, (Bwa nwâpeta mwa kumona Dîyi dya dîbà edi.)  
Bandulukaayi! Bupikudi bwenu bukaadi pabwîpì.

Baprofeta baa mashimi badi bashima, (Baakamba ne nebiikaleku; balaaba maanyi.), badi bavila Bulelela bwa Nzambi, Bwa ne Yesu Kilisto udi Nzambi wetu;

Mbwena kwamba ne, kabeena baBwitabuuja to. Bible mmwambe ne nekwikale cintu aci mwaba ewu. S'ki cyôci eci!

Kadi twêtù netwendele myaba yidi bapostolo badyate.

Bukênkè bumwebumwe abu! “Ne nealujulule Diitabuuja dya baataatù kudi bânà.”

Dituku dya bupikudi dikaadi pabwîpì, (Pabwîpì paa menemene.)

Myoyi ya bantu yidi yamba kwimana bwa bwôwà; (Buloba budi munkaci mwa kutùkina.)

Kaa, ujiibwayi ne Nyuma wa Nzambi, ikalaayi ne myëndù yenu milongolola ne misukula.  
Bandulukaayi! Bupikudi bwenu bukaadi pabwîpì.

Nudi nwitabuuja aci anyi? [Disangisha didi dyamba ne: “Amen.”—Muf.] Nanku twinyikaayi mitu yetu.

<sup>364</sup> Pambelu pàapa mu ditunga mùyaaya Mukenji ewu, kuumukila ku Côte Est too ne ku Wesete, kuumukila ku Californie too ne ku New York, tupweka tukabwela ne mu Sud, tubànda tukabwela ne mu Nord, kupatuka kuya kabwela too ne mu midimu ya bwambi, ne mwaba kana wônsò uyaayaWu awu, ne mu tabernacle ewu. Twêtù tudi balanda. Katwena ne bintu binene, bya katanku, bya tuyaayi tukamone ebi to, ne mayiisha a ku télévision. Tudi anu tuditacisha bwa kwenza mwetu mutudi peetu mwa kwenza amu. “Kadi bônsò badi Taatù muMpe nebalwe.”

<sup>365</sup> Mpindyewu, ndi muswe numanye ne bwalu ebu mbwa cya bushuwa, ne nwênù badi bateeleja mukaba wa mêyi ewu abu. Nudi bafwanyine kwikala badyâmbidile ne mvwa nkeba kwamba cyôci aci bwanyi mêmè mwine, bu mudibi ne mêmè nguvwa utwala Mukenji ewu. Mêmè ncyêna ne bwalu nansha bumwe bwa dyanza mu Wôwò awu to, pa kuumusha anu dîyi cyanaana. Nenku, dîyi dyanyi, nansha mudidi dibengangana ne wanyi mmwenenu emu; mvwa mêmè njinga kwikala mwedi wa mateyi a nyama. Kadi ndiswa dya Taatù wanyi dîndî ngamba patooke bwa kwenza, ne mupangadike bwa kwenza.

366 Kî mmémè Wâkamwènèka kwînshi kwa musulu kwaka awu to; mèmè mvwa paanyi anu mwimane mwaba awu cyanaana paakamwenèkaYe apu. Ncyèna Yèyè awu udi wenza bintu ebi ne udyanjila kwamba bintu bidi byenzeka mu bupwangane bwònsò ebi awu to; mèmè ndi paanyi anu ewu udi pabwìpì padiYe ubyenza apu. Mvwa mèmè anu díyì cyanaana divwaYe ukwata naadi mudimu, bwa kuCyamba. Kabivwa bîmvwà mèmè mumanye to; mbîmvwà mudilekelele ku byòbì, bwa Yèyè kwakwila kùndì. Kî mmémè to, kacivwa mmwanjelo wa mwandamutekete awu to, kaa, to; civwa ndimweneshiibwa dya Mwânà wa muntu. Kacivwa mmwanjelo, mukenji wende to; civwa mbwalu busokoka buvwa Nzambi muvungulule. Kî mmuntu to; n’Nzambi. Mwanjelo kî nguvwa Mwânà wa muntu awu to; yèyè uvwa mmusanjeela mutuma kudi Mwânà wa muntu awu. Mwânà wa muntu awu n’Kilisto; Yèyè ki Unudyadya ewu. Kanwena nudya muntu to; muntu, ende mèyì neapangile. Kadi nudì nudya Mubidi-Dìyì udi kawuyi mwa kupangila wa Mwânà wa muntu.

367 Pawikala kuyi mudye muukute Dìyì ne Dìyì dyònsò, bwa kudipeesha wèwè mwine dikanda dya kwikala kubuuka kumutu kwa mangumba ònsò aa ne maalu a pa buloba, udiku mwa kucyenza musangu ewu, patudi tusambila apa anyi?

368 Taatù munanga, eci ncintu cikole. Kî mbipeepele bwa muntu wa cifwaka kucyenzaye to. Wèwè ngudi mumanye maalu ònsò. Nenku ndi nKulomba, Nzambi munanga, bwa kabàcyũmvũku bibi to. Kadi, mu Bukênkè bwa Dìyì Dyebe, swaku bwa bantu bendelemu.

369 Nenku, Taatù Nzambi, mèmè ncyèna mumanye ne mwine Musungula awu ngwepi to; Wèwè ngudi mumanye. Mèmè ncyèna mumanye ne Dilwa Dyebe didi dîbà kaayi to. Kadi ndi mumanye anu ne Wèwè wâkamba ne penzeka bwalu ebu, balaaba maanyi, baa mashimi aba; kaciyi menemene ne mpaakabangabo apu to.

370 Mòsà wakabalekela anu cyanaana, bwalu kavwa mwa kwenza kabidi cintu pa bwalu abu to. Yèyè uvwa mwa kwamba anu byúvwà Wèwè wamba abi. Wâkamwambila bwa kubiikilaye nkùpà; pashiishe bôbò kuyibiikila paabo. Wâkamwambila bwa kukudimunaye mâyì kulwawu mashi; pashiishe bôbò kucyenza paabo. Mòsà uvwa yèyè anu utumikila, ku Dìyì ne ku Dìyì, mùvwà Wèwè wamba amu kadi, pashiishe Wèwè ki Wâkenza bwa dikutakana dyabo dimweneshiibwe.

371 Mpindyewu, Taatù, Wèwè uciidi anu Nzambi. Dyòdì Dìyì dimwedimwe adi ndyakamba ne bwalu ebu nebwenzeke mu matuku a ndekeelu. Bantu bààbũngì baa meeji matooke, bu mutuvwa bambe mu dyalumingu dishaale, bateeka cyanza cyabo pa Musheete wa cipungidi awu, pa ditempu dipyadipya, kaciyi pa makaaya a beena Lewi to, mbadishinde e kufwa, “bafwe mu

mpekaatu ne matomboka,” bakokangana ne kondo kaabo bôbô biine kaa mwoyi.

372 Bambi bààbûngî basômbe muntu mu birô byende, ùbala Diyî adi, kadi upicisha dibegi adi lukasa; wenza bwa kâlû kutaayisha bintu, mumanye ne mmufwanyine kujimija kaaba kende kaa luumu munkaci mwa bantu, mu ekeleeziya wabo ne mu dingumba dyabo. Nzambi tûkwàcishèku twètù bwa katwenjiku nanku to!

373 Kezulaku myoyi yetu, Mukalenge, ku bukooya bwônsò bwa pa buloba. Mukalenge, nyewu ndi mwimane mudilongolole bwa kukezudiibwa. Ndi mwimane mudilongolole, pamwe ne ekeleeziya ewu ne bônsò badi munkaci mwa kuteeleja abu, ne ewu yônsò wateeleja mukaba wa mêyi ewu awu. Nyewu ndi mwimane, Mukalenge, ndomba dikezudiibwa. Mukalenge, nda naanyi ku nzubu wa Mufwimbi ne uncibulule tupese tupese, umfwimbe nshaaleku musadidi ûdi Wêwê mufwanyine kujinga.

374 Bwalu, Mukalenge Yesu: “Ndi muntu wa mishiku mibiipe,” bu mwakeela Yeshaayi lubila, “musômbe ne bantu baa mishiku mibiipe; nenku dyakabi dyanyi, bwalu ndi mmona dibuuludiibwa dya Nzambi munkaci mwa kumweneshiibwa,” bu mwakamona Yeshaayi Banjelo mu Ntempelu. Ndi mmona cikondo cya nshikidilu, Mukalenge, nenku dyakabi dyanyi ne dya famiye wanyi; dyakabi dyanyi ne dya cisamba cyanyi. Èyi Nzambi wa Cyendeleele, ikalaku neetu luse. Ndi ndomba bwanyi mêmè mwine ne bwa cisamba. Kutulekedi twabutuka pamwe ne badi kabayi biitabuuje to, kadi swaku twikale ne mwoyi pamwe ne beena kwitabuuja.

375 Dingumba dyônsò, Mukalenge, mulume anyi mukaji yônsò...Ncyèna mwa kulombaku bwa Wêwê kubenesha dingumba to, bu mûndî mumanye ne Udi mudibenge. Kadi ndi anu mwa kwamba, Mukalenge, ne paWikala ne yimwe ya ku mikooko Yebe pambelu pàâpa munkaci mwabo, swaku bwa yiteeleje mukaba wa mêyi ewu. Swaku bwa yiteeleje Cyôci aci, Mukalenge, ne yiCyûmvwê ne cyumvwilu ciwayipeesha Wêwê aci, ne yipatuke ne yiKwakidile. Swaku bwa kayiseeswishibu kudi bufofo ne bilele bya dituku edi to. Swaku bwa kayididingiku yateeta kudya ku cintu kampanda civwà citalu mu dituku dikwabo aci to. Swaku bwa yangate Diyî.

376 Mushindu awu ngwakaKupoopelabo pa nkuruse kudi Bafaalesa, Mukalenge. Bavwa bôbô bangata citalu cya mu dituku dya Môsà, bakeba kucyonkomokelapu; paanyima paa Wêwê mumane kufila cifwanyikijilu, mu cipeela, cya manà mabishi diloolo dyônsò, ciikàle cyumvwija lukongo ne lukongo lwônsò. Mwaba awu ki wakapangilabo bwalu. Cyakabapeesha mulûngù. Cyakabashipa, kudya kwa cyakudya citapile biinya aci.

Nenku, mu nyuma, cidi cyenza cintu cimwecimwe aci leelu ewu; ciikàle cibashipa, mu nyuma, pamwe ne dingumba.

Utukwacisheku, Nzambi munanga. Byònsò bidi mu byanza Byebe Wèwè mpindyewu. Mu Dîna dya Yesu Kilisto.

Ne mitu yetu miinyika, netwimbè cyòci aci paudi wangata dipangadika dyebe apu. Udiku muswe bwa kuya too ne ku ndekeelu anyi?

Ndi mwa kuumvwa mudi Musungidi wanyi. . .

(Ne Yèyè udi Dìyì.) ubiikila,

Ndi mwa kuumvwa. . .

“Kaa, ndi mulalakane ntanta mule, kadi, mu bushuwa bwa bwalu, mpindyewu mene nyewu mMuumvwa ne: ‘Lwâyi kŪndi, nwènù badi benda bàbààbata.’”

. . . ngumvwa ne. . .

<sup>377</sup> “Ambula nkuruse webe, uNdonde ku dituku ne ku dituku.’ ‘Eyo, nansha mêmè ngendela mu cibandabanda cya mundidimbi wa lufu, ncyakuciina cintu cibi nansha cimwe to; mpweka mpicila mu mpàtà ya lutende lubishi lwa mu ditalaja, ne kumpenga kwa màyi matalale.’”

Ne kwandombolaYe mêmè. . .

<sup>378</sup> “Mukalenge, ndi mmona dikutakana dya ci-trinitaire dyadya. Ndi mmona badimyamine mu buloba bujima; bisoosa bibi bitoloke myaba yònsò. Kadi kuwandombola Wèwè mpindyewu aku, Mukalenge, nêngiikalè bu baa mu Byenzedi 19 abu. ‘Paakumvwapo Cyòci eci, baakabatijiibwa cyakabidi mu Dîna dya Yesu Kilisto.’”

. . . nêndondè,

“Nkaadi mwende citupa cya njila, Mukalenge, cikumbane bwa kuKwakidila.”

Mpindyewu nênyè Nende too ne ku ndekeelu.

<sup>379</sup> Nzambi munanga, ndi mutwishiiibwe ne aci ncifumine munda mwa mwoyi wanyi. Ndi mutwishiiibwe ne ncifumine munda mwa mwoyi wa muntu yònsò udi munkaci mwa kwimba pa dîbà edi, pàmwäpa bààbûngì bààteelejâ mukaba wa mêyi ewu, bàdì kabayipu anyi kabayi munkaci mwa kuwuteeleja mpindyewu to. Swaku twikale ne diswa adi, Mukalenge, nansha byòbì bitulomba cinyi. Wèwè wâkamba ne: “Mushindu udi muntu uyààya bwa katwilangana ne cilwilu cikwabo, disalaayi, mfumu kampanda; ùdi wànji kusòmbela panshi dyambedi wenza makumi, mmukumbane kucyenza anyi, ùdi mwa kulekela maalu a pa buloba anyi? Udi wèwè mwa kubilekela, kulwa kudisanga ku cilwilu cya Dìyì difunda dya Nzambi, kutwa ngendu ne masalaayi Ende, kubuuka ne mikanku Yende anyi?” Twènzèlèku nanku, Mukalenge, mu Dîna dya Yesu.

380 Nudi nwitabuuja anyi? Nudi nuMwitaba anyi? Eyo. Netunumone cyakabidi mwaba ewu, diloolo edi, bu Mukalenge mwa kwanyisha. Nudi nwitabuuja aci ne m'Bulelela anyi? [Disangisha didi dyamba ne: "Amen."—Muf.] Mbitooke mu mushindu mukumbane anyi? ["Amen."]

Nanku angata Dîna dya Yesu wëndè naadi,  
Wêwè mwânà wa kanyinganyinga ne dikenga;  
Nedikupe disanka ne busambi,  
Nda naadi kwônsò . . .

Mpindyewu, labulangana ku cyanza ne muntu udi ku luseke lwebe aku awu mpindyewu.

Dîna dya mushinga, Éyî dya bupole be!  
Ditekemena dya buloba, (Ditekemena dya  
buloba!) disanka dya Dyulu;  
Dîna dya mushinga, Éyî dya bupole be!  
Ditekemena dya buloba ne disanka dya Dyulu.

Twinamina Dîna dya Yesu,  
Tuona mikookwela ku makàsà Ende,  
Mfumu wa bamfumu mu Dyulu netuMwase  
cifulu cya butumbi. . . (Yéyè udi Nzambi, pa  
dîbà adi.)

Paajika lwendu lwetu.

Dîna dya mushinga, (Dîna dya mushinga) Éyî  
dya bupole be! (Éyî dya bupole be!)  
Ditekemena dya buloba ne disanka dya Dyulu;  
Dîna dya mushinga, Éyî dya bupole be!  
Ditekemena dya buloba ne disanka dya Dyulu.

Ndi ngeela meeji ne bambi bônsò mbabamanyishe kudi bantu mu dinda emu, babasekelele.

381 Padi muntu musambile lumingu lujima, udikonka ne bwalu budi cinyi, umona Mifundu eyi, miikale kacya yimana kumpala kwebe. "Nenku dyakabi dyanyi," mwâmbilè Pôlò, "mèmè nciyi nyiisha Evanjeeliyo." Kundekeelu kwa njila wende, kwambaye ne: "Ncyêna mudikande bwa kunwambila patooke Mubelu wônso nkòong wa Nzambi mwakampeebwawu nansha."

Ntu misangu mikwabo mpwa mwoyi bwa kujingulula bimwe bintu, dileeja dya bantu, dilambula dya bâna mu byanza bya Nzambi.

Billy uvwa wamba, dîngà dituku ne, muntu mukwabo uvwa mulwe, wamba ne: "Ndi ndwa mwaba ewu kukaadi bidimu bibidi, bwa kulambulabo mwanaanyi mu byanza bya Nzambi."

382 Billy kwambaye ne: "Kupeci meeji mabi bwa bwalu abu to. Mèmè ndi ne mwânà, ûkaadi ne cidimu cijima; kî mbanji pende kumulambula mu byanza bya Nzambi to, ne leelu. Pa nanku ndi ngindila mene too ne paafikaye bukole bukumbane bwa kudiyiilaye nkaayende kumpala kwaka's, ngeela meeji."

Nenku tudi tusangana nunku, wêwè mwaneetu wa balume, wêwè mwaneetu wa bakaji, ne kabyena—kabyena nanku to, wamonu's, mêmè. . . Cintu cimwe cidi ne, bivwa bikengela bwa twêtù kwikala tulambula bânà beetu balela mu byanza bya Nzambi.

<sup>383</sup> Tudi ne cya kubatiiza muntu yônsò. Kudi ciinà cya mâyi; mâyi's ngôwò aa. Pawikala kuyi mubatijiibwe to, ncinyi cidi cikupangisha? Mâyi's ngôwò aa. Lwâku mpindyewu mene. Kwindidi too ne diloolo edi to; lwâku mpindyewu mene. Kudi muntu mwaba ewu wîkala mwa kubatiiza ewu yônsò ukàadi munyingalale ne mutonde mpekaatu. Pawikala ukàadi mubatijiibwe misangu dikumi ne yibidi, nebakubatiize mu Dîna dya Mukalenge Yesu Kilisto bwa dilekelediibwa dya mpekaatu. Wamonu anyi? Ki citudi twêtù.

<sup>384</sup> Kadi, nwamonu's, Mukenji ki udi pa mwoyi wanyi. Ndi ne cya kuWupatula. Ki kiipacila kamwepele kândi mêmè naaku, nciyi ntangila bidi mukajaanyi wamba to, bidi bânà baanyi bamba, bidi mpaasata wanyi wamba, bidi nî nganyi nî nganyi wanyi wamba. Mukalenge wanyi ngudi ne bwalu. Ndi ne cya kupatula Aci. Ki kiipacila kamwepele kândi mêmè naaku aku.

<sup>385</sup> Nenku mpindyewu, misangu yâbûngî, ntu mpwa mwoyi bwa kusekelela bambi. Ngeela meeji pâmwâpa ne. . .mwaneetu wa balume, Mwaneetu Neville, muntu wa mushinga mukole. Bânà beetu baa balume bakwabo aba, tudi ne disanka dya kwikala neenu.

<sup>386</sup> Kî mbwena kwamba ne katwena tupetangana neebe to, mwaneetu, bwa kupanganangana. Bââbûngî baa kunudi mwaba ewu mbafwanyine kwikala bayiishi baa ba-trinitaires. Katwena baswe kunufiikila munda to. Tudi banunange. Kabiya nanku to, bu ne ncivwa ngiitabuuja nanku to, ncyêna mufwanyineku kuumuka mu ekeleeziya emu nciyi mupweke kwaka mukatwe binù ngamba ne: “Nzambi, ndongololeku.”

<sup>387</sup> Neitu muswe nyuma wa dyambu, wa budisu awu bwa kusambakanaye ne wanyi mêmè to. Ndi muswe nyuma wanyi ikale mutooke ne mukezuke, wa dinanga dya bwânà bwetu, wa cijila ne Nyuma Mwîmpè. Mpindyewu, muntu yêyè mungenzele bwalu bubu, bidi anu bilenga. Nenku nansha mûndi mufwanyine kwikala ne bukenji bwa kumupingajila, ncitu muswe aci mu wanyi nsòmbelu to. To, ntu—ntu mêmè muswe kwikala ne dinanga. Ntu muswe kwikala pabwîpî bwa kulongololangana ne dinanga, ne dinanga didi kakuyi mpatà to diikale dyandamuna bwa bwalu abu dyamwamwa.

<sup>388</sup> Ncyêna ne meeji a dibenga kupetangana to. Méthodiste, Baptiste, Katolike, Presbytérien, nansha wêwè mwikale nganyi, ncyêna ngamba maalu aa bwa kubenga kupetangana, kwikala ne dyambu kumpala kwenu to. Bu ne mvwa nanku, ndi mwena



lubombo ne bivwa bikengela mêmè kwikala ku binù ku cyoshelu eku, nsambila Nzambi nsambidilamu.

<sup>389</sup> Kadi pândi mbyamba apu, mbwa dinanga, ne ndi mmona kunuyaaya. Mpindyewu, ncyêna ngamba maalû aa ndyambilawu, ne ngamba mwikale ndicinkila to. Ndi nnupa EMU MMUDI MUKALENGE WAMBA. Ki Bulelela mbwôbò abu. Ne ndi mununange bwa maalû awu. Nzambi anubeneshe.

<sup>390</sup> Mpindyewu, patudi twimba cituminyi ckwabo cya musambu ewu apa, tuwîmbàayi, kumpala kwa twêtù kuya. Tudi baswe nwikale mwaba ewu diloolo edi, panwikala ne mushindu. Panwikala kanuyi ne mushindu to, Nzambi ikale neenu too ne patwapetangana. Tudi tulomba anu ne Nzambi anu—anubeneshe ne anupeeshe cidi citambe bwîmpè cya mu buloba Bwende, nwamonu's.

Angata Dîna dya . . .



*BALAAABA MAANYI KU CIKONDO CYA NSHIİKIDİLÜ* LUA65-0725M

(The Anointed Ones At The End Time)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matükü 25 a ngondo wa mwandamutekëte, cidimu cya 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mëyi ne dituuta ku cyamu mu kaabujima kâadi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)